

WANTOK

NIUSPEPA BILONG OL PAPUA NIUGINI STRET

Ernst & Young audited/
circulation 15,177

40 pes

Namba 954

Wik i stat long Fonde, October 15 1992.

40 toea

Muaina haiskul sot long wara-p7 • Kabinet makim edministreta long ranim 4-pela provins - p3
NEKS WIK: Wingti raun long Kimbe

Olpela Kangaroo pilaia egens Kumul kosa

Lukim RAGBI LIG NIUS



Ol primia long Papua egensWingti

OL primia bilong Papua i laik bung wantaim Praim Minista Paias Wingti na toktok gut wantaim em long bihain taim bilong ol provinsal gavman insait long kantri.

Ol i bin kibung long Mande, Oktoba 12 bihainim toktok bilong praim pinista Wingti long rausim ol provinsal gavman. Wingti i bin tok olsem ol provinsal gavman i no mekim wok bilong ol long givim sevis i go long ol pipel. Olsem na gavman bilong em bai rausim ol.

Long bekim tok bilong Wingti, ol primia tok insait long dispela 15 yia taim provinsal gavmah i kamap, ol i bin mekim sampela gutpela samting tu. Ol i no westim mani na stap nating tasol. Hia em sampela as ol i givim egens tingting bilong Wingti.

• Dispela tok we mani bilong ranim provinsal gavman i bikpela tru em i wansait toktok. Bikos nesenel gavman yet i save makim pe bilong ol provinsal memba. Na siaman husat i go pas long makim pe bilong ol pipel insait long gavman em spika bilong palamen yet. Olgeta pawa i stap long han bilong ol yet

i go moa long pes 4

Ston piksa bilong Santu Maria na Jisas



• Tupela memba bilong Koge Katolik Yut grup long Simbu provins i sanap klostu long ston bilong Santu Maria na pikinini Jisas Kraus, em tupela i bin klinim long las wik. Dispela ston piksa em olpela pater bilong Koge paris, Pater M. Seamus na wanpela slos woka bilong Fiji, Bruter Joshepho i bin wokim long yia 1989.

Foto: Michael Koma

Gutpela as long rausim ol 4-pela provinsal gavman ... kabinet ripot soim planti paul wok

HARLYNE JOKU i raitim

I GAT gutpela as na nesenel gavman i stapim ol wok bilong 4-pela provinsal gavman long Sauten Hailans, Milen Be, Flai na Morobe provins.

Dispela toktok i stap insait long ol ripot bilong kabinet.

Ol wok painimaut em olpela minista bilong Provinsal Afeas, Pater John Momis i oraitim long kamap i soim ol gutpela as bilong rausim ol provinsal gavman bilong ol dispela provins.

Long Morobe provinsal gavman: Nesenel Eksekutiv Kaunsil (NEC) i bin stapim wok bilong provinsal gavman long Septemba 12, 1989. Bikos em i tok wok bilong mani long provins i no ran stret. Gavman i yusim nabaut mani. Na long dispela taim, ol i bin painim sampela rot bilong stretim dispela hevi.

Orait long Janueri 1991, ol i rausim dispela tambu long provinsal gavman na givim ol ileksen pepa bilong makim nupela asembli. Na nupela asembli i kisim opis long Epril 2, 1991.

Jerry Nalau i kamap primia tasol em i lusim gen bilong resis long nesenel ileksen long dispela yia.

Olsem na long mun Jun, Titi Christian i kamap primia taim bikpela bruk i kamap long ol minista bilong em. Em i

senisim tripela wok minista insait long tripela wik bihainim dispela. Na dispela i soim ples klia olsem gavman i no strong na i no inap wok gut.

Namel long Ogas 5 na Septemba 22, provinsal eksekutiv kaunsil i no holim wanpela kibung liklik. Ol minista i tingting long winim nem, wok na pawa na i no tingting long wok bilong gavman.

Nupela primia i bin stap wok stat long mun Julai tasol na ol toktok kros i stat pinis.

Ripot bilong kabinet i tok dispela kros na hevi i go insait tu long ol wok bilong dipatmen. Na i brukim nau ol lain long publik sevis i go long tripela grup. Wanpela lain i sapotim Christian, narapela i sapotim oposisen wantaim James Ibras na narapela grup i stap tasol long namel.

Dispela ripot i tok, "Wok bilong publik sevis insait long provins i go insait nau long pilai politik. Na dispela i no gutpela, bikos publik sevis i mas stap namel na wok wantaim wanem grup i kisim gavman."

Long wok bilong mani, ripot i tok provinsal gavman i bin yusim bikpela mani tru long baim ol balus na yusim long taim bilong nesenel ileksen. Ripot i tok ol i yusim K13,600. Na long mun Epril, provinsal gavman i bin givim tu •

i go moa long pes 2



TOYOTA HILUX... NAMBA WAN TRU LONG PAPUA NIUGINI

STRONGPELA 4 WIL DRAIV 2800cc DISIL PAWA...EM NAU!



Ela Motors

PORT MORESBY 229400 • LAE 433655 • RABAU 921988 • MADANG 822188 • GOROKA 721844 • MT HAGEN 521888
WEWAK 862255 • KAVIENG 942132 • KIMBE 935155 • TABUBIL 589060 • VANIMO 871254 • PORGERA 579367

Red Cross helpim ol skulmeri bilong Sogeri

GODFRIED NIAKA i raitim

SAMTING olsem 62 i lusim olgeta samting studen meri bilong bilong ol taim paia i Sogeri nesanel haikukim haus slip bilong ol long las wik Sarere,

Nupela PPC go long Mendi

SAUTEN Hailans i gat nupela provinsal plis komanda.

Sief Inspekta Joe Boma bai mekim wok bilong PPC Geru Baki inap em i kam bek long 8-pela mun malolo bilong em long Wes Nu Briten provins. Baki i bin lusim Mendi na go long Wes Nu Briten long las wik.

Pastaim long Boma i go long Mendi, em i bin holim wok olsem

ol. Namba tu hetmasta bilong skul, Jefferey Gawi i tok paia i bin kukim haus slip bilong ol long las wik Sarere,

komanda bilong Hailans Haiwe Patrol. Na ol i save stap long Goro-ka. Em i bin wok wantaim spesel sevises bilong plis dipatmen olsem deputi dairekta.

Na em i wok long hetkwata long Mosbi na long Buka Ailan. Em bai wok inap mun Jun long neks yia inap Baki i kam bek gen long stat wok.

Na bihain em bai go bek long Goro-ka.

long samting olsem 3 klok long moning.

Mista Gawi i tok paia i bin stat bihain long wanpela skulmeri i lus tingting long mekim dai wanpela kendel em i yusim long stadi long Fraide nait.

Em i tok kendel i lait i go na kukim matres bilong dispela studen meri na i go bikpela na kukim haus slip.

Em i tok ol dispela lain 62 studen i no gat klos na laplap samting bilong yusim na go long skul. Paia i kukim olgeta samting bilong ol.

Long nau yet ol i slip wantaim ol narapela wanskul na go long

klas. Na tu ol i wok long serim ol samting olsem kap long dring ti, plet long kaikai, buk bilong stadi na ol klos samting bilong go long skul.

Mista Gawi i tok em i no inap long tokaut long kos bilong dispela haus slip em paia i kukim. Long wanem, ol lain long paia sevis i wok long painimaut yet long dispela samting.

Na long Trinde, Oktoba 14, Komyuniti Sevis Disasta na Sefti Sevis divisen bilong Papua Niugini Red Cross Sosaiti i bin givim sampela samting i go long helpim ol dispela lain skulmeri.

As bilong rausim provinsal gavman

i kam long pes 1

K75,000 i go long

Lae Siti Atoriti bilong baim ol wokman. Na dispela i no stap long baset.

Long Sauten Hailans:

- Primia i wok long kisim alauwens bilong ol liklik samting inap long K3,000 long wanpela mun. Tasol provinsal gavman i bin baim pawa bilong em inap long K260.33, na dispela tu i brukim lo bilong wok i karamapim ol pablik sevan (P/A.2/89).
- Deputi primia na spika i bin baim ol nupela ka pastaim long ol olupela ka i winim 30 mun bilong ol.
- Seketeri i wok long kisim K700' hausing alauwens bilong stap long haus bilong em yet. Na namba wan meri bilong em i stap long haus gavman i givim long seketeri.
- Kima Pty Limited i bin kisim K13,142.26 bilong baim rot na ples slip bilong ol memba taim ol dispela lain i no kamap memba yet. Dispela i brukim seksen 24 long mama lo bilong provins na provinsal lo i karamapim ol pablik sevan lida (PH.2/89).
- Fainens minista i bin kisim nating K1,422.28 bilong baim helikopta taim kos bilong dispela i stap long K362.30 tasol.
- Minista bilong Helt i no draiv gut na bagarapim wanpela gavman ka, tasol em i les long baim K3,000 bilong stretim ka.
- No gat gutpela wok i bin kamap long lukautim ol mani na ranim ol wok bilong Sauten Hailans Menesmen Asosiesen (SHMA) na Sauten Hailans Developmen Kopresen (SHDC), tupela bisnis han bilong provinsal gavman. Bikpela mani i bin lus long ol wok bisnis bilong SHMA na SHDC.
- Ol bisnis bilong provinsal gavman i no bin wokim winmani na baim ol sea long ol seaholda. Tasol provinsal gavman i laik baim wanpela bisnis we i kos moa long K1 milien. Na seketeri i holim wok olsem dairekta bilong dispela bisnis.
- Seketeri i bin wokim wantok sistem long makim ol wanlain bilong em long ol wok insait long dipatmen. Na tu long tokim gavman long baim skul fi na rot bilong ol lain bilong em long go skul long Yunivesiti bilong Papua Niugini long Mosbi.
- Long Flai provinsal gavman:

Meri Rabaul baim kot long paitim nating narapela

RABAUL distrik Kot i tokim wanpela meri long baim K50 kot fain long Mande.

Kot i painim Doreen Kivung i rong long

paitim nating narapela meri na sasim em long K50.

Plis i bin tokim kot olsem Kivung i bin paitim nating arapela

meri long Salfa Krik. Bikos em i ting dispela meri i paul wantaim man bilong em.

Kivung i bin tokim kot

olsem em i bilip olsem dispela meri i save raun wantaim man bilong em. Olsem na taim em i lukim meri ya i toktok wantaim

man bilong em, em i bel hat na paitim em.

Tasol kot i tok Kivung i rong na tokim em long baim kot long K50.

Singel woda kot long brukim haus meri

JOE KORO i raitim

WANPELA singel woda bilong Kerevat haus kalabus i bin kamap

long ai bilong Rabaul Distrik Kot long Mande. Nem bilong man ya em George Kura, kot long sas bilong brukim haus bilong ol arapela lain.

Ol plis i tok olsem Kura i bin spak na go long singel kwata bilong ol woda meri na bagarapim haus slip bilong ol. Kura i bin brukim flaiwaia wan-

taim 4-pela glas. Dispela trabel i bin kamap long Jun 24, namel long 8 na 10 klok long nait.

Kot i painim Kura i rong long dispela sas

na askim em long baim kot long K100.

Taim mejistret Eric Mosoke i wokim disisen, em i bin givim strongpela tok lukaut tu i go long Kura.

PLIS RIPOT



MOSBI: Wanpela man i kamap pinis long Boroko Distrik Kot las wik long sas bilong bagarapim meri. Plis i tok Peter Laiko, husat i gat 17 krismas bilong Malalaua long Galp provins wantaim 9-pela pren bilong em i bin hensapim wanpela man na gelpren bilong em long Sabama. Na ol i stilim ol samting bilong tupela. Bihain foapela bilong ol i pulim meri ya i go long wanpela olupela haus na bagarapim em. Plis i save long ol man ya na i painim ol yet.

MOSBI: Plis i holim pinis wanpela man bilong Simbu provins. Ol i tok Michael Maima i gat 20 krismas na em i bilong Sinasina. Plis i tok Maima i bin bagarapim wanpela meri bilong Isten Hailans long Badili long Oktoba 2. Na ol i holim em bihain long sampela lain i go tok save long plis long wanem hap em i stap long en.

MOSBI: Wanpela waitman i bin kamap long Boroko Distrik Kot long sas bilong krosim na pretim ol man long Septemba 31. Plis i tok George Godfrey Collins i gat 43 krismas na em i bilong Caulfield long Viktoria, Australia. Ol i tok em i bin krosim ol pipel na pretim ol long Jackson ples balus taim em i laik go long Australia. Long banisim em yet, Collins i tokim kot olsem em i no bin mekim kain pasin olsem. Olsem na ol i surikim kot bilong em i go long Oktoba 28.

MOSBI: Wanpela man i stap nau long han bilong ol plis long sas bilong kilim tambu bilong em. Plis i tok Ulu Ilagi, husat i gat 22 krismas na i bilong ples Buru long Aroma, Sentral provins i bin kilim Roa Ravu, husat i gat 31 krismas na i bilong ples Maua long Aroma tu. Dispela trabel i bin kamap long Lakekamu Strit long Gabutu taim tupela man ya na ol lain bilong ol i spak na pait. Plis i kisim ripot olsem Ilagi i bin tromoi han long pes bilong Ravu na em i pundaun na i no pulim win gut. Ol i kisim em i go long haus sik na em i dai. Plis i holim Ilagi bihain long ol i kisim ripot.

POPONDETTA: Ol sampela man i bin go insait long opis bilong primia bilong Oro na bagarapim nabaut ol samting long hap. Provinsal Plis Komanda Charles Sorman i tok dispela trabel i kamap long Sande. Ol pipel klostu long opis ya i bin mekim planti nois na ol i no save olsem ol man i brukim opis na go insait. Sorman i tok ol man ya i bin brukim wol na go insait na rausim ol fail na tromoi nabaut. Ol i bin stilim wanpela taipraitasol.

MOSBI: Sampela raskol i bin hensapim ol wokman bilong Seeto Kui na stilim mani na ol sek inap long K77,000 long Mande. Plis i tok ol lain ya i bin karamapim pes bilong ol na karim foapela gan. Ol i go hensapim ol wokman na karim tupela bokis mani. Taim ol i kisim mani pinis, ol i ron i go long wanpela ka ol i bin stilim na ranawe. Bihain plis i painim ka ya klostu long Bomana Semineri. Dispela em i namba 3 taim nau stil pasin i kamap long Seeto Kui. Na plis i bilip olsem ol wokman bilong kampani yet i mas helpim ol stilman long mekim dispela pasin. Bikos taim ol i go long stua ya, ol i bin save long wanem hap bilong long kisim samting. Plis i painimaut yet long dispela.

LAE: Plis i laikim ol meri long no ken raun wan wan long nait. Bikos trabel bilong ol man i holim na bagarapim ol meri i wok long kamap bikpela nau. Bos bilong ol Lae plis, Alfred Reu i tok olsem planti long ol trabel ya i wok long kamap long hap bilong 3,4, na 5 mail, Kamkumung na Boundary Rot setelmen. Em i tok long wanpela bilong dispela kain trabel long las wik, 25 man i bin bagarapim wanpela meri.

WEWAK: Plis i wok long painimaut yet long dai bilong wanpela meri long Maprik. Plis ripot i tok meri ya i bin dai taim em i slip wantaim liklik bebi long bet. Dispela birua i bin kamap long ples Wabak long Maprik. Nem bilong dispela meri em Susan Jiem, 29 krismas na em bilong ples Jagur long Kairuru Ailan, na em i marit long wanpela man Wambak. Man bilong em i tokim plis olsem em i bin lukim meri i dai na blut i kam daun long nus na maus bilong em. Dispela em samting olsem 4 o 5 klok long moning. Tasol plis i ting man bilong em yet i kilim em bikos no gat ol arapela lain i bin stap long haus. Tupela tasol i stap na plis i no bilip olsem sampela lain i kam na kilim meri ya.

Kabinet makim ol edministreta bilong 4-pela provinsal gavman

4-pela provins nogat gavman

KABINET i makim pinis 4-pela edministreta long ranim ol provinsal gavman em i bin saspem long dispela wik.

Long wanpela miting bilong ol asde Oktoba 14, kabinet i makim Gabriel Waipok long ranim Flai Riva provinsal gavman, Karipe Ptiz long Milen Be,

Ol Hailans primia sapotaim sampela senis tasol long sistem

FAIVPELA primia bilong Hailans i tok klia olsem ol bai no inap bruk na lusim Papua Niugini sapos nesanel gavman i rausim wok bilong provinsal gavman.

Ol i tok ol bai sapotim gavman bilong Prait Minista Paias Wingti long kamapim sampela senis long sistem. Dispela em long wokim provinsal gavman i no inap kos moa long ranim.

Ol primia i no laikim tru tingting bilong stap long wan wan rijon. Olsem na ol i askim

strong praim minista long larim provinsal gavman sistem i stap long wokim olgeta rijon i wok bung wantaim.

Eking siaman bilong ol Hailans primia na primia bilong Sauten Hailans, Albert Mokai i givim ol dispela toktok taim praim minista i go raun long Goroka. Mokai i tok ol primia i save long sistem, na ol i save wanem samting long wokim provinsal gavman sistem i ran gut.

Mokai i tok ol bai givim olgeta sapot long nesanel gavman.

Kieta Clant Alok long Morobe na Dominic Diya long Sauten Hailans.

Long taim ol i makim ol man ya, Prait Minista Paias Wingti i tok ol dispela man inap long ranim ol provins ya. Bikos ol i bin mekim planti edministretiv wok taim ol i stap insait long pablik sevis.

Edministreta ya bai stat wok ol taim gavman i pinis long stretim olgeta samting bilong ol i ranim provins.

Long Tunde, Oktoba 13, nesanel gavman i bin saspem ol dispela 4-pela provinsal gavman.

Wingti kisim sapot long rausim ol provinsal gavman



• Ol lain sumatin bilong wanpela haiskul long Isten Hailans provins i kam bung bilong welkamim Prait Minista Paias Wingti i go long hap. Ol foto: Sape Metta.

Mokai na Christian egensim saspensen

PRIMIA bilong Sauten Hailans, Albert Mokai i tok em bai askim lo long skelim sapos nesanel gavman i wok stret long rausim provinsal gavman o ol i mekim olsem long pasin politik tasol.

Primia i mekim dispela toktok bihain long Nesanel Eksekutiv Kaunsil i stapim ol wok bilong Sauten Hailans na narapela tripela provinsal gavman long dispela wik.

Mokai i tok nesanel gavman i no ken bringim hevi bilong wok politik long provins bilong em.

Em i tok, em i amamas long tingting bilong nesanel gavman long rausim ol provinsal gavman. Tasol em i ting sampela nesanel memba bilong Sauten Hailans yet i bin suvim gavman long mekim dispela.

"Mi no amamas long ol i stapim gavman bilong mi long wok olsem. Bikos em i kamap long pasin politik wa i no gat as long en.

Mokai i tok gavman bilong em i bin kamapim gutpela wokbung wantaim ol bikipela wel kampani na apim nem bilong Papua Niugini long ovasis.

Primia bilong Milen Bay Jeffrey Toloube i no stap long givim tingting bilong em. I gat bilip olsem em i bin kibung wantaim ol memba long asde apinun.

Morobe primia Titi Christian i no amamas long tingting bilong saspensen na em i tok em i no laikim wanpela edministreta long lukautim provins.

PLANTI lain bilong Isten Hailans provins husat i bin go lukim Prait Minista Paias Wingti taim em i wokim namba wan raun bilong em long Isten Hailans i sapotim tingting bilong rausim ol provinsal gavman.

Long dispela bikipela bung, planti manmeri i bin singaut "Rausim rausim." Dispela i soim tru olsem ol pipel i no laikim wok bilong provinsal gavman, na ol i laikim nesanel gavman long rausim.

Ol dispela lain i bin askim tu praim minista wantaim arapela 7-pela minista bilong em long statim fri edukensen na wok bilong Vilis Sevis hariap.


Planti i no amamas long toktok bilong eking primia, Kasen Nahe. Nahe i toktok long sampela wok kamap em Isten Hailans provinsal gavman i wokim long sampela yia i go pinis. Nahe i tok provins bilong em i gat gutpela nem. Olsem na em i laikim provinsal gavman long stap.

Wingti i tok klia long ol pipel olsem ol provinsal gavman i kamap bikos Pater John Momis i bin tingting long brukim Bogenvil long Papua Niugini. Na gavman bilong dispela taim i harim tok bilong em na statim provinsal gavman.

Wingti i tok provinsal gavman i dia tumas long ranim. Na yumi mas rausim long bungim olgeta pipel wantaim. Nau yumi wok long stap nabaut bikos wan wan provinsal gavman i gai tingting bilong em yet.



• Prait Minista Paias Wingti i bungim sampela mama arere long ples balus.



WANTOK
NIUSPEPA BILONG OL PAPUA NIUGINI STREET

Mobeta long wanpela lo

Ripot bilong kabinet nau i soim tru ol as bilong NEC long rausim ol wok bilong 4-pela provinsal gavman gen. Na dispela i bringim namba bilong ol provinsal gavman i stap long saspensen i go antap long 6-pela. Ating olgeta samting i klia tru long wanem as na NEC i mekim olsem. Na i gat tok klia tu olsem gavman i no mekim dispela olsem rot bilong rausim ol provinsal gavman olgeta long PNG sosaiti. Em i mekim olsem bikos dispela ol 4-pela provinsal gavman i rong. Orait nau NEC i makim tu 4-pela nupela man long kisim wok olsem edministreta long ol dispela provins. Sampela i gat gutpela rekot na sampela i no gat, tasol nogat nem long hia. I luk olsem dispela em narapela bikpela wok gavman i no mekim pastaim long em i makim ol man bilong holim ol wok olsem edministreta. Sampela bilong ol i gat ol rekot nogut bilong wok long bipo. Na gavman i mas sekap na skelim gut ol dispela kain man. Planti bagarap bai kamap yet long ol provins sapos ol dispela kain lain i stap long pawa, maski sapos provinsal gavman i stap o nogat. Olsem na nesanel gavman i mas tingting gut long dispela. Dispela nau i bringim gen ol toktok bilong gavman long rausim olgeta provinsal gavman sistem long Papua Niugini.

Gret 11 na 12 long Lumi, Aitape na Vanimo haikul

FELIX RAMRAM i raitim

PRIMIA bilong Sandaun Egbert Yalu i tok edukesen o skul i mas bihainim ol seniis nau i wok long kamap insait long kantri. Em i mekim dispela toktok long namba 3 asembli miting bilong ol long dispela yia long Septemba 28 - Oktoba 2. Yalu i tok dispela sistem bilong edukesen i stap nau i no gutpela. Bikos ol pikinini i save les nabaut long skul. Na 45 long olgeta 100 pikinini i no save pinisim gret 6 bilong ol. Na wan wan tasol i save go long haikul. Dispela i soim olsem dispela sistem bilong edukesen long PNG i no gutpela. Bikos sistem nau i save larim wan wan pikinini tasol long go long haikul na koles o yunivesti. Olsem na nau gavman bilong em i tingting long senisim dispela sistem bilong edukesen hia long

PNG. Em i tok ol i traim tu long kamapim sampela kain samting we bai mekim ol pikinini long stap long skul, na traim hat long kisim gutpela mak long skul. Wanjela bilong ol dispela samting em long givim mani long helpim baim skul fi bilong ol studen husat i go long haikul. Na tu long helpim baim skul fi bilong ol studen husat i skul long Koles bilong Distens Edukesen. Ol samting we ol bai mekim bai stat long neks yia. Na em i tokim asembli olsem polisi bilong em stat long neks yia i go inap yia 2007 em: • Long 1994, Lumi, Aitape na Vanimo haikul bai kisim ol studen long mekim gret 11 na 12, • Telefomin bai bihain long 1996 na Green River bai bihainim long 1997, • Provinsal gavman bai kamapim wanpela edukesen opis long neks yia, Na stat long neks yia, ol bai kisim nupela wokman long mekim ol seniis long kamapim dispela nupela edukesen polisi program.

Wangil sia pulim 5-pela kendidet

I GAT 5-pela kendidet husat i givim nem pinis long resis long sia bilong Wangil konstituensi bilong Madang provinsal gavman. Ol dispela kendidet em Otto Arek, Bernard S. Ollok, Gusa Mowo, Mamol Uram na Roy Alit. Ollok i sanap long tiket bilong Melanesien Alaiens. Ol arapela 4-pela i sanap olsem ol independen kendidet. Sia bilong Wangil konstituensi i bin stap nating taim olpela memba, Nick Owet i dai long mun Julai bilong dispela yia. Owet i bin holim wok olsem Fainens minista long dispela taim long gavman bilong Primia Andrew Ariako. Provinsal Ilektorel opisa, Abraham Wai i tok ileksen bai stat long Oktoba 31 na pinis long Novemba 12.

Ol Papua primia na Wingti

i kam long pes 1 long daunim o apim pe bilong ol. Gavman i mas givim taim long ol provinsal gavman long seniis na kamapim gutpela wok. Na olgeta seniis nabaut i mas kamap bihainim ol kibung namel long nesanel na provinsal gavman. Na dispela pasin Wingti i bin mekim long toktok taim em i no bungim ol provinsal gavman na toktok wantaim ol i no gutpela. Dispela Viles Sevis polisi i no inap long seniisim ol provinsal gavman. Bikos em i nogat pawa long sait bilong politik. Sapos ol i laik mekim sampela seniis, ol i mas lukluk long kamapim sistem bilong rijonel gavman.

Kempen bilong egens pait na trabel



• Stiman bilong Faundesen bilong Lo Oda na Jastis, Ken Egan i givim ol singles i go long mausman bilong "Ol man egens ol pait na trabel", Simon Yanis na sampela memba bilong dispela grup long Oktoba 7 long Mosbi. Foto: Mesery Gubag.

Simbu gavman makim 16 opisa long helpim ol yut

SIMBU provinsal gavman i makim pinis 16 opisa bilong em long helpim ol Nesanel Yut Sevis (NYS) long kamapim yut wok long Sinasina distrik. Ol dispela opisa i kam long divisen bilong agrikalisa na laipstok, komes, helt, provinsal afeas na yut na hom afeas.

Long sem taim, gavman i makim tu 8-pela yut lida wantaim tupela yut lida bilong sios long helpim ol dispela gavman opisa. Distrik Yut Kodineta, John Sil i bin autim wari bilong em olsem olpela Nesanel Yut Muvmen Program i no gutpela. Bikos em i no lukluk long sindaun bilong ol yut long sampela hap olsem Sinasina. Tasol dispela nupela tingting bilong NYS i gutpela na i karamapim ol kain lain olsem ol yut long Sinasina. "Nau mi bilip olsem ol polisi bilong NYS i gutpela. Bikos wok bilong ol bai go gut wantaim ol polisi bilong ministri bilong Viles Sevises na Provinsal Afeas," Sil i tok. Na em i tok amamas long Simbu primia long statim dispela Not Simbu Rurel Dvelopmen projek. Dispela projek bai stat neks yia long Sinasina, Juave, Gembogl, Kundiawa na Kerowagi distrik.

Lain bilong olpela Sumkar open memba no laikim bai ileksen long kamap hariap

BEN TAUMAI i raitim

OL lain bilong olpela nesanel memba bilong Sumkar open, Galeng Lang i no wanbel long ilektorel komisina long oraitim bai ileksen long dispela taim. "Graun long matmat bilong Galeng i no stret yet. Na ol plaua mipela i planim i no groa yet. Bilong wanem na komisina i laik holim ileksen hariap tumas? Mipela i stap long wari yet," ol i tok. Ol lain bilong em long Bagabag i putim tambu long ol kendidet husat i

laik resis long noken go kempen long ples bilong ol. Sampela lain bilong Galeng long Takia sait long Karkar tu i mekim wankain pasin. Ol ples ya long Karkar em Kavailo, Did, Boroman na Kevasop. Nominesen bilong Sumkar i bin op tupela wik i go pinis. Na bai pas long Oktoba 23. Na taim bilong ol lain long vot em long Desemba 5 i go long 16. Olgeta ileksen wok bai pinis long Desemba 22. Long taim nominesen i op i kam inap nau, tupela man tasol i bin givim nem long sanap long ileksen. Tupela em Urong Stahl Salum bilong Karkar ailan na Kaming Kamba bilong Rempil long Not Kos.

WANTOK
NIUSPEPA BILONG OL PAPUA NIUGINI STREET

P.O. Box 1982 BOROKO
Telepon Namba: 25 2500
Feks Namba: 25 2579

PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00



Sandaun dipatmen nogat mani long kisim inap wokman

DIPATMEN bilong Sandaun i sot long ol wokman tasol i nogat inap mani long kisim ol nupela wokman long daunim dispela hevi.

Primia Egbert Yalu i bin mekim dispela toktok long bekim askim bilong memba bilong Wutung/Wan, John Leki insait long asembli miting bilong ol long Septemba 28 i go inap long Oktoba 2.

Leki i bin askim sapos gavman inap long mekim wanpela samting bikos planti pipel i no save kisim helpim bilong gavman hariap.

Na em i bin toktok long sait bilong haus sik. Leki i tok planti lain husat i save go long Vanimo haus sik long kisim marasin i no save kisim marasin kwik. Bikos i nogat planti nes na dokta long

lukim ol.

Em i tok dispela hevi i no stap long Vanimo tasol. Bikos ol arapela liklik helt senta na edpos i gat wankain hevi olsem. "Mi lukim olsem dispela hevi i bikipela tru long sait bilong helt. Na i moa gutpela sapos helt diaptmen i stat mekim sampela samting long kisim ol nupela wokman long kam wok long hia," Leki

i tok.

Yalu i bekim na tok dispela hevi i stap wantaim olgeta dipatmen. Na i no helt tasol.

Na sapos ol i laik stretim dispela hevi long olgeta dipatmen, em bai hat liklik. Bikos ol mas i gat mani i kam long nesene! gavman.

"Mipela insait long provins i no inap mekim dispela senis



□ Kanage putim ovasais trausis. Trausis tu i sotpela na i op aninikt long lek. Boi i sindaun i go daun na apim wansait lek long kaikai kaukau na lem fleps. Pikinini bilong em tu i sindaun na kaikai i stap. Sem taim em i lukluk i go insait long trausis bilong Kanage i go wansait na lukim wanpela samting i suvim het bilong en i kamaut. Pikinini kirap na askim papa, "Hei papa, em wanem samting ya?" Kanage kirap hariap tasol na stretim lek, tasol pikinini i wok long askim yet. Mekim i go na Kanage i painim hat long bekim. Em kirap isi tasol na tokim pikinini bilong em, "Shhh...em geko tasol. Em smelim kaikai na kamaut, tasol yu singaut na em ron i go bek insait na hait pinis. Olsem na yu no ken askim gen, nogut bai geko i bel hat."

Sape Metta,
GOROKA

Moa tok pilai long pes 18

Ol papagraun laikim moa mani long Lufa haiskul

OL papagraun bilong Lufa long Isten Hailans provins i no amamas long mani ol i bin kisim long graun we Lufa haiskul i stap long en.

Na ol i givim wanpela apil leta i go long Nesenel Lens Taitel Komisn long Mosbi. Ol i laikim komisn long mekim dispela hap graun i kamap graun bilong gavman. Na ol i ken kisim bikipela kompensesen mani long en.

Siaman bilong ol papagraun, Ken Lelegava i tok tupela memba bilong ol i go pinis long Mosbi na givim dispela apil leta long ol opisal bilong komisn.

Long makim maus bilong ol papagraun, Lelegava i tok dispela K12,000 olpela gavman bilong James Yanepa i bin givim ol long 20 ekta graun i no inap. Em i liklik tumas.

Provinsal edukesen minista, Andrew Korarome i tok amamas long dispela mov ol i bin mekim. Em i tok dispela rot bilong stretim hevi i moa gutpela. Bikos ol i no bin traim long mekim nabaut na stapim ol klas long skul long go het. Na tu ol i givim sans long gavman long harim wari bilong ol.

Sapos gavman i harim tok bilong ol, ol bai i gat 40 de long askim long apim kompensesen pe-

Ol rot long Bogia laikim moa mani long stretim

DEPUTI spika bilong Madang provinsal gavman, Thomas Karukai i laikim moa mani long konstituensi bilong em long stretim rot namel long Almami, Mikarew na Josephstaal long Bogia distrik.

Olsem na em i laikim gavman long putim moa mani long mekim dispela wok long baset bilong em long neks yia. Madang gavman i bin givim K40,000 long dispela yia long stretim dispela rot. Na ol i bin yusim dispela mani long stretim sampela hap tasol bilong dispela rot.

Em i tok as we em i laikim provinsal

gavman long stretim dispela rot em bikos ol pipel bilong Almami, Mikarew na Josephstaal i save bringim gaden kaikai bilong ol i go long taun long salim. Na gavman i mas tingim dispela na stretim rot bilong ol.

Karukai i askim tu ol nesene! na provinsal memba long wok bung na putim mani long stretim ol rot na bris long dispela hap na long provins tu. Em i tok developmen bai kamap sapos ol lida long nesene! na provinsal gavman i wok bung wantaim.

Kail askim gavman long narapela K5000

WANPELA man husat i tok em i papagraun long hap we maunten Wilhelm Nesenel Pak i stap i laikim nau gavman long givim em narapela K5000 we gavman i no bin givim em.

Nem bilong dispela man em John Kail. Em i gat 30 krismas na i bilong ples Denglangu long hap bilong Gemboql Distrik, Simbu provins.

Kail i tok Dipatmen bilong Kalsa na Turisim

long las yia i bin promis long baim K10,000 long yusim hap graun bilong em long putim kamap nesene! pak.

Em i tok gavman i givim em K5000 tasol long las yia.




MITSUBISHI



MITSUBISHI
FV 6x4

OLGETA SAMTING I BILONG HEVI-DUTI WOK TASOL



Olgeta samting i stap long ol Mitsubishi FV hevi-duti ka (6x4, GVW 24,800-27,600) stat long ensin i go long tandem draiv, i go long ol eksel bilong taia long baksait na strong bilong en long wok long ples nogut i moa yet. Em i ka bilong wok long ol ples rap na ples nogut, tasol yu bai kirap nogut long gutpela rum bilong draiva na saitboi bilong em. Long insait ol i wokim gut tru na yu i no

inap pilim les o bun i pen long longpela rot. Olgeta samting bai wok tasol taim yu tasim long wan pinga. Traim tanim ensin na harim kra i bilong ensin taim em i stat. Na pilim tu dispela strongpela pawa bilong ol disil ensin em i winim biknem nau long wol. Dispela kain disil ensin, 8DC9-1A bilong ol Mitsubishi i gat pawa inap long 320ps na i win stret na i kamap long bikipela hatwok

bilong ol wok painimaut. Na ol dispela ensin bai givim yu gutpela pawa bilong mekim ol kain kain wok. Dispela kain pasin na stail bilong Mitsubishi long kamapim ol nupela na gutpela ka i stap inap long 70 yia nau. Na Mitsubishi i wok long senis wantaim taim. Piksa bilong dispela em Mitsubishi FV hevi-duti ka. Olgeta samting long dispela ka em hevi-duti tasol.



HEY TOBA
MOTORS

PORT MORESBY PH: 21 7874
LAE PH: 42 2611
RABAU PH: 92 1866

MT. HAGEN 52 1855
KIMBE 93 5035
WEWAK 86 2784
ALOTAU 61 1246

TU MINIT TINGTING

OL KAIN KAIN TOK PROFET

"Sampela giaman profet i bin kirap namel long ol Isrel. Olsem tasol sampela man bai kirap namel long yupela na giaman long skulim ol manmeri long ol samting bilong God." (2 Pita 1.)

LONG Gutnius bilong tude, i kam long Luk 21: 5-19, Jisas i tok profet long bikpela bagarap bai pinisim biktaun Jerusalem. Na tu em i tok lukaut long olkain giaman profet bai kamap na autim kain kain tok bilong pretim ol manmeri.

Ating em i gutpela yumi tingting tude long dispela aidia bilong tok profet, long wanem, ol karismetik na ol pentikostal i save yusim dispela tok planti taim tude.

Pastaim yumi kliaim wanpela aidia. Maski yu husat man o meri bilong wanem kain grup o sios, yu rong sapos yu tok profet long taim dispela graun i laik pinis.

Long Mak 13:32, Jisas i tok, em yet i no save long de na awa bilong pinis bilong dispela graun. Tasol klostu olgeta yia i gat wan wan

Kristen i save tok profet na makim las de bilong dispela graun. Nau tasol mi holim wanpela pepa long han bilong mi, we tupela Kristen meri long hap bilong Wewak i tok olsem, 1993 em i las yia bilong dispela graun. Na olgeta taim wanpela man o meri i mekim kain tok tok olsem, oltaim i gat lain Kristen i bihainim em. Jisas yet i tok long em i NO SAVE long dispela de; na manmeri ya i tok em i save. Orait, nau yu bilipim husat? Yu bilipim Baibel o nogat?

Profet em i wanem samting? Profet em i no man i gat wok long tok wanem samting bai kamap bihain. Nogat. Profet i gat wok long autim tingting bilong God. Long kain kain we God i save tokim profet long laik bilong em. Orait, nau dispela profet i go tok save long ol pipel olsem: "God

i laik yumi mas mekim dispela samting.... Sapos yumi mekim, orait, bai gutpela samting i kamap. Sapos yumi no mekim, orait, olkain samting bai kamap. Olsem tasol, planti tok piksa bilong Profet Aisaya long Olpela Testamen i bin soim laip bilong Jisas.

Long Olpela Testamen i gat 4-pela bikpela profet, na 12-pela liklik profet. Na tu, i gat wanpela lain giaman profet. Insait long Nupela Testamen, Jon bilong Baptais em i wanpela profet; na Jisas tu i gat nem profet. Long nupela Kristen Sios i gat lain aposel na lain tisa na lain profet. Tasol planti giaman profet tu i kamap na i no long taim na wok profet insait long Sios i faul na pundaun. Las buk bilong Nupela Testamen, em ol i kolim Revelesen o Kamapim Tok Hait, em i wanpela buk i pulap long

tok profet. Bihain ol i raitim Nupela Testamen pinis, i no gat wanpela man i gat nem profet insait long Sios.

Long 1 Korin 14, Sen Pol i gat planti skul long wok bilong ol profet bilong nupela Sios. Em i tok olsem: profet i mas autim tingting bilong God na i no bilong em yet (1 Kor 14:5). Na dispela tok profet i mas helpim Sios na strongim em. Tasol bikos i gat planti profet i bin raun na bringim kain kain tok i faulim wan wan grup, Pol i rait long 1 Kor 14 : 32 olsem: "Ol man bilong autim tok profet, ol i save bosim maus bilong ol yet." Oltaim tok bilong ol i mas aninit long tok bilong sios. Sapos tok bilong tupela profet i bam, ol hetman bilong Sios tasol ol inap skelim.

Wanpela mak bilong giaman profet em dispela: em i no laik aninit long



FRANK MIHALIC i raitim

Sios. Jisas yet i bin promis bai Holi Spirit i stap wantaim Sios inap long las de, na em bai stiaim Sios. Sapos yu laik save wanpela tok profet i tru o nogat, orait, bai yu askim Sios na yu no inap popaia. Ating tupela Kristen meri bilong Wewak i no bin mekim olsem. Bilong wanem? Ating tupela i pret bai Sios i daunim tok profet bilong tupela. Man o meri i antap long Sios, em i no profet. Profet tru em i holiman; em i laikim daunpasin. Long wanem, daunpasin i save win oltaim long ai bilong God na long ai bilong man.

SDA Sios holim bikpela bung nau long Vanimo

OL lain bilong SDA Sios long Vanimo distrik i wok long holim wanpela bikpela bung long dispela wik.

Dispela bung i bin stat long Mande Oktoba 12 na bai pinis long Sande Oktoba 18. I gat tupela samting i kamap long bikpela bung. Namba wan samting em distrik sios kibung na narapela em Welfea Federesen.

As bilong holim dispela kibung em long lainim ol sios memba long pasin bilong wokim wok bilong sios. Ol sios memba bai lainim kain wok bilong

lukautim ol samting bilong narapela na wanem samting em dispela tok tok i sut long en.

Long dispela kibung ol bai luksave tu long pasin bilong ranim gut wok bilong sios. Na wanem kain helpim wanwan sios memba i ken wokim long helpim wok bilong sios i go het.

Man husat i go pas long holim dispela kibung em Pasto Peter Oli bilong Sepik Misin. Sepik Misin i save lukautim wok bilong SDA Sios long Is na Wes Sepik provins.

Yut grup painim mani long helpim pasto



• Sampela memba bilong Tasilarokerea yut grup i raun kisim mani long 3 mail trefik lait long Mosbi. Foto: David Rom.

OL lain bilong Tasilarokerea yut grup long Hanuabada insait long Mosbi i bin harim olsem ai bilong pasto bilong ol i bagarap.

Tasol ol i no sindaun na larim Pasto Tovai Kobi long kisim taim na stap long ples. Ol yut i go insait long Mosbi na painim ol rot bilong kisim mani bilong helpim pasto bilong ol i go long haus sik.

Na sampela bilong ol i go bung long 3 mail trefik lait na askim ol man

long mani long helpim pasto.

Ripot i tok ol saveman bilong wok long ai long Mosbi i no inap helpim Pasto Kobi. Olsem na em i mas go long ovasis long stretim ai bilong em. Bikos mani bilong baim tiket i go long Australia na marasin i dia tumas.

Olsem na ol lain long kongrigesen, ol famili memba na ol yut wantaim ol pren i kam na bungim mani bilong helpim pasto.

Moa long 20 pipel baptais long Koge

MICHAEL KOMA i raitim

MOA long 300 memba bilong Asembli Ov God (AOG) sios long Simbu provins i bin bung long Koge, insait long Sinasina distrik.

Dispela bung i bin kamap long las wik. Na ol sios memba long Koge i bin sponsaim. Ol i bin kibung long tripela de. Bihain long dispela bung sampela sios memba i baptais. Samting olsem 20

pasto bilong Papua Niugini i bin kamap long dispela taim. Ges spika bilong ol em wanpela pasto bilong Jemani, Pasto Span Gorose.

Bihain long dispela bung, 20 sios memba i baptais.

Wanpela bilong ol dispela lain em wanpela bikman, Saulin Kena. Kena i bin sanap wantaim ol arapela lain long baptais tasol namba tu pikinini

bilong em i rausim em long wara, na stapim em long baptais. Pikinini i no laikim papa i baptais namba tu taim wantaim AOG.

Kena em i wanpela bikman bilong narapela sios. Tasol long las yia, em i senisim tingting na go joinim AOG.

Kena i bihainim tupela pikinini bilong em na go joinim AOG. Namba wan pikinini bilong Kena em wanpela AOG pasto.



RED CROSS
"SAVE A LIFE"
ROCK CONCERT



VENUE: P.O.M. RUGBY LEAGUE OVAL (P.R.L. BOROKO)

DATE: SATURDAY 17TH OCTOBER

TIME: 1PM TO 5PM

FEATURING THE FABULOUS MUSIC OF:

- EXTENSIONS
- BLACK VERU
- OWEN STANLEY RANGERS
- BLUFF INN SOLES
- POLICE BAND
- AND MORE

ENTRANCE FEE: K4.00 ADULTS
K2.00 CHILDREN

TICKETS ON SALE: ALL BIG ROOSTER SHOPS, RED CROSS CENTRE, ABBEYLANE, P&B CHEUNG, VARIFORM BADILI AND AT THE GATE.

COME ALONG ENJOY THE GREAT MUSIC
"AND HELP SAVE A LIFE"
RED CROSS "PEOPLE HELPING PEOPLE"

Muaina haiskul sot long wara

OLGETA gret 7 na 8 sumatin long Muaina provinsal haiskul long Sinasina Distrik long hap bilong Simbu san i stap longpela taim na provins i stap nau long ples.

Dispela em long wanem san i stap longpela taim na i mekim olgeta wara long skul i drai na pinis.


Samting olsem 339 gret 7 na 8 sumatin i lusim skul na go long ples taim skul i painim dispela hevi long wara.

Nau yet ol gret 9 na 10 sumatin tasol i stap long skul. Long wanem taim bilong fainal eksam i kam klostu, na ol tisa i les long ol gret 9 na 10 sumatin long felim eksam bilong ol.

Samting olsem 270 gret 9 na 10 sumatin i stap nau long skul. Na ol tisa i tokim ol long waswas long wanpela liklik wara klostu long



• Sampela studen bilong Muaina haiskul long Simbu provins i sanap arere long bikpela teng bihain long skul. *Ol Foto: Michael Koma.*



• Ol tripela tisa bilong Muaina haiskul i sanap arere long wanpela bikpela teng bilong kisim wara bilong ren long skul.

skul. Dispela wara i pulap long pipia we i kam long ol manmeri husat i stap antap long dispela het bilong wara.

Ol tenk wara long haus bilong ol tisa tu i wok long pinis isi isi. San i stp inap long 12-pela wik nau.

Ol edministreta bilong haiskul i raitim pinis

wanpela pas i go long Simbu provinsal gavman long wokim wanpela wara saplai long skul. Dispela projek bai kos K15,000. Wanpela tisa long skul i tok dispela projek bai stat long narapela yia.

Long Juave Distrik, Karaweri haiskul tu i pas pinis long hevi bilong wara tasol.

Telekom menesa long Wewak indai

CHARLES MALENKI i raitim

DISTRIK telekom menesa bilong Wewak, John Pa'andreg i bin dai long las wik, Oktoba 5 bihain long em i sik.

Pa'andreg i gat 44 krismas, na em i bilong Andra ailan long Manus provins. Em i bin stat wok wantaim PTC long 1967. Na i bin wok long planti dipatmen bilong PTC taim em i stat wok.

Long 1988, em i wok olsem distrik Telekom menesa long Rabaul. Bihain long 1990 em i bosim PTC long Wewak. Em i holim dispela wok inap dispela yia.

Pa'andreg i marit na i gat 4-pela pikinini. Ol bai salim bodi bilong em i go bek long Manus long planim.

Ol pipel bilong Henganofi bai kisim K500,000 aninit long VDS program

SAPE METTA i raitim

OL pipel bilong Henganofi long Isten Hailans provins bai kisim K500,000 long kirapim wok bilong Viles Dvelopmen Sevis long neks yia.

Primia Robert Atiyafa i tokaut long dispela taim em i opim namba wan hap bilong wok long Duna Dumpu rot namel long Henganofi na Ramu.

Na em i askim tu tupela provinsal memba na nesenel memba, Viviso Seravo long bung wantaim presiden bilong Henganofi Kaunsil, ol meri, sios na bisnis lida long kamapim


wanpela grup bilong iukautim wok bilong dispela mani.

Atiyafa i tok ol i mas kamapim dispela Henganofi Dvelopmen Atoriti long ranim na brukim stret mani. Na em i skruim toktok olsem provinsal gavman i redi tu long givim mani long atoriti.

Em i tok dispela mani bai go long wok bilong stretim na wokim ol rot, skul, helt senta na edpos. Na dispela atoriti long Henganofi bai kamap olsem traim projek bilong ol arapela senta tu long bihainim.

Long dispela taim, primia i tok tu olsem Kainantu mas i gat wanpela eben atoriti long lukautim ol wok long Kainantu taun. Na givim gutpela sevis long ol pipel.

“Since advertising in the Yellow Pages we have increased our sales and service activity. When people ring after using the Yellow Pages, we know they are ready to buy.”



Ray Asi
Accountant
Daikin
176 calls POM
24 calls LAE in 16 weeks*

DAIKIN SALES, SERVICE & INSTALLATION OF AIR CONDITIONING AND REFRIGERATION SYSTEMS

FROM DOMESTIC TO LARGE COMMERCIAL COOLING P.N.G.

PORT MORESBY 25 1405
P.O. BOX 1394, BOROKO Fax: 25 3806

LAE 42 6952
P.O. BOX 2112, LAE Fax: 42 2638

ARCON ENGINEERING LTD.
Member of the Kenmore Group of Companies

*Calls are electronically metered through a dedicated survey telephone



yellow pages

P.O. Box 2311, Boroko. Fax: 25 6404

1993 Directory closes 20th November 1992

More business for your business!



PEOPLE ARE LOOKING FOR YOU IN THE YELLOW PAGES!

Salem

**GOVERNMENT WARNING
SMOKING IS DANGEROUS TO HEALTH**

**Give it
to me!**



trukai

**GIVE ME STRENGTH!
GIVE ME HEALTH!**





MANI
BILONG DUA:
K2

Wanpela bikpela fea tru long Papua Niugini bai kamap klostu...

OKTOBA 1992

Kam limlimbur long dispela PNG Made Fair na yu inap kisim laki tiket bilong winim wanpela nupela K35,000 haus.

WAIGANI SPOTS KOMPLEKS

Moa long 100 kampani na grup bilong PNG yet bai bung long soim ol kain kain samting em ol yet i wokim na save salim.

Kam na lukim mipela i wokim haus tupela taim long wanpela de, lukim mipela i wokim samting bilong yu long haus, mipela i putim ol kaikai yu laikim insait long ol karamap, baim wanpela nupela kaset o "T" siot long liklik prais, ol waia bilong hangamapim ol saket em mipela i wokim yet long PNG na yu inap winim wanpela nupela ka, ol kain kain nupela samting yu no save lukim bipo.

24
SARERE

25
SANDE

Taim yu baim tiket bilong go insait, yu bai kisim wanpela fri diskaun buk bilong yusim na kisim diskaun long ol kain kain liklik stua i stap insait.

Ol nambawan pawa ben bilong PNG bai pilai long Sarere na Sande wantaim.



Kam na lukim ol man i kalap long parasut na wokim stail long skai long Sarere apinun.

Dispela So bai op long Sarere: 10 klok moning i go inap long 6 klok apinun. Long Sande, em bai stat long 10 klok moning na pinis long 5 klok apinun.

Dipatmen bilong Tred na Industri
i amamas tru long sapatim dispela fea.



Kros long stapim wara saplai long Goroka taun

SAPE METTA i raitim

ISTEN Hailans provin-sal memba bilong Gahuku, Nelson Ipakio i no wanbel wantaim ol lain bilong em long ol tok ol i mekim long stapim wara saplai i go long Goroka taun.

Isten Hailans Kapital Atoriti i save givim K10,000 olgeta yia long ol pipel bilong Yaukave long Gahuku long dispela wara ol i save yusim. Na Ipakio laikim gavman long stap givim dispela mani.

Na em i laik dispela bodi husat i save kisim na yusim dispela mani long olgeta yia, Yaukave Developmen Komiti long givim ripot long we ol i bin yusim dispela mani.

Ipakio i tok em i sem long pasin ol lain bilong em i save mekim. Em i tok wara em wanpela samting God i givim

long olgeta pipel long yusim. Na ol pipel i mas tingim dispela na yusim. Em i no wanpela samting we ol yet i mekim.

Em i bin mekim dispela ol toktok bihain long ol pipel bilong Aratiufa i bin go long opis bilong ol lain long kapital atoriti na tok long stapim wara i go long taun. Bikos ol i no amamas long prais ol i bin kisim long Goroka so long las mun.

Long dispela taim, menesa bilong taun Henry Smith i go lukim ol lain ya na stretim tok wantaim ol. Isten Hailans kapital atoriti i bin kamap long 1990 bihain long ol papa-graun bilong 6-pela ples i bin kros nabaut na tok long stapim wara i go long Goroka taun.

30 yut long Wewak greduet long ranim ol yut grup

CHARLES MALENKI i raitim

NESENEL Yut Sevis (NYS) i bin lukim 30 memba bilong ol long Wewak i greduet long Sen Benedicts Tisa Koles long Fraide, Oktoba 9 bihain long 6-pela wik kos.

Dispela ol 30 lain ya, 27 man na tripela meri i bin kisim trening long wok bilong ol lida na we bilong ranim ol yut grup. Is Sepik Provinsal Yut Kaunsil i bin go pas long givim nem bilong 30 memba bilong em long kisim dispela trening.

Man husat i go pas long dispela trening, Peter Tasin i tok dispela em namba wan kain samting olsem long kamap. Ol lain ya bai wok aninit long NYS olsem ol komyuniti yut developmen opisa long wan wan eria bilong ol.

Na ol bai kisim K200 olsem poket mani long wan wan mun. Olpela seketeri bilong Dipatmen bilong Is Sepik, Vincent Maragau i givim setifiket long ol lain ya long soim olsem ol i stap insait long dispela 6-pela wik kos long lidasip na menesmen.

Em i bin tokim ol 30 yut memba ya long wok klostu wantaim dipatmen bilong em. Na bringim nupela tingting na mani i go insait long wok bilong ol yut long provins.

Ol politisen save paulim ol pablik mani - Ipakio

WANPELA politisen i tok mani bilong provin-sal gavman long yusim long kirapim ol wok long Isten Hailans na givim ol gavman sevis i save go long baim ol pablik sevan.

Memba bilong Gahuku konstituensi long Isten Hailans provin-sal asembli, Auwo Ipakio i tok dispela i mekim na ol pablik sevan i save kisim bikpela mani moa.

Em i tok long dispela as tasol na ol i bungim gen wok bilong provin-sal Polisi na Plening Seketeriet wantaim bilong Dipatmen bilong Isten Hailans.

Tasol em i tok sampela pablik sevan i yusim dispela sans long apim pe bilong ol yet i go antap namel long mak bilong Level 1 na 5. Na dispela mak i bikpela na ol i mas painim mani long sampela hap long kisim dispela mak.

Mista Ipakio i tok dispela wok senis long seketeriet i gutpela, bikos nau i no gat moa wok bilong ol dispela lain edvaisa na plena. Tasol long wankain taim, sampela sinia wokman bilong seketeriet apim pe bilong ol yet i go antap.

Ol meri Papua kisim yunifom long samapim yunifom

MESERY GUBAG i raitim

OL wimens kaunsil long olgeta rijon long Papua Niugini mas i gat wan wan yunifom bilong ol yet.

Dispela bai helpim long givim ol wanpela tingting long kamapim ol wok insait long rijon bilong ol na long kantri tu. Presiden bilong Papua Kaunsil ov Wimen (PCW), Dame Josephine Abaijah i bin mekim dispela tok long Mande Oktoba 5.

Em i mekim dispela tok taim Rotary Klub bilong Mosbi i givim wanpela masin. Sun Yau Entaprais i givim K500 na Rose Mojica i bin makim ol Filipino manmeri long Mosbi na givim wanpela rol laplap long PCW. Em i tok grup bilong em bai yusim dispela masin na laplap long samapim yunifom bilong ol.

Na ol bai putim long opim nesenel wimens polisi long Oktoba 29 long Sir John Guise Stadium long Mosbi. "Wantaim dispela K500, mi bai yusim long baim ol laibreri buk bilong tripela komyuniti skul long Milen Be provins. Mi laik givim tenkyu bilong mi i go long dispela tripela grup.



• Wally Moere bilong Roteri Klub long lephan i givim masin bilong gsamap i go long bos bilong ol Papua Wimens Rijonal Kaunsil, Dame Josephine Abaijah. Foto: Mesery Gubag

Yes! GOOD YEAR radials cut running costs!


Teio Ila (seen here with Boroko Motors Goodyear Port Moresby Manager Ola Ila) is a Commercial Fisherman from Hood Lagoon who has proved the value of Goodyear Radials.

"With frequent trips between Hood Lagoon and Port Moresby I do a lot of tough miles in my 4WD NISSAN and the tyres take a real beating.

A set of standard cross ply nylon tyres used to last me only 17,000 kilometres.

Now with Goodyear radials, I have already done over 25,000 kilometres and they're still only half worn!

That's a big saving on running costs "Thanks to Goodyear".



GOOD YEAR
G.33 RADIALS available from

BOROKO MOTORS
THE GOOD GUYS FOR BEST BUYS

PORT MORESBY: 255255 LAE: 421144 RABAU: 922777 KIMBE: 935566 MADANG: 822433 MT. HAGEN: 521433 HIGATURU: 297175



OL PAS SPESEL



Ol plisman na plismeri long Lae i no wok gut

Dia Edita,
Mi no amamas tumas long ol dispela biklain bilong plis fos. Ol i no save mekim gut wok bilong ol.
Dispela kain pasin i bikpela tru long Lae siti. Taim ol plisman na meri i save go wok long nait, ol i no save wok tru. Ol i save go giaman wok long wan o tu aua tasol na bihain go long disko o paul nabaut i stap. Olsem na ol meri bilong ol plisman, no ken bilip tumas long man bilong yupela.
I tru olsem wanwan gutpela papa na plisman i stap. Dispela em ol man bilong wok stret na karim nem bilong lo long Papua Niugini. Yesa, dispela ol lain em

ol taim bai stap long ol ples i gat hevi na helpim gut ol pipel.
I no ol dispela lain bilong go giaman karim sotgan na suvim tasol long nus na pes bilong ol man. Dispela em i no ol man tru bilong wok.
Dispela kain pasin i no kamap long ol plisman tasol. Ol plismeri tu i save giaman long go wok na sut i go pinis long disko, pati o dring bia nabaut. Na sampela i save go painim boipren bilong ol.
Ating yupela i no ol man ya.

Andicol Kay LAE

Ol Poroma na Mendi noken so op long Kimbe

Dia Edita,
Mi laik autim wari bilong mi i go long ol lain Poroma na Mendi husat i save wok long ol wem pam hia long Kimbe, Wes Nu Briten provins.
Taim bilong potnait, ol lain ya i save bilas nogut tru. Ol i save putim longpela trausis, aiglas, han was, kauboi kep na but ain su. Ol i save bilas olsem ol i wok

long opis stret.
Mi save lukim dispela pasin na mi no amamas. Mi save kisim bikpela sem tru long dispela kain bilas. Mi laikim ol long traim na senisim dispela kain pasin. Bikos ol i save bagarapim nem bilong mipela ol hailans.

Kore Mulipisa KIMBE

Ol Mosbi disko meri mas isi

Dia Edita,
Mi bilong Nipa long Sauten Hailans provins. Bel hevi bilong mi i pas long dispela kain pasin bilong ol disko meri long Mosbi. Long Buka na Rabaul we mi bin go stap, mi no lukim dispela kain pasin.

Tasol Mosbi i winim tru ol arapela hap. Bikos ol dispela lain meri i save soim ples klia olsem ol i disko meri. Namba wan samting ol bai mekim em long katim ol pangalgras, putim longpela han siot na longpela jin trausis na ol haikat su.

Dispela em wanem kain pasin nau em ol lain long Mosbi i laik mekim. Yupela laik traim long winim tru ol arapela o olsem wanem? Nogat sem bilong yu stret.

Aron Mul MOSBI

9-pela Sauten Hailans memba i mas sapotim Wingti gavman

Dia Edita,
Mipela ol Sauten Hailans i gat 9-pela nesenel memba na i luk olsem ol i no save wok bung wantaim.
I luk olsem yupela ol memba i laik kisim biknem tasol. Na yupela i no tingim ol lain manmeri long ples. Mipela i no makim yupela long stap olsem wanpela hap diwai long palamen.
Mipela makim yupela long kirapim wok long ples bilong yumi. Na yupela i bruk na wok wanwan olsem ol man husat i nogat save. Yupela mas sapotim ol PDM.
Mipela ol grasrut i save olsem lida bilong PDM, Paias Wingti inap long ranim dispela kantri.

J. Kapip Ale MENDI

Ekinabal painim Egimbari

Dia Edita,
Mi painim wanpela pren bilong mi.
Long taim tru mi bin lusim em. Na nau mi painim em. Nem bilong em Conny Egimbari. Na em i stap long sampela hap long Popondeta long Oro provins.
Sapos yu husat susa o brata i save long em, plis tokim em long rait long mi long dispela adres:

Jack Ekinabal P. O. Box 160 Maprik Is Sepik

Lotu em taim bilong tingim bikpela

Dia Edita,
Mi wanpela Kristen susa. Mi save lukim olsem long taim bilong lotu long Sande, planti yangpela manmeri i no save tingim Bikman na go long lotu.
Dispela kain pasin i no gutpela.
Maski sapos yu Kristen o yu no Kristen, Sande em i wanpela de tasol bilong yumi long lus tingting olgeta long ol arapela samting, na givim ona na biknem long God bilong graun na heven. Na yumi mas go lotu.
Ating yumi long Papua Niugini i mas tingim gut

dispela na lukim wanem helpim na gutpela samting God i givim long yumi. Em i kamapim yumi olsem ol gutpela pikinini bilong em, na givim yumi inap kaikai bilong stap laip.
Olsem na yumi olgeta i mas lukautim dispela de Sande i stap holi na givim ona na biknem long Em.
Planti traim i kamap nau long ol kain kain piksa bilong ol hevi, wari na pen nabaut.

Tina Kimon Gazawe GOROKA

Apim pe bilong ol wel pam

Dia Edita,
Mi laik autim wari bilong mipela ol wel pam groa hia long Wes Nu Briten provins.
Wari bilong mipela em long pe bilong wel pam. Stat

long 1983 i kam inap 1992, nogat senis i bin kamap long pe bilong wel pam. Mipela i wari tru long dispela. Bikos wok bilong wel pam i no isi. **Wel pam groa KIMBE**

Holim pasim ol bikhet pasindia long Kimbe

Dia Edita,
Mi stap long Kimbe taun. Mi laik autim wari bilong mi i go long ol pipel husat i save raun long ol PMV ka.
Planti taim mi save lukim ol pasindia i no bihainim lo bilong trafik. Dispela ol manmeri i save sindaun antap long sait bilong ka, hangamap long trela bilong ka, na sindaun antap long sel bilong ka.

Mi laik askim provinsal plis komanda na ol plisman long Kimbe long lukluk long dispela. Na mekim sampela samting long stapim dispela pasin.
Holim pasim ol pasindia husat i save mekim dispela kain pasin na mekim save long ol.

John Kore KIMBE

Wingti gavman mas tingim ol eks soldia

Dia Edita,
Plis givim mi hap spes long autim dispela bikpela belhevi bilong mi.
Mi wanpela pipiaman bilong Sandaun. Na wari bilong mi nau i sut long dispela "Ritrensmen Pe bilong ol Eks soldia".
Long luksave bilong mi, namba wan na tu grup i kisim mani bilong ol pinis. Na nau ol namba tri grup i wok long wetim yet mani bilong ol.

nogat. Olsem na mi laikim gavman tu long suvim nus na stretim ol dispela eks soldia.

Mi laik askim tu Sir Julius Chan long promis em i bin mekim long dispela yia. Insait long wanpela 'Tokbek' program bilong Redio Kalang, wanpela eks soldia i ringim Sir Julius na autim hevi long pe bilong ol eks soldia. Na long bekim bilong em, Sir Julius i tok sapos em i stap long gavman, em bai stretim dispela hevi hariap tru.

Tasol klostu krismas nau na nogat wanpela samting ikamapyet. Na dispela ol eks soldia i wok long traim hat na hangre i stap. Wanem taim tru bai yu pinisim wari bilong olsem yu bin promis long en pinis?

I kam inap long Septemba 7, narapela bilong ol dispela eks soldia gen i dai. Na mi no klia gen olsem nogut nau o tumora bai narapela mangan i pundaun. Olsem na yu mas hariap long stretim dispela wari na hevi bilong ol.

Mi laik tok tu olsem dispela ritrensmen mani i no bilong Difens Fos. Em i traihath mani bilong ol dispela eks soldia. Olsem na husat i gat nem long kisim dispela mani i mas kisim. Em i no mani bilong Difens Fos o bilong gavman.

J.T.A Tainex Wes Sepik

Wingti mas tilim wok minista long olgeta provins

Dia Edita,
Mi no amamas long Praim Minista Paias Wingti. Em i no givim wok minista long wanpela memba bilong Oro.

wok minista i go long olgeta provins. Olgeta provins i mas kisim wankain helpim long develop provins bilong ol.

Mipela ol Oro i gat tripela memba i stap long nesenel palamen. Tupela i stap long oposisen na wanpela i stap long gavman. Man i stap long gavman em rijonel memba Silvinas Siembo.

Edtih Namus POPONDETA

Mi gat belhevi bikos Wingti i no skelim gut wok minista long olgeta provins. Sampela provins i gat tu o tripela minista mipela sampela i no gat minista. Olsem na mi askim praim minista long skelim gut

Husat i laik salim pas i kam long edita i mas raitim stret nem na adres bilong yu. Na salim i kam long dispela adres: Edita, Wantok Niuspepa, P. O. Box 1982, BOROKO, N.C.D.


Mekim Musik program bilong EMTV save pilaim ol musik bilong waitman tasol, na PNG nogat

Dia Edita,
Mi wanpela manki Papua Niugini na mi save amamas long lukim pasintumbuna bilong mipela.
Tasol wanpela samting mi lukim i no stret. Olsem na mi laik komplén. Mi laik autim wari bilong mi i go long ol lain i save go pas long musik program bilong "Mekim Musik" long EMTV.
Mi laik save olsem dispela program

em i bilong pilaim PNG musik o bilong ol? Long lukluk bilong mi, yupela i wok long putim planti waitman musik.
Traim na givim sans long ol musik manmeri bilong dispela kantri. Na maski long kamapim nem bilong ol lain bilong arapela kantri.

Michael W RABAU





Amamasim 25 yia olsem King...King o bikman (saltun) bilong Brunei bilong Yurop i tromoi han long ol pipel long amamasim 25 yia bilong em olsem bos bilong ol. Em i wanpela risman stret na bikpela mani bilong kantri bilong em i save kam long wel.



Sapot ausait long kalabus...Ol meri Palestain i bing ausait i protes ausait long haus kalabus bilong Isrel. Ol i sapotim ol man bilong ol husat i protes na les long kaikai long haus kalabus. Ol i laikim gutpela kaikai na ples bilong slip.



Senisim ol man...Wanpela soldia bilong Sebia i sanap was long ol Muslim refuji long Vlasik, not Bosnia long taim ol i senisim ol lain bilong ol wantaim ol refuji bilong Muslim.



Kisim pen bilong ol narapela...Wanpela woka husat i no wanpela yunien memba i kisim mekim save taim ol i laik kam toktok long ol yunien memba long taim ol i protes long Rom. Bihain ol raiot skwat plisman i kamap na brukim dispela protes.

LAE'S NO.1 USED CARS

PNG MOTORS

"NO. 1 CAR OF THE WEEK"

Nissan Patrol

Coffee Body Diesel,
12 MTHS Registration,
Excellent Condition,

Price **K10,500.00**

USED CARS AT BARGAIN PRICES

NEXT WEEK SALES

Mazda Ezy Loader - K4,990.00
Big 1.5 Tonne Payload - Choice of 3 From...

Mazda T3500 K8,990.00
SWB Truck, Fully Reconditioned, Price...

Daihatsu Delta 2 K7,990.00
Tonne Truck- Diesel Engine, Ready To Work

Toyota Dyna K7,500.00
3 Tonne Diesel Truck, Choice of 2 From...

ISUZU KB Ute K7,500.00
Diesel 4x4, Coffee Body, Price.....



PNG MOTORS

This weeks special apply to PNG MOTORS-LAE only

MS PNGM

Ol Tari mas lainim long Sanapim pablik toilet long Mendi taun riskpektim ol arapela

Dia Edita,
Mi laik autim tingting bilong mi long sampela bikhet pasin em ol Hailans i save mekim. Dispela em long pasin bilong rispek.
Sori long mi kolim biknem Hailans. Wanwan Hailans em ol gutpela lain. Em planti i save bikhet long stail bilong tumbuna bilong ol, nabagarapim kantri. Mi toktok long pasin bilong rispek.
Ol dispela lain i no save olsem mipela Papua Niugini i kisim independens long 17 yia i go pinis. Tasol ol i bihainim longlong pasin yet.
Ol namba wan kain stret em dispela toktok i sut long ol em ol Tari.
Ating ol tumbuna bilong Tari i mas ol

kau long tru ya.
Traim na rispektim ol arapela manmeri. Kain pasin bilong yupela long katim namel long tupela man na i no tok sori, ol bikmaus nabaut i no gutpela tru.
Dispela kain pasin i save kamap long Godens maket long olgeta de.
Yupela save sem tu o nogat.
Mi tokim yupela stret olsem yupela tasol i bagarapim gutpela nem bilong ol arapela Hailans.
Yupela mas traim long lainim long rispek. Dispela em wanpela we tasol long senisim longlong pasin bilong yupela.

John Kon GOROKA

Dia Edita,
Mi wanpela manki bilong Westen Hailans, tasol nau mi stap long Mendi, Sauten Hailans provins. Mi askim provinsal memba na Mendi Taun Kaunsil long kamapim wanpela pablik toilet long Mendi taun.
Sapos yupela ol bikman i go long ol arapela biktaun long Papua Niugini, bai yupela lukim kain gavman sevis olsem pablik toilet i stap. Olsem wanem na

Mendi nogat.
Long Mendi ol manmeri na pikinini i save pekpek long ol liklik bus arere long taun. Bikos i nogat toilet.
Mendi em biktaun na provinsal hetkwata bilong Sauten Hailans. Olsem na kirapim kain pablik sevis olsem toilet.

John Aika MENDI

Shut Down ben mas tingting gut na raitim singsing

Dia Edita,
Mibilong Sauten Hailans provins. Mi laik sapotim wanpela pas i komplem long Shut Down ben bilong Rabaul.
Dispela em long wanpela singsing ol kolim "Wewak i paia"

"Wewak i no paia olsem ol i singim long kaset bilong ol"

Yu husat i raitim dispela singsing i mas tingting gut pastaim, bipo yu putim ol toktok long singsing.

No ken raitim ol kain singsing long bagarapim nem bilong wanpela provins o ples.
Ating neks taim Shut

Down i mas kolim stret nem bilong wanem samting em ikukim olsem ol pik, dok, manmeri o ol haus.
Ol Tolai na Sepik em mipela wankain.
Raymond Kapi MENDI

Ol singelman nogut o?

Dia Edita,
Mi laik toktok long stilpela pasin sampela meri i save mekim. Ol save sikirap long mani na raun wantaim ol maritman. Na taim maritman i givim bel na lusim ol, ol bai stap i go na traim laik long ol yangpela man gen.
Yupela ol dispela kain meri, maski go na kilim yupela yet.
Yupela mekim na yangpela man bai hatwok long lukautim pikinini bilong yupela gen.
Yupela save sem tu o nogat.
Samting yupela sikirap long ol ekspiriens maritman, na nau yupela painim taim. Mipela ol yangpela man nogut ya.
John Komo MOSBI

Maski raun nating long Boroko olsem ol drainman



Ol meri i mas tingting gut na raun amamasim ol yet wantaim ol man

Dia Edita,
Mi laik toktok long pasin sampela yangpela meri insait long kantri i save mekim. Dispela em long pasin bilong paul nabaut wantaim ol man.
Yupela ol meri mas lukautim bodi bilong yupela gut. Em i gutpela long pilim amamas long holim pasim narapela man. Tasol sapos yu gat tingting na lukautim bodi long dispela taim, em i gutpela. Tasol tingting long ol hevi bilong bihain taim, sapos yu no lukautim gut bodi.
Mi toktok long bel. Sapos yupela i bel na poroman i redi long maritim yupela, em i gutpela. Tasol sapos ol i ting dispela em bel bilong narapela man, bikos yupela raun wantaim planti arapela man, mi sori tru long yupela.
Mi no komplem. Olsem amamas bilong yupela. Mi tingting tasol long amamas bilong yupela. Olsem na mi tokim yupela.

William Semi Wewak

Temo mas joinim Wingti gavman

Dia Edita,
Mi wanpela man bilong Kalano insait long Imbongu ilektoret. Mi wok na stap nau long Rabaul, biktaun bilong Is Nu Briten provins. Mi laik autim sampela tingting long memba bilong Imbongu, na lida bilong Pipels Eksen Pati (PAP), Antony Temo.
Mi save olsem memba i mas yusim bikpela mani long kisim ol lain bilong em i go long joinim gavman bilong Rabbie Namaliu. Tasol planti lain i ranawe long PAP, na i go joinim Wingti. Na dispela i helpim tu Wingti long kamapim gavman.
Mi askim memba nau long lusim oposisen na go joinim Wingti.
No ken kisim nem nating olsem yu namba tu oposisen lida.
Mi bilip yu save olsem developmen em bikpela samting long laip bilong ol pipel. Olsem na yu mas tingim dispela na joinim Wingti.
Mi tok olsem long makim maus bilong ol Imbongu pipel.

Jeffrey Misimi RABAU

Redio Wewak mas stapim ol nius long Motu

Dia Edita,
Mi wanpela manki bilong Is Sepik provins. Mi no amamas long kain pasin bilong ol wokman na wokmeri bilong Redio Wewak.
Ol i save larim nius long Motu i kamap long redio stesin. I luk olsem ol i laik tanim mipela ol Sepik i kamap o Papua ya.
Mi bilip planti manmeri long ples i no amamas ong kain pasin Redio Wewak i save mekim

Peter Jaco WEWAK

Oro gavman kisim moa takis

Dia Edita,
Mi wanpela manki Popondeta insait long Noten provins. Mi gat liklik komplem long mekim.
Gavman bilong mipela i wok long kisim kainkain takis. Na nau ol i askim papa bilong ol PMV long baim takis i go long provinsal gavman.
Mekim na ol papa ya i apim tru pe bilong ol PMV.
Mi lukim olsem dispela i no stret tru. Gavman i kisim kain kain takis long ol pipel, na ol dispela mani i go we? I nogat wanpela gutpela developmen i kamap long Oro provins.
Ol rot insait long 4 kona taun bilong Popondeta em ol kolta i bruk nabaut.

Ol bikman i draivim ka antap long ol dispela rot na lukim pinis ol dispela bagarap, tasol ol i no mekim wanpela samting.

Marcus Wari POPONDETA

Mani tok na ol yangpela meri save sikirap long ol maritman

Dia Edita,
Mi bilong Sauten Hailans provins. Mi laik egens pas bilong Raymond Babs. Pas bilong em i bin kamap long Ogas 6, 1992.
Em i tok ol yangpela meri i save seksek tasol long mani wantaim ka na gutpela haus. Olsem na ol i save raun o prenim na bihainim maritim ol maritman.

Raymond i tok ol yangpela meri i mas raun wantaim ol yangpela man. Na lus tingting long ol maritman.
Mi laik bekim olsem dispela em wari bilong yupela ol yangpela man. Yupela ol yangpela man i nogat mani na ka bilong pulim ol meri.
John Aika MENDI

Samana em top Morobe lida

Dia Edita,
Mi wanpela man bilong not kos bilong Noten provins. Liklik ples bilong mi stap long Aure Blu maunten. Tasol mi stap long Lae siti long 14 yia olgeta nau.
Mi laik toktok long wanpela nambawan lida bilong Morobe provins, Utula Samana. Mi ting em bai stap yet long palamen, na wanpela taim bai em i kamap praim minista.
Planti saveman na manmeri i bilip olsem sapos Samana i stap yet, em inap long kamap namba wan man Morobe long kamap praim minista. Bikos em i wanpela top saveman.
Long 1992 ileksen em i lusim sia bilong Morobe Provinsal. Na mi ting em planim kaikai nau long gaden long asples bilong em. Tasol nau em i kisim

wanpela bikpela wok long palamen naus.
Em i wok olsem edvaisa o saveman bilong givim gutpela tingting, bipo ol bosu mekim tokorait.
Mi laik tok nem bilong Samana i no dai yet. Em i stap yet.
Ol manmeri bilong Morobe i no luksave long wanem helpim em i givim olsem primia bilong provins long longpela taim, na bihain em i go insait long palamen.
Samana em i wanpela trupela saveman bilong Morobe. Na tu em i holim ki bilong Morobe na Papua Niugini wantaim.
Tenkyu.

J.G. Doruba LAE



Wantok toksave

Paura bom i no gutpela long kilim pis long wara

Dia Edita,
Mi laik autim belhevi bilong mi i go long ol lain husat i save yusim paura bom long kilim pis long solwara.
Mi no amamas long lukim ol lain i stap long nambis i yusim paura bom long painim pis. Dispela pasin bilong kisim pis i no gutpela, na em bai bagarapim ol samting bilong solwara.
I gutpela sapos ol pipel i yusim umben long kisim pis. Dispela em wanpela gutpela rot bilong kisim pis. Na

em i no inap kamapim planti bagarap long ol samting bilong solwara.
Mi save ol pipel i laik yusim paura bom. Bikos em i wanpela isi we long kisim pis. Taim ol man i yusim dispela paura bom, ol i kilim olgeta pis i stap long dispela hap eria. Na ol i no save kisim olgeta pis. Na dispela i bagarapim ol arapela pis.
Olsem na yupela mas lusim dispela pasin
Daniel Megusaie KAVIENG

Mendi taun no gat toilet

Dia Edita,
Mi wanpela manki Westen Hailans tasol nau mi stap long Sauten Hailans provins.
Mi laikim askim provinsal gavman na Mendi Taun Kaunsil long wokim wanpela pablik toilet. Nau yet mi no lukim wanpela toilet i stap long taun na ol man i ken yusim.
Mi lukim olsem dispela em i wanpela bikpela samting, taun kaunsil i no wokim. Kaunsil i mas wokim ol kain liklik sevis long helpim ol pipel.
Yupela ol lain husat i save go pas long Mendi Taun Kaunsil i mas lukluk long dispela samting na wokim wanpela toilet hariap. Nau yet mi save lukim planti pipel i yusim ol bus i stap klostu long taun olsem toilet. Mi ting dispela i no gutpela long helt bilong ol pipel i stap long taun eria.

John Aika MENDI

Gavman i mas hepim ol kam man long blok

Dia Edita,
Mi pikinini bilong wanpela papa bilong Blok long Wes Nu Briten. Mi laik autim wari bilong mi.
Taim papa mama bilong mi i kisim Blok long Wes Nu Briten, mama i karim mi tu long dispela taim. Na mi ting olsem mi bilong Wes Nu Briten. Nau yet mi save kolim mi yet olsem wanpela manki Wes Nu Briten.
Tasol nau mi harim ol asples i tok long rausim ol lain i stap long Weraman Blok. Ol i laikim ol dispela pipel i go bek long provins o ples ol i kam long en.
Tasol mi ken tok stret olsem mipela i no gat ples ken long go. Sapos mipela i go bek long ples bilong mipela, ol lain long ples bai no inap amamas. Bikos mipela i no go liklik long ples, na i no save long graun bilong tumbuna bilong mipela.
Taim mama i karim mipela, ol i save stori tasol olsem mipela bilong dispela provins o ples. Tasol mipela i no go liklik long ples.
Olsem na mi askim gavman long helpim mipela na stretim dispela wari namel long ol asples na mipela ol lain i stap long Blok.

Andrew Mathew BIALLA

Ol pater no ken yusim nem bilong God papa long ileksen

Dia Edita,
Mi laik komplem long sampela wokman bilong misin husat i save sanap long provinsal na nesanel ileksen.
Long taim bilong ileksen, mi save lukim ol pasto na pater i sanap long ileksen. Na ol i save yusim nem bilong God papa long kempen raun long ol ples.
Dispela i no gutpela. Sapos yu laik mekim olsem, yu mas wokim wok bilong God. No ken yusim kain nem sapos yupela i laik resis long ileksen.
Wok politik i no wankain olsem yu mekim wok bilong God. Politik em narapela samting olgeta. Traim na yusim het bilong yupela. Nem pasto o pater i no pilai nem. Dispela em nem bikman i luksave olsem ol dispela lain em ol wokman bilong em.
Sapos yu husat brata i save wokim dispela pasin, mi askim yu long lusim.

Kemen Kopen WABEG

Gavman mas redi wok na bihain kisim takis

Dia Edita,
Mi no amamas long Praim Minista Paias Wingti. Em i no givim wok minista long wanpela memba bilong Oro.
Mipela ol Oro i gat tripela memba i stap long nesanel palamen. Tupela i stap long oposisen na wanpela i stap long gavman. Man i stap long gavman em rijonel memba Silvinas Siembo.

Mi gat belhevi bikos Wingti i no skelim gut wok minista long olgeta provins. Sampela provins i gat tu o tripela minista mipela sampela i no gat minista.
Olsem na mi askim praime minista long skelim gut wok minista i go long olgeta provins. Olgeta provins i mas kisim wankain helpim long develop provins bilong ol.
Edtih Namus POPONDETA

Rausim pasin bilong wantok sistem long Ok Tedi main projek

Dia Edita
Mi wanpela manki Kiunga, tasol nau mi stap long Tabubil insait long Westen provins.
Liklik komplem bilong mi i go long ol bos na foman husat i save wok long Ok Tedi kampani.
Mi lukim olsem dispela ol bos na fomen i save kisim wantok bilong ol tasol long go long trening. Na tu ol i

save givim promosen i go long wantok bilong ol tasol. Ol i no tingting long ol man bilong narapela hap husat i wok wantaim ol.
Wantok sistem i no wanpela gutpela samting. Olsem na kain pasin olsem bai i nap tru long kamapim wanpela gutpela samting.
J K Gari TABUBIL



Kisim gutpela sindaun long pikinini bilong yu

Yu save lukautim gut pikinini bilong yu. Nau yu mas tingting tu long givim gutpela sindaun long pikinini long bihain taim.
Olsem yu mas opim pasbuk akaun wantaim Nambawan Haus Moni bilong yumi. Stat nau long sevim moni long

peim skul fi, baim ol buk bilong skul na givim gutpela sindaun long pikinini nau bai em i kamap strong.
Askim nau ol wokmanmeri long PNGBC long opim wanpela pasbuk akaun na ol arapela sevis em yu laikim.
Mipela ken halivim famili bilong yu kisim gutpela sindaun long bihain taim... emi tru!



PAPUA NEW GUINEA BANKING CORPORATION

WANTOK BISNIS LONG PAPUA NIUGINI WANTOK

KOPRA

Pe bilong kopra i go antap nau long K30 long wan wan tan long dispela yia. Pe bilong ol bikipela depo olsem Mosbi, Alotau, Lae, Madang, Wewak, Kavieng, Toboi, Kimbe na Kieta i stap olsem:

	Smoke	K263
	F.M.S	K265
	Hot Air	K268
Na pe bilong kopra long ol liklik depo i stap olsem:		
SAMARAI	Smoke	K231
	F.M.S	K233
	Hot Air	K236
KANDRIAN na NAMATANAI	Smoke	K228
	F.M.S	K230
	Hot Air	K233
BUKA	Smoke	K227
	F.M.S	K229
	Hot Air	K232
FINSCHHAFEN	Smoke	K223
	F.M.S	K225
	Hot Air	K228
LORENGAU	Smoke	K198
	F.M.S	K200
	Hot Air	K203
KEREMA	Smoke	K218
	F.M.S	K220
	Hot Air	K223
KARKAR	Smoke	K200
	F.M.S	K202
	Hot Air	K205

CMB nau bai i no inap long kisim moa prais sapot long Gavman. Dispela i stat long Janueri 1, 1992

KAKAO

PRAIS bilong drai kakao long wanwan tan long Rabaul long Mande inap long Fraide long las wok

Mande	Tunde	Trinde	Fonde	Fraide
5:10	6:10	7:10	8:10	9:10
Pe ol baiya sasim long papa bilong fementri				
K709	K729	K731	K738	K711
Sapot prais				
K455	K455	K455	K455	K455

Prais ol papa bilong fementri i kisim

K1164	K1184	K1186	K1193	K1166
-------	-------	-------	-------	-------

Sapot prais bilong kakao long dispela mun em K628 95. Dispela prais i no wankain olsem pe bilong kakao long ol narapela hap bilong kantri.

KOPI

Pe bilong drai arabika na robusta kopri long wanwan kilogram long Sept 21, 1992. Dispela i karamapim prais bilong kopi long drai bilong faktori, na i no long sait bilong ol:

Arabika:

Kanantu	K100 to 108
Goroka	K100 to 103
Minz na Banz	K0.86 to 90
Hagen	K0.85 to 86
Lae	NQ
Mumeng	NQ
Wau Bulolo	NQ
Madang	K0.75

Oi ripot i kam long Kopi Industri Kopresen. Mipela i no kisim ripot bilong Kundiawa, Wapenamanda, Mendi, Erap, Aseki, na Wasu.

Robusta:

Is Sepik	K0.50 to 65
Madang	K0.50

Ripot bilong ol arapela senta husat i save groim robusta kopi i no kamap.

RABA


Gaven faktori (ESP) - 211/kg
Doa faktori (Sentrel) - 36 t/kg inap long 39t/kg

KADAMON

Prais bilong kadamon em A. T. Agri Ejensi Pty Ltd long Madang i tok aut long en i stap olsem; Draip long san em namel long K0.80 na K1.10. Draip long faktori em namel long \$6.50 na \$8.00. A. T. Agri i lukautim Kobum Spice em i stap long Bundi we planti ol kadamon i save kam long en.

PRAIS BILONG OL BENSIN

Kos long wanpela lita Ex Pump (Wantaim takis)	
Petrol	51.9 toea
Disil	38.8 toea
Kerosin	43.0 toea



Hailans rijon kaunim ol sipsip

SAPE METTA i raitim

Bihainim plen bilong kamapim na salim sipsip mit long PNG

WANPELA bikipela wok bilong kaunim wanpela abus ol i kolim sipsip insait long Papua Niugini bai stat nau long lsten Hailans provins. Ol saveman bilong sipsip husat i stap long Goroka bai go pas long dispela wok bilong kaunim sipsip.

Ol saveman bai go tu long ol arapela Hailans provins long mekim dispela wok. Na bihain bai ol i go raun long ol arapela provins insait long kantri long mekim wankain wok.


Askim i go long ol niusman na agrikalsa opisa bilong Simbu long wok bung

ASKIM i go nau long ol agrikalsa ekstensen opisa na fil asisten insait long Simbu provins long wok bung wantaim Simbu Media Yunit o ol niusman insait long provins.

Wanpela sinia tisa bilong Hailans Agrikalsa Trening Institut, Mr Mckenzie i laikim ol agrikalsa opisa long givim tingting na aidia bilong ol long wok didiman i go long Media Yunit insait long provins. Na ol lain bilong provinsal Media Yunit i ken wokim ol samting long skulim ol pipel bilong ples long ol agrikalsa wok.

Em i bin givim dispela toktok long taim bilong tupela de woksop o skul em i bin kamap long Gumine. Mckenzie i wokim ol dispela toktok taim em tok klia long wok bilong ol samting olsem posta long dispela tupela de skul bilong lukautim graun.

Mckenzie i tok ol samting olsem posta em i wanpela strongpela samting long givim toktok long ol man bilong ples long wokim ol samting gut. Em i tok sapos ol i wokim kain samting olsem posta, orait ol i mas yusim gut long skulim ol lain bilong ples.



Elias Kerenga, wanpela volunta woka wantaim Simbu Media Yunit i soim sampela buk em ol i kamapim olsem ol ekstensen samting bilong ol manmeri long ritim na save. *Poto na stori: Michael Koma.*

long Goroka, Baniva Favila, bai go pas long dispela wok bilong kaunim sipsip. Na dispela em i namba wan taim long kain wok i kamap long PNG.

Mista Favila i bilong Lufa insait long lsten Hailans yet. Em i bin go stadi long Nu Silan long wok bilong lukautim ol sipsip. Na tu em i kamap namba wan nesenel menesa bilong Menifo sipsip stesin long lsten Hailans.

Nau yet em i wok olsem provinsal laipstok kodineta bilong lsten Hailans provins. Em i bin holim

wanpela woksop wantaim sipsip opisa bilong ol arapela Hailans provins husat bai mekim wok bilong kaunim sipsip.

Em i tok bihain long ol i mekim dispela wok, ol bai painimaut long hamas sipsip olgeta i stap insait long kantri.

Em i tok tu olsem bihain long dispela wok, ol bai kamap wantaim sampela kain plen long developim ol sipsip projek. Na tu ol bai kamapim wantaim polisi bilong salim mit bilong sipsip.

Mista Favila i tok nau yet insait

long ol Hailans provins, planti manmeri i save laikim mit bilong sipsip.

Em i tok planti manmeri long Hailans i laikim mit bilong sipsip long wanem em i no kos bikipela mani long baim.

Favila i tok em i taim nau gavman i mas putim stap long baim mit bilong sipsip long Nu Silan, na kamapim wanpela nesenel polisi long mit bilong sipsip. Na tu gavman i mas statim wanpela industri bilong mit bilong sipsip long Papua Niugini.

Is Sepik kisim ripot long pulim moa turis

CHARLES MALENKI i raitim

IS Sepik Turis Bod (ESTB) i kisim pinis wanpela ripot tok-save long wanem samting ol pipel bilong provins inap long mekim long pulim ol turis i go long hap.

Kinhill Kramer na Nesenel Turisim Developmen Koperesen i bin mekim dispela wok painimaut. Na givim i go long bod long Mande, Oktoba 12. Ripot i karamapim ol plen bilong kirapim wok bilong turisim long provins.

Namba tu siaman bilong ESTB, Paul Hukahu i tok dis-

pela ripot bai helpim ol gut tru. Bikos em i mekim klia olgeta samting we i karamapim wok turisim insait long provins.

Na em i soim ol kain kain samting ol pipel inap long mekim long pulim ol turis i kam. Na mekim Is Sepik olsem wanpela turis provins. Long dispela taim, presiden bilong Semba ov Komes long Wewak, Valentine Kambori i tok dispela mov bai helpim ol lokal bisnis long groaa.

Na em bai askim ol pravit na bisnis ejensi long wok bung wantaim. Na kamapim kaikai bilong dispela ripot long mekim turis industri wok insait long provins.

Niugini Beverages bung long amamasim gutpela wok bilong em

NIUGINI Beverages long las wik i bin holim wanpela bung bilong amamasim tupela samting em kampani i wokim. Niugini Beverages i save wokim SP bia na ol sofdring loliwara olsem Pepis Cola, Mirinda, Schweppers, Daisy na F&F.

Long tupela yia bilong em long wok long nupela faktori long Badili, em wokim moa long wan milien katen sofdring namel long wanpela yia tasol. Kampani i kisim tu Pepsico awot long wokim gutpela sofdring we i wankain olsem bilong ol arapela kantri long wol.

Jenerel menesa bilong Niugini Beverages, Anthony Blum i tok em i amamas tru olsem

kampani i kisim dispela kain luksave. Ol kain kain sofdring i stap long laisens bilong Pepsi Cola na Keith Harris em ol i wokim long faktori i gutpela, na i wankain olsem ol i save wokim long ol arapela kantri.

Blum i tok Niugini Beverages i bin tingting long wokim nupela sofdring faktori long 1990. Ol i bin kamap wantaim dispela dispela tingting bihainim tasol strongpela tingting bilong SP Brewery long wokim bisnis yet long Papua Niugini. Na ol i luksave olsem ol i mas wokim wanpela faktori long helpim bikipela namba bilong ol kastoma.

Mani bilong Lotto laki bai stap long kantri- Diro

OLPELA rijonel memba bilong Sentrel provins, Ted Diro i tok mani em Lotto Pty Limited laki kampani i kamapim bai stap insait long kantri.

Diro em wanpela dairekta bilong Lotto Pty Limited.

Em i mekim ol dispela toktok long bekim ol niuspepa ripot bilong tupela laki kampani ya, Lotto Pty Limited na Lotary Management Services. Na tu long toktok bilong hap kontrakta bilong Lotto Pty Limited long Amerika,

ITS Service Corporation. ITS em i wanpela bikipela laki kampani husat i ranim ol bikipela laki ples olsem long Royal Hong Kong Joki Klub, Nu Saut Wels Roteri na planti arapela laki bisnis nabaut.

Ol dairekta bilong Lotto Pty Limited em Diro na meri bilong em Veitu, oipela plis minista Mathias Ijape, Brown Sinamoi na Terry Cawly.

Diro i tok Lotto Pty Limited bai bringim gutpela samting long

- PNG. Sampela bilong dispela em;
- prais bilong dispela resis bai kamap insait yet long kantri. Bikos ol lain PNG yet i papa long kampani;
- win mani bilong ol wok bai stap insait yet long kantri;
- lotto resis bai kamap long PNG, na i gat ol saveman na mani bilong mekim ol wok;
- nesenel na ol provinsal gavman i ken baim dispela kampani bihain long tripela yia;
- kampani bai givim wok long 500

manmeri; na
• 10 pesen bilong olgeta win mani kampani i wokim bai go long provinsal gavman olsem takis.

Em i tok namba wan nesenel dro bai kamap long mun Novemba. Na long olgeta wik bai i gat ol resis.

Diro i skruim tok olsem bihain long namba tu wik bilong wok, ol bai givim prais inap long mak bilong K10 milien. Na kos bilong dispela bai winim K10 milien.

WANTOK

BISNIS LONG PAPUA NIUGINI

WANTOK

Ol lokol tred stua long Kerowagi bungim hevi

OL Esia kampani i no resis long gutpela we egens papa bilong ol tred stua long Kerowagi, Simbu provins. Membablong Kundiawa na Gembogi na lida bilong Blek Eksen Pati, Joseph Onguglo i tokaut long dispela long dispela wik.

Mista Onguglo em Sedo Minista bilong Tred na Industri long oposisen. Em i kisim pinis wanpela leta em papa bilong ol stua i raitim long Septemba 18, na salim long em.

Dispela leta i tokaut long tupela bikpela wari:

- Planti mani i kisim dinau long beng na sanapim stua bilong ol. Tasol ol lain long ovasis i yusim sampela lokol pipel olsem namba tri pati, na sanapim tu stua bilong ol. Na dispela i bagarapim sans bilong ol lokol bisnis long groa.

- Planti manmeri na pikinini i ken kisim sik. Bikos ol mit bilong bokisais

em ol i save salim ausait long baksait bilong ol ka, we i nogat ol stretpela karamap antap long en. Ol mit bilong bokisais i save bagarap hariap sapos i stap ausait.

Mista Onguglo i tok komplek bilong ol lokol papa bilong stua i soim stret olsem ol ovasis lain i bagarapim mipela.

"Tred stua na ol liklik stua bilong salim kuk kaikai em ol kain bisnis we ol manmeri bilong Papua Niugini tasol i ken mekim. Gavman i mas lukautim ol dispela bisnis, na stapim ol ovasis lain long go insait long en."

"I luk olsem gavman i no putim was long dispela. Mi askim strong nau long kamap gen bilong NIDA bod long lukim olsem ol bisnisma long ovasis i no ken toktok stret wantaim ol minista na Mema. Bikos dispela kain pasin i kamap nau," Onguglo i tok.

Ol hailans bisnisan bai save nau long ranim bisnis

KLOSTU bai ol liklik bisnisan long Hailans rijn i save nau long lukautim naranim gutliklik bisnis bilong ol.

Smol Bisnis Developmen Koperesen bai karimaut wanpela wan wik kos long ol dispela lain. Dispela em long skulim ol manmeri long stretpela we bilong ranim bisnis.

Dispela woksop bai i kamap long Hagen, Westen Hailans provins long Oktoba 19 i go inap long 23.

Woksop ya i kamap aninit long het toktok bilong kirapim bikpela ol liklik bisnis stat long 1990 na i go. Ol bisnisan na meri husat ilaik stap insait long woksop i ken baim K50 fi.

Askim i go tu long ol lain husat i gat tingting long kamap bisnisan long stap insait long woksop ya.

Ol samting bilong toktok long woksop em long plenim na statim wanpela liklik bisnis, bikpela wok bilong lukautim mani na rot bilong kisim dinau mani long ol bisnis beng.


Kere bekim hatwok bilong Invesmen Koperesen long baim skul fi

KEVIN KERE i bin wok wantaim Invesmen Koperesen bilong Papua Niugini long wanpela as tasol. Dispela em long bekim dinau.

Long 1970, em i bin stat skul long Pinu Komyuniti skul long Bereina long Sentral provins. Na bihain em i go long larowari haiskul. Long 1971 i go inap long 1972, em i go long Sogeri nesenel haiskul. Bihain em i lusim ples na i go long Yunivesti ov Teknoloji long Lae.

Kevin i stori: "Mi bin go long hap long stad long wok bisnis. Long dispela taim, gavman i save givim Australia dola olsem poket mani. Na mi save painim hat tru long baim klos na ol liklik samting olsem sop. Olsem na mi go lukim wanpela tisa bilong mi. Na mi bin toktok wantaim em.

"Mitupela toktok i go na mi askim sapos em i save long ol kampani nabaut husat i laik baim skul fi na lukautim ol studen. I no long taim em i tokim mi olsem wanpela nupela bisnis 'Invesmen Koperesen'



• Mista Kere (lephan) i sanap harim las toktok i kam long Menesing Dairekta bilong Invesmen Koperesen, Miria Ikipu long bod rum bilong ol. Dispela em long Fraide Oktoba 9. Poto na stori: Mesery Gubag.

i laik mekim olsem.

"Mi rait tasol. Long dispela taim mi bin amamas tru. Bikos dispela em wanpela nupela bisnis. Na ol i soim olsem ol i gat bliplong mi. Na ol i redi tasol long lukautim mi long sait bilong skul fi na poket mani. Dispela em long 1973.

"Long 1975 mi greduet. Mi inap long go wok wantaim sampela lain. Tasol mi bin tingting gen. Bikos mi bin lusim ples na go skul. Na Invesmen

Koperesen i bin lukautim mi na baim skul fi na givim poket mani.

"Olsem na mi pasim olgeta tingting long wok wantaim Koperesen long soim tenkyu bilong mi. Na mi bin stat olsem asisten invesmen analisis (namba tu bilong sekim ol mani na bisnis bilong koperesen)."

Long 1980 bos i promotim em alsem asisten akaunten wantaim fainens divisen bilong koporesen. Faivpelayia

bihain long 1985, ol i givim em wok bilong Koperet Akaunten. Na long 1990 em i kamap Projek Akaunten. Na em i bin holim dispela wok i kam ina; em i pinis long las wik.

Kevin i gat 42 krismas. Em i marit long wanpela meri bilong Saidor long Madang, na i gat 4-pela pikinini.

"Nau bai mi go sindaun na malolo na mekim sampela liklik wok. Mi lusim wok long sait bilong helt bilong mi," Kevin i tok.

Amerika tingim 10-pela yia volentia wok long PNG

DISPELA yia em i namba 10 yia bilong Yunaited Stats Pis Ko (UNPC) long wok insait long Papua Niugini.

UNPC i bin kam stat wok long PNG long Novemba 1981. Na insait long dispela 10 yia, ol i bin stap long hia, moa long 300 volentia wokman bilong ol i bin kam na i go bek long kantri bilong ol.

Ol i bin kam na mekim wok bilong Helt, Edukesen na Komyuniti Developmen. Na sampela i bin wok long ol projek bilong Egrikalsa Beng tu. Long nau 76 volentia i wok i stap long 13 provins long kantri.

UNPC i gat ol wokman bilong enlong 91 kantri long wol. Volentia wok bilong ol i bin stat long 1961 taim presiden bilong Amerika long dispela taim, John F. Kennedy i askim ol lain bilong em long "helpim ol narapela pipel long wol."

As tingting bilong ol UNPC em long helpim ol narapela pipel long kamapim ol wok we ol yet i no inap long mekim, kamapim gutpela tingting bilong ol pipel bilong Amerika long ol narapela pipel bilong ol arapela kantri na mekim kliia long ol


pipel bilong ol arapela kantri we bilong sindaun bilong ol pipel bilong Amerika.

Long tingim namba wan taim we ol UNPC i bin kam insait long kantri long wok, ol i bin kamapim wanpela stori resis namel long ol haiskul long kantri. Het tok bilong dispela stori em 'Mi bai mekim wanem samting long kamapim gutpela sindaun long komyuniti bilong mi?'

Moa long 70 studen i bin stap ir.sait long dispela resis makim 18 provins. Na ol lain husat i bin winim dispela resis em;

Gret 7: Yagltainde Goiye Kerowagi Haiskul (HS) Simbu na Serah Dickson Ihu HS Galp, Gret 8: Simon Maina Gumine HS Simbu na Laeau Kaia Ihu HS Galp, Gret 9: Naka Dobiang Wasu HS Morobe na Pire Olmi Gumine HS Simbu, Gret 10: Henry Kamit Martys Memorial Skul Oro na Noah Tito Ihu HS Galp

Ol narapela lain husat bilong ol narapela haiskul husat i bin stap insait long dispela resis em Sentrel provins, Kupiano HS Komma Vagi, Idau Warivuirai, Is Nu Briten provins.



Rot bilong Kundiawa na Karamui bagarap...Dispela Cessna 105 balus bilong Simbu Aviation balus kampani i save ron namel long Kundiawa na Karamui. Tasol long las wik em i no mekim wanpela ron liklik bikos sampela samting long ensin i bin bagarap. Olsem na long poto, tupela saveman long wok mekanik wantaim ol ensin bilong balus i taitim bun long stretim dispela balus i stap long Kundiawa ples balus. Poto: Michael Koma.

PM promis long kirapim wok egrikalsa na kopi long hailans

SAPE METTA i raitim

PRAIM Minista Pias Wingti i tokim ol pipel bilong Isten Hailans long sampela plen na tingting gavman bilong em i gat long wok

egrikalsa insait long Papua Niugini.

Wingti i tok, em bai givim planti mani long helpim wok bilong ol kopi bisnis. Na helpim tu ol liklik kopi groa long kisim mani long stretim sindaun bilong ol long ples. Dispela i

bihainim tasol ol tok promis em i bin wokim long taim bilong 1992 nesenel ileksen.

Em i tok kopi i wanpela bikpela bisnis, olsem na ol i mas painim sampela rot bilong stretim gen ol samting long kamapim

ol wok bisnis bilong en. Gavman bai traim long kamapim wok bilong kopi na egrikalsa insait long kantri.

Narapela bikpela tingting bilong gavman bilong Wingti em long skulim ol man bilong ples long gutpela rot

bilong wok didiman. Na dispela bai helpim ol pipel long kamapim gutpela na planti kaikai bilong gaden na salim long maket na ol bikpela stua.

Wingti i tok dispela bai helpim ol pipel long lukautim ol yet na i no

inap askim gavman long givim ol samting. Bikos ol i ken kamapim planti kaikai olsem pis, abus, kumu na ol arapela kaikai bilong gaden. Tasol gavman bai stretim ol polisi long kirapim tingting bilong ol pipel long

wok egrikalsa, forestri na fiseris.

Dispela tingting bilong kamapim wok egrikalsa bai stat long 1993. Wingti i tok em bai traim long painim sampela mani long helpim ol pipel long mekim wok.

5-pela man Ingambilis maritim ol masalai meri



LONG taim bilong ol tumbuna, ol yangpela man tasol i save stap long ples Ingambilis long hap bilong Maprik insait long ls Sepik provins.

Na long dispela ples i gat 5-pela wara olgeta. Nem bilong ol dispela wara em Kambul, Wahup, Ambina, Wasafana na Wampau. Na i gat 5-pela meri tu i save stap long dispela ol wara. Nem bilong ol i wankain olsem nem bilong ol wara, na ol i save lukautim wan wan wara.

Long dispela ples tu i gat wanpela diwai pikus i stap. Na em i haus bilong wanpela masalai meri. Na nem bilong em i wankain olsem bilong diwai pikus.

Ol 5-pela meri i save lukautim gut tru ol wara. Oltaim ol i save klinim ol wara na i no gat wanpela pipia i save drip drip nabaut. Na dispela masalai meri antap long diwai pikus tu i save mekim wankain long klinim diwai bilong em. Na no gat wanpela drai lip i save stap long as bilong dispela diwai. Na

oltaim gupela kolwin i save kirap long hap.

Long olgeta de taim ol man i laik go wok, waswas o mekim wanem, ol 5-pela meri ya long wara i save lukstil long ol. Tasol ol lain man bilong Ingambilis i no save olsem i save gat ol smatpela meri i lukstil long ol i stap.

Oltaim ol man bai go hatwok long wokim gaden, painim abus, wokim haus na ol narapela wok nabaut. Olgeta de ol i save wok na i no gat malolo bilong ol liklik.

Ol dispela yangpela man tu i gat ol wan wan hausboi bilong ol. Nawan wan i save mekim ol wok bilong em yet. Mekim i go wanpela taim nau na ol i kibung long makim wanpela bilong ol olsem bos. Em nau ol i makim Wamiga.

Orait bosboi i tokim ol nau long olgeta bai go long ples bilong wan wan man na lukim wanem kain wok em i mekim. Na dispela i save kamap long olgeta moning. Mekim olsem i go na bihain ol i painimaut olsem i gat sampela meri i save hait na lukstil long ol oltaim. Orait ol i paitim toktok nau long husat bai maritim ol 5-pela meri bilong wara ya.

Em nau bihain ol i toktok pini na go nabaut long haus. Wanpela moning ol i giaman long go wok na ol dispela 5-pela man bilong maritigo hait arere long wan wan



wara i stap. Taim ol dispela lain meri i laik lusim wara na kam antap long go lukstil long ol man, kwiktaim ol 5-pela man ya i kirap holim ol na kisim ol i go long ples.

Olgeta arapela i go long gaden bilong ol na mumutim stret ol kaikai samting i kam. Ol i go

long bus tu na kilim planti pik, pisin na kain kain arapela abus bilong bus. Long dispela apinun, ol wokim bikpela kaikai na maritim dispela man na meri.

Bihain ol dispela lain i stap amamas i go na kamapim planti moa pikinini. Pikinini bilong ol

gen kirap marit namel long ol yet na kamapim moa pikinini. Ol i mekim olsem i go na namba bilong ol lain long ples Ingambilis i groa i go bikpela, na ples i kamap i kam inap nau.

Staron Wanga
KAVIENG



□ KANAGE wantaim ol poro bilong em i laik go brukim wanpela haus na stil. Taim ol i go kamap long haus, ol i harim wanpela singaut i kamap insait long haus olsem: "It's coming." Ol i pret na kwiktaim abrusim olgeta mita bilong roket na go pinis. Taim ol i ron yet, ol i harim narapela singaut gen: "It's going." Sore, dispela taim olgeta mita i pinis. Bihain wanpela bilong ol i hait i go bek long sekap gut long husat i singaut olsem. Em i sekim olgeta rum i go na i no lukim wanpela samting. Tasol taim em i opim dua bilong toilet, em i lukim wanpela liklik boi i sindaun na pekpek i stap. Na taim pekpek i laik pundaun long as bilong em, em bai singaut: "It's coming." Na taim pekpek i go insait long pot bilong toilet, em bai singaut: "It's going."

Jimmy B. Henry,
PNGDF, Moem Barrks.

■ KANAGE wok olsem teksi draiva na painim pasindia raun i stap. Em kamap stret long Waigani maket long Mosbi na bos bilong em i singaut long radio na tokim em: "Hariap go kisim wanpela man long 'yunivesiti forum' na go lusim em long ples balus." Kanage tanim ka na givim siksti stret i go long yunivesiti. Em go lukim sampela sumatin i stap ausait long forum eria bilong yunivesiti na kirap askim ol: "Ol yangpela, mi painim wanpela man man long 'rum foa' bilong yunivesiti ya. Inap yupela i helpim mi?" Ol sumatin i paul nau na askim Kanage, "I gat planti haus long yunivesiti na i gat planti 'rum foa' na yu save long wanem haus o diapatmen dispela man i stap long en tu?" Tasol Kanage i bekim, "Nogat. Em tok em bai stap tasol long 'rum foa' bilong yunivesiti." Em nau wanpela bilong ol sumatin i kirap na tok, "Nogut yu toktok long 'yunivesiti forum' ya." Na wantu Kanage kirap bekim, "Em tasol dispela 'rum foa' bilong yunivesiti ya."

Bihain dispela sumatin husat i laikim teksi i kamap na tupelai tekov i go long ples balus. Tasol long hap rot, Kanage i wok long tingim yet dispela samting na lap isi isi i stap. Sumatin i lukim olsem na askim Kanage, "Wanem samting stret i pani na yu lap?" Nau Kanage i bekim, "Yupela yangpela ya, yupela yunivesiti nating nating na i no save liklik long mining bilong 'rum', na yupela i save kolim 'rum 4' gen long dispela bikpela hap ples bilong kibung long open spes ausait."

Man wari long meri i no bel

Dia Laiplain,
Mi marit na i gat tupela pikinini. Tasol nau mi gat hevi. Bikos meri bilong mi no bel inap long wanpela yia nau.

Mi askim meri long as bilong dispela. Na em i tok olsem mama bilong em i laikim sampela samting olsem klos na mani. Na bihain em inap larim pikinini bilong em i gat bel gen.

Ating mama bilong em inap yusim ol pasin tumbuna long pasim bel bilong meri olsem bai em i no inap karim gen. Tasol mi no bilip tumas long dispela. Na yupela ting wanem?

NOT CONVINCED

Dia Pren,

Yu bin toktok gut tu wantaim meri bilong yu na kisim tingting bilong em long dispela o nogat?



Em i gat wankain tingting olsem yu long karim narapela pikinini gen o nogat? Ating em i mas skin dai pinis oltaim long lukautim tupela pikinini, em i laik malolo liklik pastaim nabihain tingting long karim narapela pikinini.

Yu bin soim tru laik bilong yu long em liklik tu o nogat, oltaim yu tingting long kamapim pikinini tasol.

Ating em i save givim gupela kaikai oltaim long

yu wantaim ol pikinini tasol em yet i nogat. Dispela inap bagarapim skin na bodi bilong em, mekim em i pilim les na i no inap karim pikinini. Ating i mobeta yu kisim em i go long haus sik o klinik na ol dokta bai sekim em.

Mama bilong em i bin grisim em long kisim sampela kain marasin bilong pasim bel tu o nogat? Ating meri bilong yu i pret olsem mama

bilong em i wokim posin long em. Na long sampela taim, pret inap stapim meri long kisim bel.

Bilong wanem na tambu meri bilong yu i wok long askim long mani na klos samting? Man bilong em i stap yet o em i gat ol narapela pikinini i stap bilong lukautim em tu o nogat?

Em i gat gaden bilong planim ol kaikai tu o nogat? Ating i mobeta olsem yu mas toktok wantaim meri bilong yu na ol brata na susa bilong em long gupela rot bilong lukautim mama bilong ol. Olsem bai em i gat inap kaikai na klos samting oltaim.

Ating yu inap bungim olgeta famili memba bilong meri bilong yu na toktok long dispela.

Mi Laiplain.



Fri edukesen i no bilong go skul nating - Ulul

BEN TAUMAI i raitim

DISPELA fri edukesen polisi bilong nesenel gavman i no min olsem olgeta pikinini bai i go skul nating.

Madang provinsal Edukesen minista, Benny Ulul i bin tokaut long dispela las wik insait long wanpela edukesen ripot em i givim long asembli

kibung. Em i tok bihainim dispela polisi bilong nesenel gavman, ol papamama bai baim hap skul fi na nesenel gavman bai baim hap.

Em i tok ol papamama i mas baim hap skul fi bilong helpim long lukautim ol klasrum na ol narapela samting i stap long ol skul. Na dispela bai kamap long olgeta hap insait long kantri.

Em i go het na tok

olsem 7-pela skul long provins bai i gat gret 7 long neks yia. Ol skul ya em Bieng, Banara, Malala, Mirap, Alexishafen, Talidig na Jomba komyuniti skul.

"Ol i bin makim dispela ol skul bikos ol i gat inap klasrum, ol samting bilong yusim na tis na inap tisa long skulim ol pikinini," Ulul i bin tok.

Na em i tokim tu asembli tu olsem

Malala haikul bai i gat gret 11 long neks yia.

Tasol long nau yet, Malala i sot long K100,000 bilong stretim ol klasrum na baim ol samting bilong ol gret 11 studen long yusim long neks yia.

Ulul i tok dispela hevi i stap long han bilong provinsal na nesenel gavman bilong lukluk long en.

Mama na tripela pikinini stap orait

MICHAEL KOMA i raitim

WANPELA meri Kundiawa i bin karim tripela pikinini long Mindenge Sen Joseph haus sik long Simbu provins. Na em i stap orait wantaim ol pikinini bilong em.

Nem bilong dispela meri em Maria Pius na em i bilong ples Mindima long Kundiawa distrik. Em i bin karim tupela pikinini meri na wanpela man.

Ol nes husat i wok long hap i tok olsem dispela boi i gat 3.1 kilogram hevi na tupela susa bilong em i gat 2.7 kilogram.

Wanpela sista husat i bin stap long taim Maria i karim dispela tripela pikinini i tok, dispela i no namba wan taim ol i lukim wanpela meri i karim olsem. Dispela em i namba tu taim bilong kain samting olsem long kamap.

Dispela sista i tok, ol i bin mekim isi long Maria long karim ol pikinini bikos ol i gat save pinis long ol kain hevi bilong dispela wok.

"Mi amamas tru long dispela taim, mi ting God i givim mi ol dispela pikinini," Maria i tok.

Tasol Maria i tok em bai gat hevi long givim susu long ol. Na em i tok em bai traिम long lukautim ol gut.

Maria wantaim man bilong em i gat wanpela pikinini man husat i gat tripela krisman na dispela tripela bai bringim namba i go antap long 4-pela.



• Maria Pius wantaim tripela pikinini bilong em.

Ol lida amamas long rausim "hausman" long Isten Hailans

WANPELA provinsal minista long Isten Hailans na wanpela provinsal asembli memba i laikim Isten Hailans provinsal asembli long bihainim tingting bilong nesenel gavman long pinisim provinsal gavman sistem.

Provinsal minista bilong Helt, Bono Fiya na memba bilong Gahuku, Nelson Ipako i laikim Isten Hailans provinsal asembli long pinis bilong soim olsem ol provinsal lida i no hangre long pawa na tu i no hangre long holim ol wok bilong ol.

Mista Fiya na Mista Ipako i tok provinsal asembli bai no gat wok sapos ol senis i kamap na i rausim pawa na namba bilong ol pipel long provinsal asembli.

Tupela wantaim i tok asembli em i "hausman" bilong ol pipel. Em i olsem wanpela

haus tumbuna bilong ol pipel long kam bung na stretim ol hevi na wari bilong ol.

Tupela i sutim tok i go nau long olupela na tu nupela nesenel gavman na ol lida long i no wokim gut.

Long wanpela ripot bilong ol, tupela i tok ol nesenel lida i save paulim bikpela na planti pablik mani.

Mista Fiya na Mista Ipako i tok planti taim ol nesenel lida i save paulim mani. Na ol i save kamap long ai bilong lidasip traibunal, Ombusman Komisen na tu long kot. Dispela i soim klia olsem ol nesenel lida i bagarap moa long ol provinsal lida.

Tupela man ya i tok olsem ating ol nesenel lida i laik karamapim rong bilong ol. Olsem na ol i wok long sutim tok i go long ol provinsal gavman na ol provinsal lida.

Noten gat nupela primia

NUPELA primia bilong Noten provins em Douglas Garawa.

Em i bin winim dispela sia bihain long wanpela vot i nogat bilip tupela wik i go pinis. Na long las wik Trinde, em i tokaut long kabinet bilong em.

Primia Garawa i tok nupela gavman i lukluk long bringim ol sevis i go long ol pipel. Olsem na ol memba bilong Oro i no inap holim mani bilong ol konstituensi long han bilong ol.

Garawa i tok we ol bai mekim dispela i em olsem:

"Mipela olgeta memba bai kisim wankain mani long baset. Tasol mani i no inap go long ol memba. Em bai stap long dipatmen.

"Na sapos mipela i laik kamapim

sampela projek, mani bai go long baim ol samting bilong ol dispela projek. Mipela bai sainim pepa tasol. Gavman bilong mi laik mekim olsem long traिम na stapim pasin bilong paulim mani na yusim long laik na i no long ol projek wok.

"Ol polisi bilong mipela i wankain olsem polisi bilong Praim Minista Paias Wingti long viles sevises. Mipela i laikim ol pipel long mekim wok long graun bilong ol. I no long sindaun na wetim gavman long givim ol samting," Garawa i tok.

Foapela memba bilong olupela gavman i lusim pinis olupela primia Benstead Atota na joinim lain bilong Garawa.

NOKEN PEIM MOA LONG OLSTOA!



10t



10t



10t



10t



5t

Sapos ol askim moa... go long narapela stoa!

WANTOK

NIUSPEFA BILONG OL PAPUA NIUGINI STRET

PABLIK NOTIS

Sapos yu laik advertais, telepon 25 2500 na askim long

PH: Miri Aiori - Ext. 203
John Iagata - Ext. 215
Kosinto Fosagu - Ext. 216
Bonner Hui - Ext. 202

TAKITAKI'S MEDICAL CLINIC

LIGHTFOOT ARCADE KASAGTEN STREET ABOVE BALI STORE

To Madang Community as of Monday 12 of October.

Hours:

Mon - Friday 8 am to 5 pm

Sat 8 am to 12 noon

Sunday and Public Holidays

8.30 am to 10.30 am

On call 24 hrs

Phone: 82 3733

FAX 252579
WORD PUBLISHING

The management and staff Postal Division of PTC wish to convey their deepest sympathy and sincere condolences to the wife and family of the late

MR JOHN PA'ANDRENG



District Telecom Manager Wewak who passed away on October 5, 1992.
May He Rest In Peace



AUSTRALIAN HIGH COMMISSION PORT MORESBY

FULL FEE STUDENTS INTENDING STUDY IN AUSTRALIA FOR THE FIRST TIME IN 1993.

"The school year is fast drawing to a close"


Information packs outlining requirements for student visas are now available from the Overseas Student Office (OSO) at the Australian High Commission.

To avoid any delays in processing, parents wanting to send their children to Australia for schooling for the first time in 1993 should contact the OSO and obtain the information pack now!

Information material listing schools and education institutions in Australia that welcome overseas students are also available on request.

For further information contact:

Julie Callard
OVERSEAS STUDENTS OFFICE
TEL: 25 9333 EXT 255
FAX: 25 3528



SOME PEOPLE DON'T TAKE STUDYING BY MAIL SERIOUSLY

Some people believe that you cannot get a good education through Distance Education. Some people believe that because you are getting your education through a correspondence school that you don't have to work for your diploma or your degree. Some people confuse "phony degree mills" with legitimate Distance-Education Schools. If you are one of these people, don't read any further.

ICS is looking for people who take their education SERIOUSLY, whether attending a traditional college or studying by mail. We are looking for people who will apply themselves and work hard to get the full value of the training that ICS offers: Diplomas and Degrees are issued upon successful completion of a course accredited by the National Home Study Council...your guarantee of a quality education. If you take your education seriously and want to train for a new career or improve your job skills for advancement in your present job, ICS may have the right career training for you. Choose from 60 career courses listed below. Select the one career field you would like to train for and indicate that choice in the coupon below. Cut out this ad and mail it to ICS TODAY. We will send you a detailed course outline and tuition schedule by return Airmail. There is no obligation.

SEND FOR FREE FACTS—NO OBLIGATION

Z201A

ICS International Correspondence Schools, Dept. TTTA2
SINCE 1890 Box 1900, Scranton, PA 18501-1900 U.S.A.

- | | | |
|--|--|--|
| <p>ASSOCIATE IN SPECIALIZED BUSINESS DEGREE PROGRAMS</p> <ul style="list-style-type: none"> 60 Business Management 61 Accounting 80 Business Management with option in Marketing 81 Business Management with option in Finance 64 Applied Computer Science 68 Hospitality Management <p>ASSOCIATE IN SPECIALIZED TECHNOLOGY DEGREE PROGRAMS</p> <ul style="list-style-type: none"> 67 Electronics Technology 63 Civil Engineering Tech. 62 Mechanical Engineering Tech. 65 Electrical Engineering Tech. 66 Industrial Engineering Tech. | <p>CAREER DIPLOMA PROGRAMS</p> <ul style="list-style-type: none"> 56 Computer Programming in BASIC 07 U.S. High School Diploma 02 Electronics 05 Hotel/Restaurant Management 13 Professional Secretary 35 Travel Agent 14 Air Conditioning & Refrigeration 32 Art 59 Catering/Gourmet Cooking 20 Medical/Dental Office Assistant 51 Fashion Merchandising 33 Motorcycle Repair 52 Surveying & Mapping 22 Wildlife/Forestry Conservation 47 Animal Care Specialist 260B Building Trades 106 General Business 16 Practical English 89 Small Engine Repair 50 Starting Your Own Business 08 Legal Assistant 69 Computer Programming in COBOL 48 Computer-Assisted Bookkeeping 42 Dressmaking & Design 87 TV/Video Repair 04 Auto Mechanics | <ul style="list-style-type: none"> 12 Interior Decorating 18 Bookkeeping 06 Electrician 03 Child Day Care 38 Personal Computer Specialist 29 Police Sciences 10 Private Security Officer 09 Legal Secretary 55 Diesel Mechanics 94 Fitness & Nutrition 85 Drafting 260A Architecture 260C Machine Shop 161 Engineering 41 Journalism/Short Story Writing 40 Photography 70 Computer-Assisted Small Business Mgmt. 79 Electronics Technician 91 Cartooning 25 Firearms Repair 27 Personal Computer Repair 26 Teacher Aide 30 Floral Design |
|--|--|--|

Get FREE Information—
MAIL ENTIRE AD TODAY
Write the number of the one career that interests you

PLEASE PRINT
MR / MRS / MISS _____ AGE _____
ADDRESS _____
CITY/COUNTRY _____

WANTOK

NIUSPEPA BILONG OL PAPUA NIUGINI STRET

PABLIK NOTIS

Sapos yu laik advertais, telepon 25 2500 na askim long

PH Min Aion Ext 203
John lagata Ext 215
Kosinto Fosaga Ext 215
Borner Hill Ext 215

MOROBE SO

**RESIS BILONG OL
PAKET BONGO**

Namba bilong olgeta paket Bongo Cheesesnacks
insait long Suzuki Chief ka em:

989

Na WINA bilong dispela resis em:

**DONALD BUKEP bilong
BUNGANDI HAISKUL long LAE.**

Maketing Menesa bilong Word Publishing kampani,
William Kotson na Mista Neville Whitecross bilong PNG
Motors long Lae bai givim K100 prais i go long wina
bilong dispela resis long PNG Motors opis, Lae.

Word Publishing i laik givim bikpela tok tenkyu i go long
olgeta lain husat i bin stap insait long dispela resis.



**OL WINA BILONG
MOROBE SO
STRING BEN RESIS**

1. Eriku Ben
2. Left-Right Ben-Ungai
3. Six Pack Ben
4. Yangduo Ben
5. Young Dapun
6. Tangif Ben.

Ol ben memba bilong ol dispela grup i mas toktok
wantaim Dominic Mola bilong Coca Cola Bottlers,
Lae long telipon namba 42 1033 long kisim ol prais
bilong yupela.

Coca Cola Bottlers long Lae i laik tok tenkyu tu long
olgeta string ben grup husat i bin resis long 1992
Morobe So String Ben resis.

Tenkyu tru long gutpela sapot bilong yupela na lukim
yupela gen long 1993 Morobe So.

You Can't Beat The Feeling!

**For draws, point ladders, tables from
all the provincial centres
every week in**

THE TIMES

&

WANTOK

NIUSPEPA BILONG OL PAPUA NIUGINI STRET

WARNING!!

A man gets up in the morning washes himself with advertised soap, shaves with advertised foam & razor, brushes his teeth with advertised toothpaste, puts on his advertised designer label clothing, drives into work in his new advertised car, arrives and switches off his advertised burglar alarm, turns on his advertised till and waits for people to shop with him.

He receives a telephone call from a newspaper and gets them off the phone by saying he doesn't believe in advertising.



QUESTION: Why is it then when his business is close to crumbling he will advertise it for SALE?

**ANSWER: BE WISE AND
ADVERTISE**

Call our advertising department for details of how you can reach thousands of our readers with your MESSAGE.

Tel: 25 2500

WANTOK

KUSPEPA BILONG PAPUA NIUGINI STREET
PNG's Tok Pisin newspaper

THE TIMES

1992-1993
PNG's award winning newspaper

PNG
BUSINESS

reporting on the business community

SPORT
Weekend

for complete sport coverage



BENSON & HEDGES SOFTBALL

Wantok

Ol boi Lae go insait stret long sisen tru Ol nupela tim kirapim das long Mosbi sofbal

FAY DUEGA i raitim

SAPOS olgeta samting i go stret, 1992/1993 sofbal resis bilong ol man long Lae bai stat long dispela wiken. Dispela em toktok bilong presiden bilong Lae Mens Sofbal Asosiesen (LMSA), Nelson Hungrabos. Long dispela taim, Mista Hungrabos i tokaut tu olsem ol pilaia husat i go resis long nesenel klap sempionsip long Mosbi long Ista Wiken i mas givim bek ol yunifom long asosiesen nau. Na las de bilong mekim olsem em long Sande. Sapos nogat ol, bai askim tasol ol lain husat i no givim bek yunifom long

baim. Na hevi bilong dispela bai pun-dan antap long ol klap. Long resis bilong dispela sisen, Hungrabos i tok ol bai stat stret wantaim ol pilai bilong sisen tru. Na i no inap pilai long pri sisen olsem long bipo. Ol bai nogat pri sisen long wanem ol i stat bihain tru. Bikos taim tru bilong ol long pilai em long stat bilong mun Oktoba. Tasol nau em i namel pinis. Long resis bilong yia, ol i brukim i go long tupela raun. Mista Hungrabos i tok sisen bai stat long dispela wiken i go inap long Desemba 20. Orait ol pilaia bai go malolo inap long tupela wik na raun tu bai stat long Janueri 3, 1993.

MESERY GUBAG i raitim

PRI sisen sofbal gem bilong ol meri i bin stat long Mosbi las wiken. Na bikpela das i kirap long gem namel long wanpela nupela tim, Lotto Allstars, na Gazelle long Bisini sofbal graun. Lotto Allstars i wanpela nupela tim insait long resis bilong dispela sisen. Ol i bin kirapim bel bilong Gazelle long stat bilong gem yet. Tasol ol olpela han bilong ol meri. Gazelle i soim stail bilong ol na win, 8-7. Olsem na wanem olpela tim i ting ol i ken pilai nabaut wantaim ol meri Lotto Allstars na ol arapela nupela tim i mas tingting gut na mekim. Ol i soim pinis strong na stail bilong ol taim ol i pilai

wantaim Gazelle. Gazelle i wanpela strongpela tim long sofbal resis bilong Mosbi. Presiden bilong Mosbi Wimens Sofbal Asosiesen Kevau Paivu i tok olsem 20 klap i rejista pinis long pilai. Na namel long ol, ol i putim 35 tim husat bai pilai long ol wan wan divisen bilong resis ya. Dispela ol tim em Mazda, Fuji, Wantoks, Gazelle, United, Yokomo, Elcom, NGI, Hanza Bay, PNG Arts, Karanas, DTI, Yunivesiti, Royals, Dodgers, Lotto Allstars, Neighbours, Norths, City Tigers, Admiralty na Malangan. Ol tim ya i bin baim K50 rejistresen fi bilong ol. Na ol narapela tim husat i rejista bihan bai baim K100. Sisen tru bilong resis bilong ol meri bai stat long pinis bilong mun Oktoba. Ol nupela tim husat i stap insait long resis bilong dispela sisen em Lotto Allstars, Neighbours, Admiralty, Norths na City Tigers.

PORT MORESBY WOMENS SOFTBALL ASSOCIATION PRE-SEASON GRADING GAMES - WEEK 2

Time	Diamond One	Umpire
09.00	Chebu 1 vs NGI 1	T.Simitap
10.30	Royals 1 vs Elcom 1	P.Naron
12.00	UPNG 1 vs All Star 1	A.Moe
13.30	Chebu 1 vs Elcom 1	R.Misiel
15.00	Royals 1 vs All Star 1	C.Terra
16.30	UPNG 1 vs Yokomo 1	P.Naron

Time	Diamond Two	Umpire
09.00	All Stars 11 vs Tarangau 1	K.Paivu
10.30	Admiralty 11 vs N/Bours 1	G.Talim
12.00	C/Tigers vs Yokomo 11	J.Avughulas

Time	Diamond Three	Umpire
09.00	Norths 1 vs Karanas 1	P.Mesak
10.30	Fuji 11 vs Dodgers 1	Sijmitap/Mesak
12.00	Norths 11 vs Dodgers 11	J.Sogai
13.30	Admiralty 1 vs United 11	C.Terra
15.00	Chebu 11 vs Karanas 11	L.Paivu
16.30	Elcom 11 vs NGI 11	R.Misiel

MT HAGEN SOFTBALL ASSOCIATION DRAW

Saturday: October 17, 1992.

Time	Fixture	Diamond	Umpire
1.00pm	Elcom vs H/way Rovers	2	J. Kundi
3.00pm	NGI vs Unicats	2	W. Maradi

(Men)

1.00pm	TSL vs Aviat	1	P. Albert
3.00pm	B/Eagles vs Strivers	1	P. Tonga

Sunday: October 18, 1992.

Time	Fixture	Diamond	Umpire
1.00pm	Hgnstar vs Wantoks	2	A. Wille
3.00pm	Royals vs Eagles	2	N. Norlick

(Men)

1.00pm	NGI vs H/way Rovers	1	M. Kaut
3.00pm	Unicats vs Elcom	1	V. Norlick

Nogat wokbung inap bagarapim Is Nu Briten sofbal - Sobendi

FRANCIS ULIAU i raitim

NEM bilong pilai sofbal long Is Nu Briten provins inap bagarap sapos ol bikman i no stat long wokbung nau. Bikpela hap tok bilong dispela i sut long ol tripela sofbal asosiesen insait long Rabaul taun eria. Ol asosiesen ya em Gazelle Amatuer Sofbal Asosiesen (GASA), Rabaul Mens Sofbal Asosiesen (RMSA) na Rabaul Wimens Sofbal Asosiesen (RWSA). Wanpela olpela man husat i save go pas long wok sofbal long bipo na i sapotim yet dispela pilai long Is Nu Briten, Paul Sobendi i tok dispela kain pasin bilong ol bos bilong ol asosiesen long kros na

tromoi toktok i go i kam namel long ol yet bai bagarapim nem bilong pilai. Em i tok, "Taim ol bos bilong wan wan asosiesen i stat kros na toktok nabaut long ol yet, dispela kros bilong ol bai bagarapim sans bilong ol yangpela long kamap ol gutpela sofbal pilaia long taim bihain." Mista Sobendi i mekim tu dispela toktok bihain long Rabaul i no salim wanpela tim bilong go pilai long nesenel sofbal klap sempionsip long Mosbi. Dispela bikpela resis i bin kamap long Ista Wiken. Em i tok sapos dispela kain pasin bilong

ol eksekutiv i stap yet, nem bilong Rabaul olsem asgraun bilong sofbal bai bagarap. Mista Sobendi i skruim toktok olsem dispela kain hevi i kamap tu bikos i gat tripela asosiesen insait long taun eria. Na ol i stap klostu tru wantaim. "Long kain liklik taun olsem Rabaul, em i no gutpela long kamapim

tripela asosiesen. Em i mobeta long ol i bung na kamapim wanpela asosiesen tasol," Mista Sobendi i tok. Em i tok gutpela wokbung bai helpim tu long stapim pasin bilong kros oltaim na sutim tok olsem nesenel sofbal bodi i no save givim helpim. Olsem na bihainim ol dispela toktok, Mista Sobendi i laikim sampela senis i kamap

nau long ol lain bilong lukautim asosiesen. Na i mas gat nupela presiden na namba tu bilong em long resis bilong ol man. Tupela yangpela man em i laik lukim i kisim dispela ol wok em David Kepas na Kenneth Woo. Long lukluk bilong em, Sobendi i tok olpela presiden i no bin mekim wanpela gutpela wok.



Stail bilong Kabuu...Dispela junia beta bilong Kablu Madang i sambal gut tru antap long hom bes na redi tasol long hamaim bal taim ol i pilai wantaim ol lain bilong Newtown Jets long las wiken. Dispela pilai i bin makim ol pri sisen sofbal resis bilong ol man long Madang. Foto: Ben Taumai.

BENSON & HEDGES SOFTBALL



• Dispela em primia tim bilong Rapatona husat i save kik long Goroka. Ol i bin winim PTC 5-3 long gren fainal. Photo Sape Metta



• Dispela susa wantaim bal i wokim sampela liklik stail long taim bilong gren fainal kik. Guria yet i bin winim dispela kik long 1-0.



• Dispela em kik namel long ol meri Guria na Kalibobo long Goroka. Guria i bin autim Kalibobo 1-0 long kik bilong gren fainal long las wiken.



• Dispela goli bilong Rapatona i stailim stretim long holim bal. Kain stail tasol i wokim na Rapatona i winim PTC 5-3 long gren fainal kik.

MT HAGEN SOFTBALL ASSOCIATION DRAW

Saturday: October 17, 1992.

(Women)

Time	Fixture	Diamond	Umpire
1.00pm	Elcom vs H'way Rovers	2	J. Kundi
3.00pm	NGI vs Unicats	2	W. Maradi

(Men)

1.00pm	TSL vs Aviat	1	P. Albert
3.00pm	B Eagles vs Strivers	1	P. Tonga

Sunday: October 18, 1992.

(Women)

1.00pm	H'gstars vs Wantoks	2	A. Wille
3.00pm	Royals vs Eagles	2	N. Norlick

(Men)

1.00pm	NGI vs H'way Rovers	1	M. Kaut
3.00pm	Unicats vs Elcom	1	V. Norlick

Results - October 10 & 11

"(Women)"
Saturday
Highway Rovers 1 vs NGI 19
Karanas 22 vs Hagstars 5

"(Men)"
Gazelle 7 vs Hagen Strivers 10
Unicats 15 vs Aviat 3

"(Women)"
Sunday
Wantoks 16 vs Brown Eagles 2
Unicats 3 vs Royals 3

"(Men)"
NGI 9 vs DSL 11
Elcom 2 vs B/Eagles 3

PORT MORESBY NISSAN BASKETBALL GRAND FINALS
SIR JOHN GUISE INDOOR COMPLEX WAIGANI

Saturday October 17

Women B Grade
9.00 NCDC vs Sogeri/Uni
Referees: Maurice Elavo/J. Ami

Men B Grade
10.00 B&H vs Bucks
Referees: Kamilo/Aiori

Women A Reserve
11.00 Bucks vs University
Referees: J. Ami/K. Mitaharo

Men A Reserve
12.00 Exodus vs Elcom
Referees: Maurice Elavo/Ben Zigi

Women A Grade
1.00 Bucks vs Stars
Referees: Aiori/Kamilo

Men A Grade
2.30 B&H vs Elcom
Referees: Elavo/Zigi

PORT MORESBY BANKERS NETBALL DRAW
Tuesday 20th October, 1992

5:15pm: Court 2
BPNG vs Agriculture Bank (Pool B)

Court 3
WESTPAC vs BSP (Pool B)

Court 4
PNGBC (3) vs ANZ (Pool B)

6:15pm Court 1
ANZ vs BSP (Pool A)

Court 1
AGBANK vs PNGBC (2) (Pool A)

Court 2
Westpac vs BPNG (Pool A)

Court 3
INDOSUEZ vs PNGBC (1) (Pool A)

MADANG SOFTBALL ASSOCIATION WEEKEND'S DRAW
SATURDAY MARCH 7TH, 1992
DATE: 17.10.92

TIME FIXTURE

12.00 Karanas vs Melanesian
Utd Sisters vs Royals
Kalibobo vs Karau
Air Niugini vs Malangau
Heli Niugini vs Kabiu

SUNDAY: 18.10.92
12.00 Utd Sisters vs Kalibobo
Kabin vs Air Niugini
Heli Niugini vs Karanas
Royals vs Malagan
Melanesian vs Kabiu

MENS DRAW
SATURDAY: 17.10.92
12.30 Karanas vs Malagan
Waterboard vs Newtown
Kinhill vs Kabiu

SUNDAY: 18.10.92
12.30 Kinhill vs Karanas
Waterboard vs Kabiu
Malagan vs Newtown

WAU SOCCER ASSOCIATION POINTS LADDER

U/23 Division

Teams	G/P	W	D	L	G/F	G/A	PTS	PLC
St Francis	16	12	3	1	-	-	27	1
B.F.C	16	9	6	1	-	-	24	2
Wau high school	16	7	3	6	-	-	18	3
W/Purex	16	6	5	5	24	10	17	4
Guria	16	7	3	6	18	18	17	5
M/United	16	5	4	7	-	-	14	6
Pukari	16	4	2	10	-	-	10	7
Waramuli	15	3	4	8	-	-	10	8
Yaragoe	14	2	1	11	-	-	5	9

U/15 Division

Teams	G/P	W	D	L	G/F	G/A	PTS	PLC
Wau high school	17	14	2	1	-	-	30	1
B.F.C	18	10	4	4	-	-	24	2
St Francis	16	8	4	4	-	-	20	3
Kurex	18	7	5	6	-	-	19	4
M/United	18	7	3	8	-	-	17	5
Guria	17	6	4	7	-	-	16	6
Pukari	17	4	5	8	-	-	13	7
Ziwe	17	4	4	9	-	-	12	8
Waramuli	17	0	6	8	-	-	12	9
Yaragoe	17	0	2	10	-	-	8	10

Enga kik nau long painim klap sempion

GODFRIED NIAKA i raitim

PLANTI senta i wok long redi nau long holim ol gren fainal gem bilong ol.

Na sampela i redi tasol long go insait long ol semi na mesa semi fainal. Tasol wan o tupela senta i holim pinis ol gren fainal bilong ol.

Enga em i wanpela senta husat i holim pinis ol gren fainal gem bilong en.

Presiden bilong Enga Soka Asosiesen, Ananias Popo i tok olsem

ol i bin holim gren fainal tupela wik i go pinis. Gren fainal i bin kamap long Sande, Oktoba 4.

Mista Popo i tok long dispela wiken, Enga Soka Asosiesen bai holim sil semi fainal na fainal long painimaut wanem klap bai go long Lae long mun-Novemba na resis long nesanel klap sempionsip.

Em i tok ol gem bilong dispela wiken bai stap olsem. Anda 16

divisen bilong Luteran Yut bai salensim anda 16 divisen bilong Buresong o Teachcom. Long wanem anda 16 bilong Buresong na Teachcom i no salens yet long painimaut husat bai go bungim anda 16 bilong Luteran Yut.

Long gem bilong primia divisen, Luteran Yut bai pilai wantaim Buresong. Wina bilong tupela na maina primia tim bai go long Lae long stap insait long dispela nesanel klap sempionsip long mun-Novemba.

Popo i tok maina

primia tim long dispela yia insait long Enga em Buresong. Sapos Luteran Yut i winim Buresong long dispela wiken, tupela tim wantaim bai go long Lae long mun-Novemba.

Tasol sapos Buresong i winim Luteran Yut, Buresong tasol bai go long Lae.

Long ol gem bilong gren fainal we i bin long Oktoba 4, anda 16 tim bilong Teachcom i winim Luteran Yut, 2-1. Long divisen bilong ol meri, Luteran Yut i winim Moku, 1-0. Na long bikpela gem bilong primia divisen,

Luteran Yut i winim Yunaited, 2-1.

Mista Popo i tok tupela tim i bin pilai hat tru na i no givim wanpela liklik sans long tupela yet long mekim umben bilong ol i singsing.

Tasol ol boi bilong Luteran Yut i gat strongpela tingting na i laik stret long win. Olsem na ol i yusim

Long namba tu hap bilong pilai, wankain samting i kamap. Tupela tim wantaim i pilai hat tru na i no givim wanpela liklik sans long tupela yet long mekim umben bilong ol i singsing.

Tasol ol boi bilong Luteran Yut i gat strongpela tingting na i laik stret long win. Olsem na ol i yusim

olgeta kain stail na teknik ol i gat. Strongpela tingting bilong ol long win i karim kaikai taim ol i stretim rot bilong Jacob Kibunki na em i kikim namba tu gol bilong ol. Namba wan gol bilong Luteran Yut long namba wan hap bilong pilai, Jacob Kibunki yet i bin kikim. Skoa i stap 2-1 i go inap long pinis bilong pilai.

Noel Kirap long san i go daun na kamap long kolples

STORI BILONG PILAIA

WINIS MAP I raitim

Nem: Noel Tamsen.

Krismas: 21 yia.

Ples: Lido.

Distrik: Vanimo.

Provins: Wes Sepik.

Klap: Rapatona (Goroka).

Posisen: Straika.

Ol boi long ples bilong Noel i save laikim tru long pilai soka. Olsem na Noel tu i bihainim dispela kain pasin taim em i stap long komyuniti skul yet.

Noel i no bin stat kik long ol bikpela resis inap long 1987 taim em i pilai wantaim Lido soka klap long Vanimo taun resis. Orait long dispela taim i kam inap long 1989, Noel i stap na kik tasol wantaim tim bilong em long ples.

Long 1990, Noel i lusim ples bilong san i go daun na kisim balus i go long Mosbi. Long hap, ol boi wantok bilong em long Guria i kisim em i go na kik long anda 19 divisen. Bihain long wanpela yia, Noel i kisim balus gen na go long kolples Goroka. Long hap, em i go pilai wantaim ol boi Rapatona i kam inap nau.

Olsem ol arapela boi Wes na Is Sepik, Noel tu i gat liklik namba long pulim soken bilong representativ futbol. Long 1990, Noel i bin stap insait long tim bilong Guria soka klap long Mosbi na go pilai long nesanel klap sempionsip long Madang. Na long 1991, kain kik bilong em i katim lewa bilong ol jas na ol i makim em long skwat bilong Goroka. Na ol i go pilai wantaim ol arapela soka tim insait long Hailans rijon.

Long dispela kik resis bilong Hailans rijon, Noel i bin sutim planti gol na winim awod long dispela.

Long dispela yia, Noel i winim gen lewa bilong ol jas na ol i putim nem bilong em long lista bilong Goroka skwat long go long nesanel taitel. Na Goroka i kamap namba tri long dispela kik resis long Manus.

Wanpela samting Noel i laik lukim nau long wok soka insait long kantri em wok bilong ol selekta. Em i laikim ol selekta i mas go lukluk raun long ol liklik senta tu. Bikos i gat planti ol gutpela pilaia i stap long ol dispela hap.



• Noel Tamsen ... laik lukim ol selekta i go lukluk raun long ol liklik senta tu.

Laden soka tonamen no givim gut prais-Zorromotta

KODINETA bilong 1992 Laden soka tonamen, John Ignatius Zorromotta i no amamas tumas long ol tropi ol opisal i givim olsem prais i go long ol tim husat i resis.

Laden soka tonamen i bin kamap long Bogia distrik bilong Madang provins. Tonamen ya i bin stat long 16 na pinis long 20 Septemba.

Mista Zorromotta i tok olsem em i bin tokim siaman bilong Laden soka tonamen, Peter Kalam long givim sil, tropi na mani i go long husat tim i winim gren fainal long tonamen. Sil em i no bilong tim husat i win. Nogat. Sil em i bilong pilai resis

gen long 1994.

Em i tok tim husat i kam namba tu i mas kisim tropi na mani. Na stat long namba tri ples i go inap long namba 13 i mas kisim sampela kain amamas prais.

"Tasol mi kirap nogut long lukim ol liklik tropi we i bilong givim i go long wan wan pilaia olsem namba wan gol skora, golkipa o beklain na ol narapela moa," Zorromotta i tok.

Em i tok dispela i no gutpela tumas. Na em i no amamas long wok bilong man husat i holim mani bilong baim ol tropi.

WAU Soka Asosiesen i bin statim gen ol pilai bilong en long Sande bihain long olgeta hevi i stret.

Hevi i kamap taim ol pilaia bilong Waramuli i paitim wanpela referi. Dispela i stapim ol pilai inap long wanpela mun.

Long las wik Sande, ol i stat gen long pilai. Tasol Waramuli i no stretim yet hevi we ol i bin kamapim. Asosiesen i tokim Waramuli long baim sampela mani bilong stretim dispela samting.

Wau Soka Asosiesen i tokaut olsem sapos Waramuli i stretim hevi ya, orait, ol gem bai kamap gen. Sapos nogat, orait, ol gem i no inap stat inap long taim Waramuli i stretim dispela samting.

Asosiesen i bin wet i kam inap long las wiken na Waramuli i no mekim wanpela samting. Olsem na asosiesen i orait long ol klap long pinisim ol gem bilong raun tu.

Wanpela bikpela gem long Sande i bin kamap namel long BFC na Sen Francis. Long dispela gem, BFC i bagarapim sindaun bilong Sen Francis, 4-1.

Dispela tupela tim wantaim i stap long namba tu ples long po'in lata long resis. Tupela i bin pilai long painimaut husat bai go antap long namba tu ples na husat bai go daun long namba tri ples.

Insait long namba wan hap bilong pilai, ol pilaia long tupela tim wantaim i wok long ron isi isi tasol. Long wanem, wanpela mun olgeta ol i no bin pilai na ol stail i lus long het bilong ol.

Tasol fulbek bilong BFC, Gideon i bin airaun liklik taim Arthur Yang bilong Sen Francis i salim wanpela kona bal i kam insait long golmak bilong BFC. Na Gideon yet i kirap na kikim bal i go insait long golmak bilong em. Em nau Sen Francis i go pas, 1-0.

Dispela gol bilong Sen Francis i no stapim ol boi BFC. Nogat. Ol i pilai hat tru. I no longtaim, Jerry Song i kikim namba wan gol bilong BFC na bringim skoa i go long 1-1. Skoa i stap olsem inap long haptaim.

Long namba tu hap, ol boi Sen Francis i painim hat tru long brukim strongpela banis waia bilong BFC.

BENSON & HEDGES SOCCER

PTC kirapim bikpela pret long Goroka gren fainal

GODFRIED NIAKA i raitim

PASTAIM long Goroka i holim ol soka gren fainal bilong en, planti pilaia na ol manmeri i tok olsem Rapatona bai winim primia resis gren fainal long dispela yia.

Toktok bilong ol i kamap tru taim Rapatona i autim tiket bilong PTC, 5-3 long Sande.

Insait long dispela gem, ol boi Rapatona i bin namba wan lain long sutim gol. Dispela gol i kamap 5-pela minit tasol insait long namba wan hap. I no long-taim, Rapatona i kikim namba tu

gol. Bihain long 15 minit, ol boi Rapatona i kikim namba tri gol bilong ol. Klostu long pinis bilong namba wan hap bilong pilai, ol boi Rapatona i kikim namba foa gol bilong ol. Skoa i stap olsem Rapatona 4 na PTC 0 taim namba wan hap bilong pilai i pinis.

Long namba tu hap, ol boi bilong PTC i no wari. Ol i no tingting tumas long 4-pela gol bilong ol Rapatona. Ol i tingting tasol olsem ol i gat sans yet long soim Rapatona olsem dispela 4-pela gol bilong ol i samting nating.

Strongpela tingting bilong ol i mekim ol Rapatona i kalap nogut

taim Pisa Kelly i pairapim golmak bilong ol. Ol Rapatona i kalap nogut gen taim Chris i kikim namba tu gol na long namba tri taim, Chris i pairapim gen namba tu gol bilong em. Skoa long dispela taim i bin stap olsem Rapatona 4 na PTC 3.

Tasol strong bilong ol boi Rapatona i no pinis. Ol i kikim namba 5 gol bilong ol taim wanpela pilaia bilong PTC i holim bal klostu long mak bilong em. Willie Bera bilong Rapatona i kisim dispela penelti kik na putim skoa bilong Rapatona i go antap long 5 na PTC 3. Hatwok bilong PTC i lus taim

referi i winim wisil long pinis bilong pilai.

Long ol narapela gem, risev gret bilong Elkom i winim Rapatona, 1-0, anda 16 tim bilong Peter Chalapan i winim PTC, 2-0 na long divisen bilong ol meri, Guria i winim Kalibobo, 1-0.

Presiden bilong Goroka Soka Asosiesen, Mathew Waram i tok tenkyu long olgeta manmeri, opisal na klap long mekim dispela yia olsem wanpela gutpela yia bilong soka.

Em i tok gren fainal long dispela yia i bin kamap gut tru. No gat wanpela kros o pait i kamap

namel long ol pilaia na sapota.

Tasol em i no amamas long opis bilong W.D & H.O Wills bilong Goroka long i no givim wanpela bikpela praise em ol i promis long en. Na tu em i no amamas long ol bikman long Isten Hailans provinsal gavman. Long wanem, ol i bin promis long kamap na lukim gren fainal, tasol ol i no kamap.

Em i tok ol bikman bilong provinsal gavman na ol bisnis haus i mas luksave olsem soka em i wanpela spot we i save stopim ol yangpela long bikhet nabaut. Olsem na ol i mas lukluk na helpim wok soka long Goroka.

Siaman bilong Numai kot long paulim pablik mani



• Siaman bilong Sual Soka Asosiesen, Bol Sine long lephan na siaman bilong olupela Numai Spot Asosiesen, Adolf Siki.

MICHAEL KOMA i raitim

SIAMAN bilong olupela long Sinasina Distrik Numai Spot Asosiesen bilong Simbu provins,

Adolf Siki bai kamap long Kundiawa Distrik Kot long paulim pablik mani.

Dispela long wanem

em i bin makim Numai Spot Asosiesen na

kisim wanpela sek inap long K1,000 long Simbu provinsal gavman. Em i kisim dispela sek long mun Jun long dispela yia.

Mista Siki i tok em i givim dispela mani i go aut olsem prais long 8-pela soka klap long wanpela resis.

Tasol kodineta bilong Suai Soka Asosiesen, John Kumul i tokim kot olsem dispela mani i bin kam long nem bilong Numai Spot Asosiesen. Na sapos dispela mani i go long han bilong Siki, orait dispela i no gutpela tumas.

Kumul i bringim dispela samting i go long ol plisman long Kundiawa long mekim wok painimaut.

Numai Spot

Asosiesen i stat long las yia. Bihain tasol long em i stat, ol opisal i askim Simbu provinsal gavman long givim K1,000 long ol.

Pastaim long Simbu provinsal gavman i bin lukluk long askim bilong ol, ol opisal i pasim dispela asosiesen na go joinim Suai Soka Asosiesen.

Suai Soka Asosiesen i bin holim wanpela soka resis long Sinasina Distrik long dispela yia. John Kumul wantaim ol eksekutiv bilong em i ranim dispela resis.

Taim Simbu provinsal gavman i givim K1000 i go long Numai Spot Asosiesen, ol opisal bilong Numai i lusim Suai Soka Asosiesen. Na Siki i kisim dispela

mani na givim i go long 8-pela klap husat i stap insait long dispela resis.

Mista Kumul i bringim dispela samting i go long han bilong kot bihain tasol long ol eksekutiv bilong Numai i mekim kain kain samting.

Em i tokim pinis ol plisman long Kundiawa long painimaut long na sasim ol eksekutiv bilong Numai Spot Asosiesen.



Nesenel bodi givim namba long narapela referi

WANPELA referi bilong Mosbi i bin kisim luksave bilong PNG Soka Referis Asosiesen (PNGSRA) long wok referi long las wiken.

Presiden bilong PNGSRA Mark Kelep i bin givim Nesenel Referi Bes long Julius Kiwilik. Kiwilik i bilong ples Lari long Buang, Morobe provins.

Kelep i tok wok bilong kisim nesenel referi bes i no isi.

"Planti referi i save pait long kisim dispela bes tasol mipela i no inap givim long olgeta. Wanem referi i soim strongpela bilip long wok na i wanpela bel isi mar mipela bai lukluk na givim em namba," em i tok.

Kiwilik i stat mekim wok soka referi long 1988 olsem wanpela junia. Na long 1990, em i go antap na kamap level 2 referi. Na long las yia, ol i givim em tes na Kiwilik i winim tes bilong level 2.

Dispela namba o mak i olsem Kiwilik inap lukautim ol bikpela pilai long kantri olsem ol nesenel o klap sempionsip. Kelep i tok ol bai



• Presiden bilong Papua Niugini Soka Referis Asosiesen, Mark Kelep long ralthan i givim PNGSRA bes i go long Julius Kiwilik pastaim tasol long em i lukautim bikpela A gret kik namel long Guria na Yunivesiti long Sande. Guria i bin win, 4-1.

traim em long lukautim sampela gem long taim bilong klap sempionsip long Lae.

Na sapos em i wok gut, PNGSRA bai givim nem bilong em i

go long FIFA olsem wanpela lainsmen long 1994.

Kelep i tok PNGSRA i makim Kiwilik bikos ol i gat bilip long em. Kiwilik i no man bilong komplem. Em i save

stap oltaim long ples bilong pilai na sapos wanpela referi i no kamap, em bai kisim ples. Kiwilik i man bilong askim kwesten sapos em i no save long sampela samting.

BENSON & HEDGES SOCCER

Albert helpim Guria na wilwilim ol sumatin

WINIS MAP I raitim

LEK bilong yangpela Paul Albert i bin helpim Guria long autim Yunivesiti, 4-1 long Mosbi las wiken.

Albert i soim tru stail bilong ol strai-ka taim em i brukim umben bilong ol sumatin tripela taim. Albert i soim planti manmeri olsem em i gat stail long wokim golkipa bilong Yunivesiti, Francis Kuper i longlong taim em i sutim namba wan gol.

Long namba tu hap, Guria i soim moa pawa na Albert i ron long fil olsem wanpela dok i hangre long abus. Kain ron i mekim na em i sutim namba tu gol. Albert i bin sutim namba tri gol taim Martin Laviong i kikim bal long sait i kam insait long maus bilong umben. Bal i go pas long pos na kam bek stret long lek bilong Albert. Em i no westim taim na bomim umben bilong Yunivesiti.

Namba 4 gol bilong Guria i bin kam long yangpela intanesenel pilaia, Charlie Api. Dispela gol bilong Charlie i bin wokim planti sapota i kirap nogut. Planti i no bilip taim bal i go pas long umben. Bikos Api i kikim klostu long namel bilong fil na bal i go pas stret long umben.

Yunivesiti i bin wok hat na sutim wanpela gol. Dispela gol i bin kam

long Batman Furegi. Batman i wokim planti gutpela stail tasol beklain bilong Guria i no larim em long sutim gol.

Ol sumatin i bin lusim tupela strongpela pilaia bilong ol. Pilaia na kosa, Joe Turia na Noel Vari i no bin kik long las wiken. Turia i no kamap long pilai bikos em i gat wok. Vari i kamap long fil tasol em i gat bagarap olsem na em i no kik.

Yunivesiti i kamapim gutpela kik tasol ol i no painim rot bilong go insait long umben bilong Guria. Ol lain husat i kamapim gutpela kik bilong Yunivesiti em Russel Nari, Joe Aisi na Beno Nono long beklain. Long midfil em Malakai Kupeson, Desmond Waku, Furegi na Tembi Simongi. Straika Steven Mune i wokim sampela gutpela stail tasol Ronald Simon i banisim gut umben na stapim Mune long sutim gol.

Long Guria, Geno Vevao na Albert i kamapim gutpela kik long franlain. Taim Eli Mali na Simon Emmanuel, Martin Laviong na Erick Petrus i lukautim midfil. Beklain i bin stap long lukaut bilong Adam Lema, Api, John Folo na stail mangi bilong Nu Ailan, Vosap Eremas.

Dispela win i helpim Guria long go wetim gren fainal. Guria bai pilaim wina bilong Kurti Andra na Yunivesiti long narapela wik.



• Enock Pokarop bilong Rapatona husat i givim beksait long kemera i lukluk long wan pilaia bilong em i hetim bal. Rapatona i no bin strong na Kurti Andra i winim ol long 3-2 skoa.

Mosbi laikim ol nupela eksekyutiv

POT Mosbi Soka Asosiesen (PMSA) bai holim bikpela kibung

AGM bilong en long Tunde, 20 Oktoba.

Dispela kibung bai kamap long Waigani Spots Komplek, long hap pas 7 long apinun.

Seketeri bilong PMSA, William Vui i laikim olgeta presiden o klap opisal bilong wan wan klap long kamap long dispela kibung.

PMSA i gat tupela ajenda tasol bilong tok tok long AGM. Namba wan samting em ripot bilong odita long mani

riport bilong 1990 na 1991. PMSA bai givim ripot bilong mani ol i yusim long dispela tupela yia.

Narapela samting em long makim ol nupela opisal bilong lukautim wok bilong PMSA long neks yia. Long dispela taim bilong kibung, ol bai makim nupela presiden, namba tu presiden, namba tu seke-teri, tresera na namba tu tresera.

Seketeri i laikim ol klap long givim nem

bilong ol man sapos ol i laikim ol long holim wanpela wok bilong PMSA. Nem bilong ol dispela lain i mas kamap long opis bilong em pastaim long 4 klok long Mande, 19 Oktoba.

PMSA bai skelim ol dispela nem long taim bilong AGM na makim ol nupela opisal bilong wok long 1993.

Narapela samting em gren fainal bilong Mosbi soka bai kamap long Oktoba 25.

Albert brukim bun yet wantaim Guria Mosbi

STORI BILONG PILAIA

WINIS MAP I raitim

Nem: Paul Albert.
Krismas: 22 yia.
Ples: Mur.
Distrik: Saidor.
Provins: Madang.
Klap: Guria (Mosbi).
Posisen: Straika.

PAUL Albert i bin stat kik long 1983 taim em i wokim gret 7 long Brahman haikul. Em i kik yet long skul inap long 1986 taim em i pinisim gret 10 bilong em.

Em i no bin kik long 1987 tasol long 1988, em i go long Hagen na pilai wantaim anda 16 tim bilong Wantoks.


Long dispela yia yet, Albert i bin makim Hagen long bikpela kik bilong ol anda 16 divisen.

Long 1989, ol klap opisal i luksave long kik bilong Albert na askim em long pilai long sinia divisen.

Long 1990, em i lusim Hagen na kamap long Mosbi. Em i go na join- ing Nali soka klap long kik long namba wan divisen. Em i kik yet wantaim Nali long 1991. Tasol Nali i no givim nem long pilai long dispela yia olsem na em i go joinim Guria.

Paul i bin makim Mosbi long 1991 na go pilai long Cairns long kik bilong Stratford Kap.

Nau yet Paul i gat bikpela laik long kisim Guria i go long gren fainal na winim sil



• Paul Albert ... laik makim Mosbi na Papua Niugini long ol sampela bikpela kik.

bilong Mosbi soka. Narapela samting Paul i laikim em long winim gen Benson & Hedges

Kap long resis bilong PMSA sempionsip. Guria i noim yet dispela kap. Paul i gat sampela

tingting long makim Mosbi na Papua Niugini long sampela bikpela kik.



BENSON & HEDGES SOKA

Wantok

INSAIT

long ol SPOT

• Mosbi, Rabaul na Lae sofbal ripot...p23

• OI PTC meknais gen long Goroka ...p26

• Enga lukluk long klap sempion ...p25

• Sans bilong Guria long win...p27



Eremas soim rot...Stailboi bilong Mosbi Guria, Vosap Eremas long lephan i kalap long kikim bal taim Batman Furegi bilong Yunivesiti i flai i kam insait long stapim em. Guria i winim dispela pilai, 4-1 long las wiken na i go wetim nau gren fainal. Foto: Ivan Bayagau.

PORT MORESBY SOCCER ASS.

PRELIMINARY FINALS

SATURDAY: OCTOBER 17, 1992

First Knockout:

TIME	DIVISION	GRD	Wanpac	vs	Guria	3 vs 4
9:00	U19	B1	B/Kumul	vs	Maset	1 vs 2
10:30	U19	B2	Kinhill K	vs	Wallya	3 vs 4
4:00	Second	B2	Flaka	vs	Hoods	1 vs 2
10:30	Second	B2				

Sunday: October 18, 1992

10:30	Women B	B1	Taranga	vs	Kuri-Anda
1:45	Reserve	B1	Guria	vs	Golo
11:15	Women A	B2	Guria	vs	Wanzai
1:00	First	B2	Mookasi	vs	PTC
3:00	Premier	B2	Uni	vs	Kuri-Anda

GATE FEES: Saturday: K1.00/person
Sunday: K1.50/person

Note: Loser of 3rd vs 4th drops out automatically. The winners of 3/4th plays the loser of 1 & 2 match.

Fainal 21 tim resis long Mosbi pablik sevan soka

... na 5-pela nupela klap gen givim nem long kik

FRANCIS ULIAU i raitim

I GAT 21 tim i baim pinis K150 afiliisen fi bilong resis long 1992 Mosbi pablik sevan soka.

Na wanpela strong-pela nem tim bilong las yia, PTC i no inap resis. Long wanem, ol i no baim klap afiliisen fi bilong ol. Narapela tim bilong las yia husat i no inap pilai tu long dispela yia em Health.

Presiden bilong Mosbi Pablik Sevans Soka Asosiesen (PMPSSA), Francis Kasau i tok dispela i no kamapim wanpela hevi. Bikos long dispela yia i gat 5-pela nupela klap tu i givim nem. Tupela i gat tim bilong ol man tasol na tripela i gat tim bilong ol man na meri wantaim.

Mista Kasau i tok ol nupela klap husat i gat tim bilong ol man na meri wantaim em Works, Labour/CIS na Harbours Board. Orait ol nupela lain husat i kamapim tim bilong ol man tasol em Copra Marketing Board

(CMB) na Police McGregor.

Tripela narapela klap husat i wokim tim bilong ol man tu long dispela yia em ol nius-boi bilong NBC, dipatmen bilong Praim Minista na Teachers (ol lain tisa ya).

Tupela klap husat bai wokim tim bilong ol meri tasol em ol lain bilong kisim takis long Taxation na Housing.

Olgeta narapela tim insait long resis bilong pablik sevan soka nau em Education, NBC, DCA, Home Affairs, PNGBC, Teachers, Justice/AG, DPM, Prime Minister's Dept, N P F, Works, Labour/CIS, Elcom, Lands na Harbours Board.

Dispela i bringim namba bilong ol tim i kamap olsem 19 tim bilong ol man na 18 bilong ol meri. Na dispela i min olsem ol pilai inap kamap wanpela o tupela taim long wanpela wiken. Tasol dispela i stap yet

bilong AGM bung long toktok na skelim.

Dispela bikpela kibung o AGM bai kamap long Klab Jemania long Mande, 26 Oktoba long 4 klok apinun. Na olgeta mausman bilong wan wan klap i mas go long kibung. Bikos ol toktok bilong fainal dro na resis long sisen bai kamap tu long dispela taim.

Presiden Kasau i tok las de tu bilong baim ol rejistresen fi bilong ol pilai em long Fraide apinun long 6 minit i abrusim 4 klok. Olgeta klap eksekutiv i mas kamap wantaim tim lista bilong moa long 20 pilai na ol wan wan K5 bilong ol.

Em i tok man bilong toktok wantaim na stretim ol dispela samtimg em Francis Sakala long telpon namba 26 7178.

"Mipela i no inap oraitim wanem tim i kamap wantaim lista bilong ol pilai we i daunbilo long 20 pilai na i no gat K5 rejistre-

sen fi bilong ol wan wan pilaiia," Mista Kasau i tok.

Na ol pilai bilong dispela yia bai stat long 31 Oktoba long Klab Jemania.

Em i tok olgeta tim i mas gat 5-pela PMSA pilaiia tasol long wan wan gem. Wanem asosiesen i abrusim dispela namba bai kisim taim long lusim poin o kisim narapela mekim save.

Mista Kasau i bin amamas tu long lukim ol lain plisman i kam insait long soka resis bilong dispela yia. Em i tok dispela i soim olsem ol i gat bikpela laik long bung wantaim ol pablik sevan na helpim soka namel long ol yet.

Long dispela taim, Mista presiden i askim olgeta kosa na menesa bilong wan wan klap long kamap long wanpela spesel kibung wantaim FIFA referi, Samar Asagum. Dispela kibung i bilong toktok long ol nupela lo bilong soka.





RUGBY

Namba 70

Fonde, October 15th, 1992.

LIG NIUS

Spiders lus wantaim stail




• Oi Spiders pilala wantaim kepten Mathias Kin long raithan (baksait lain). Oi i lus long Mosbi Difens 24-18, tasol ol soldia boi long Mosbi i pillim stret strongpela takel bilong ol. LUKIM RIPOT LONG PES 2 NA 3. Foto: Ben Taumai.

CAMBRIDGE CUP

P.N.G. Big League

Lloyd Robson oval meknais long opim gren fainal



• Tripela Kumul pilaia i mas wantaim flek bilong PNG. Long lephan i go long rait em faiv eit Tuksy Karu, senta Richard Wagambie na winga Joshua Kouoru. Ol i joinim ol yangpela manmeri wantaim plis ben na mas raun long Lloyd Robson oval. Poto: Ivan Bayagau.

LLOYD ROBSON Oval i bin meknais wantaim gutpela kala na planti gutpela pilai long las Sande.

Kain kain pilai i bin kamap long opim gren fainal bilong Cambridge

Kap namel long Lae Spiders na olupela sempion, Mosbi Difens. Difens i winim Spiders 24-18 long wanpela strongpela gem stret.

Stat long moning yet, ol kain kain pilai i kamap

olsem 7 asait resis. 1992 maina primia tim, Air Niugini i winim Wes na autim K150 prais mani bilong dispela resis.

Long ol arapela pilai ol resis o riley em Wes wantaim ol smok balus

pilaia olsem Michael Toivita i winim. Air Niugini i kam namba tu.

Bikpela senis i kamap long las minit taim Toivita i abrusim Duffy Mase long kisim namba wan ples. Dispela em long fainal bilong ol riley resis.

Ol yangpela bilong Mosbi Skulbois Lig na Hanuabada i soim tu stail bilong ol we ol manmeri i mangalim stret.

Bikpela so stret bipo long 4 klok apinun we gren fainal i stat em mas. Plis ben bilong Kilakila bareks i go pas long mas. Na ol yangpela meri i karim sain bod i gat nem bilong 16 senta husat i resis long 1992 Cambridge Kap tonamen.

Namel long ol em bikpela ka i karim Cambridge Kap.

Na tu namel long fil em ol yangpela i lainim bikpela flek stret bilong PNG, na bihain ol i larim planti handred balun i go antap long skai.

Ol plisman i kamap tu wantaim plis dok bilong ol. Na ol plis dok i soim stail bilong kalapigo insait long ring em paia i lait ausait long en.

Na tu ol tupela plisman wantaim wanpela plismerina plis dok i soim sotpela pilai o drama we raskol i laik stii, na plis dok i kam holim pasim em.

Sampela minit bipo long gren fainal i stat, bikpela Gasabalus bilong Papua Niugini Difens Fos flai i kam antap long Lloyd Robson oval na tromoi ol balun i kam daun.

Long Morata na i go long Madang

Mamane driman long putim Kumul jesi



LONG stail bilong karim man na ran olsem buldosa masin na ol i kolim em 'Dosa'.

Eric 'Dosa' Mamane bilong ples Hamori long Kainantu distrik bilong Isten Hailans provins i stat mekim nem nau long pilai ragbi. Dispela em long resis bilong Madang Winfield Lig.

Nau yet em i gat 27 krismas na i makim Madang long planti taim pinis.

Mamane i nogat tingting o laik long pilai dispela gem we i kamap nesanel spot nau bilong Papua Niugini. Em i traim tasol, na nau em i wanpela strongpela pilaia bilong Madang.

Mamane i stat pilai long namba 2 divisen bilong Morata K Klap, Mosbi 1986. Dispela em wanpela bikpela op sisen lig resis.

Dispela taim Mamane i joinim tu Nesanel Kapitel Distrik Ragbi Lig, husat i join pinis wantaim Mosbi Winfield Lig.

Mamane i holim pasim ai bilong ol selekta na ol i putim em insait long NCD Kantri tim, na pilai long 1986 na 1987 Sauten Son trails.

Mamane i lusim Madang na i go joinim Royals klap bilong Madang Winfield

Lig.

Long ol strongpela buldosa stail ran na em i makim Madang long tripela yia nau long Noten Son trails. Dispela em long 1990, 1991 na 1992. Mamane igat nem pinis long stap insait long Noten Son tim.

Namba wan intanesanel gem bilong Mamane long 1991, taim em i stap insait long Noten Son tim na pilai egens Frans Roosters long Madang.

Insait long dispela gem, Mamane i lainim planti samting long ol bikpela gem.

Olsem ol arapela pilaia, em i wet yet long putim wanpela Kumul jesi.

Namba wan gren fainal long wanpela gutpela resis em Mamane i pilai insait long en em long 1992. Em wantaim ol arapela wan pilaia i strongim Royals i go long winim 1992 Madang Winfield Lig primia taitel.

Dispela wiken Mamane bai soim stail bilong em long Lae long Noten Son trails. Olsem ol arapela pilaia, em bai pilai strong moa long holim pasim wanpela posisen insait long Noten Son tim, na go pilai raun long Not Kwinslen, Australia.

Narapela wiken bai Royals tonamen i kamap long Madang stat lon Fraide Oktoba 23. Mamane bai go pas gen long tim bilong em long winim dispela Royals tonamen.

Mamane i tok wanpela samting tasol i helpim em long mekim nem nau em long harim tok bilong kosa na trena oltaim long taim bilong trening. Na tu long tingting strong long trening, na lusim pasin bilong spak na kam pilai.

Mamane i askim ol arapela yangpela pilaia long bihainim dispela pasin, sapos ol tu i laik mekim nem long ragbi lig.

Sempion klap long PNG



• Mosbi Difens ... sempion klap nau long Papua Niugini. Long 1990 ol i winim dispela taitel aninit long lukaut bilong kepten Roy Lottive, wanpela top PNG pilaia long bipo. Las Sande ol i winim gen dispela taitel aninit long lukaut bilong kepten Kes Paglipari (sindaun long fran lain wantaim bai).

Kas bilong ol boi Hagen Hawks



• 1992 Hagen Winfield Lig primia tim, Hagen Hawks. Sans bilong ol long winim Cambridge Kap i bagarap taim ol i salim kaikai long Lae Spiders 18-14 long Rabihamul oval, Hagen. Sapos ol i bin go insait long gren fainal egens Mosbi Difens long las Sande, ating ol soldia boi bai kisim taim stret. Tasol Difens i holim yet dispela taitel olsem sempion klap long Papua Niugini. Namba wan taim Difens i winim dispela taitel em long 1990 egens Rabaul Muruks. *Poto: Alphonse 'Pu.*

PNGRFL askim long Olpela Kangaroo pilaia egens tingting ripot bilong pait. bilong Kumul kosa, John Wagambie

PNGRFL bai sekap long as bilong pait bihain long Cambridge Kap fainal las Sande.

Presiden bilong PNGRFL i tok long Tunde Oktoba 13 olsem Sande i bin wanpela gutpela de stret bilong amamas, we gutpela strongpela gem bilong ragbi lig i bin kamap we i no olsem sampela taim bipo, tasol pait i kamap long pinis bilong pilai na bagarapim.

Em i to bikpela samting em pait i kamap long ai bilong Gavana Jenerel. Na dispela i givim bikpela sem stret long PNGRFL.

Em i tok wok painimaut o sekap bai karapaim olgeta samting bilong pait.

Em i tok PNGRFL i laikim ripot i kam long:

- Ol manmeri husat i kamap long lukim pilai
- Ol opisal bilong lig
- sponsa
- na ol bikman bilong gavman

PNGRFL bai glasim tu ol dispela samting:

- Ol manmeri husat i spak na mekim nabaut insait long PRL Klap Haus. Dispela i no karamapim tasol sampela memba na ol lain ol i askim long go insait long aninit long nem bilong ol. Wok sekap long dispela bai karamapim tu sampela bikman bilong kantri.

- Wanem kain we ol plisman i karimaut wok bilong ol. Dispela em long wanem kain we ol i givim oda long lukautim dispela pilai.

- Bikpela nambabilong ol man husat i nogat rait long sanap o sindaun arere long sten bilong ol pilaia wantaim ol soldia long yunifom bilong patrol, na ol sapota.

- Bikpela nambabilong ol sapota insait long pilai graun husat i no baim dua na go insait.

Olgeta ripot i mas go long dispela adres: The Secretary, P.O. Box 1095, Boroko.

OLPELA Australia Kangaroo pilaia, Steve "Blocker" Roach bilip Papua Niugini i mas yusim moa mani sapos em i laik winim Australia.

Australia em sempion bilong ragbi lig long wol. "Blocker" i stap nau long PNG long kempen bilong Coca Cola.

Roach i tok PNG i mas tromoi moa mani long baim ol gutpela kaikai, samting bilong trening olsem ain bilong apim, na ol arapela spesel progrem bilong Kumul.


Em i egens toktok bilong kosa John Wagambie olsem Kumul bai winim Kangaroo long narapela Tes gem em bai i kamap long 1994 long PNG.

Roach ting PNG i no inap long winim Kangaroo bikos Kangaroo i gat ol bikpela pilaia winim PNG. Na tu ol Kangaroo pilai i ken sanap long takel na autim bal.

Em i tok PNG i mas yusim moa mani bipo olgeta samting i stret long Kumul i winim Kangaroo. Dispela em long sait bilong trening tingting bilong ol pilaia tu. Em i tok long pilai ragbi, wanpela tim i ken winim gem bipo long pilai.

Tasol olpela Kangaroo na Balmain Tigers pilaia i amamas long pilai bilong Kumul. Em i tok ol Kumul pilaia i liklik long sais. Tasol ol i save pilai strong tru. "Ol i soim olsem ol i gat strong tu taim ol i winim Gret Briten na Nu Silan."

Em i tok wanem samting PNG i mas mekim nau em long salim moa pilaia i go pilai long strongpela Sidni Winfield Lig resis. Na tu ol kosa bilong kantri i mas go trening long ol arapela kantri husat i save pilai ragbi



• Steve "Blocker" Roach bungim na toktok long ol studen bilong Gerehu haikul, Mosbi long Tunde Oktoba 12. *Poto: David Rom.*

Ol Cambridge Kap gren fainal poto



• Gavana Jenerel Sir Wina Korowi i sekan wantaim kepten bilong Lae Spiders Mathias Kin, na bihain Kin soim ol pilala bilong em.



• (ANTAP) - Kepten bilong Mosbi Difens, Kes Paglipari i soim fulbek bilong em Joe Uvilimè husat i sekan wantaim Gavana Jenerel Sir Wiwa Korowi. Long raithan em presiden bilong PNGRFL, Joe Keviamé.

• (LEPHAN) - Senta bilong Lae Spiders Charlie Vee wantaim kepten Mathias Kin long baksait i laik takelim John Mukale bilong Mosbi Difens. Tasol takel bilong tupela i popaia na ol soldia boi i win 24-16.



• Ol Spiders pilaia i karakum stret long Kumul winga bilong Difens Jack Uradok, na huka Ronald Vue (raithan) i kam insait long helpim Uradok. Ol Spiders i takel olsem long las Sande.



• Referi i apim han na makim huka bilong Difens Ronald Vue long hap bilong tepim bal na ran. Vue i pilal gut tru na tilim bal i go i kam long ol fowat pilala.

THE BIG ONE



**CAMBRIDGE CUP
P.N.G. Big League**

Brasher joinim Kangaroo long namba wan taim



Planti kalap nogut long seleksen bilong yangpela Balmain senta

PLANTI yangpela pilaia bai amamas nogut tru taim ol selekta i makim ol long stap insait long nesanel skwat long namba wan taim. Tasol yangpela Tim Brasher, husat i gat 21 krismas i no bilong olsem taim ol selekta i makim em long makim Australia long namba wan taim.

Em i amamas liklik tasol taim ol selekta i kolim nem bilong em long Wol Kap tim.

Dispela pasin i soim bikpela salens Brasher i bin bungim taim em i stat pilai long A gret resis bilong Sidni Winfield Lig. Foapela yia i go pinis, em i joinim Sidni lig bihain long em i lusim skulbois.

Long pinis bilong 1989 sisen, Brasher i bin wanpela yangpela pilai tru long pilai long gren fainal. Dispela em long taim em i gat 17 krismas tasol.

Em i no bilip olsem wanpela de em bai makim Australia.

Planti manmeri i lukim olsem ol yangpela pilaia bilong Brasher bai stat mekim nem long 10-pela yia bihain. Tasol Brasher stat mekim nem nau long 1992.

"Mi pilim mi mas makim Australia nau o nogat bai mi no gat moa sans long bihain taim," Brasher i tok olsem na putim jesi bilong Australia Kangaroo namba wan taim. Pes bilong em i soim liklik amamas taim porograpa bilong mipela i laik kisim poto bilong em.

Driman bilong Brasher i karim kaikai bihainim toktok bilong kosa bilong em long Balmain, Alan Jones.

"Yu ken kamap Tim Brasher, senta bilong Balmain o Tim Brasher olsem wanpela intanesenel pilaia - em laik bilong yu tasol," Jones i tok.

Brasher i bihainim dispela hap toktok bilong kosa bilong em.

Jones i bin musim Brasher long senta i go pilai long wing .. klostu bai em i stap olsem risev pilai.

"Mi no bin amamas long dispela long dispela taim tasol mi no inap stap insait long Australia tim sapos dispela i no bin kamap," Brasher i tok. "Ating bai mi stap yet long wing na wetim sampela sans long kamap o tingting stret na traim long mekim sampela samting long painim sans."

Brasher i stap yet long wing na skoarim 16 trai olgeta long 1992 sisen. Dispela i winim tru ol arapela pilaia bilong Sidni Winfield Lig resis.

Brasher i ken tingim olsem em i skoarim wanpela trai tasol long wing.

"Planti trai mi skoarim taim mi ran i go insait long fowat lain," em i tok. "Planti taim mi no pilai stret long posisen bilong mi."

I gat bikpela bilip olsem Brasher bai kisim ples bilong olupela Balmain na Kangaroo fulbek, Garry Jack.



Patimos soim stail long Cambridge Kap gren fainal • Bikpela fowat bilong Mosbi Difens Simon Patimos i givim sisti wantaim bal long lephan i go antap long banis bilong Lae Spiders long Cambridge Kap gren fainal las Sande long Mosbi. Wan pilaia na faiv eit Tony Daple i opim maus na singautim Patimos long lukaut gut o samting olsem. Spiders pilaia long raithan laik ran i kam insait long takelim Patimos. Difens i win 24-16. Poto Ivan Bayagau.

1992 top pilaia na kosa awot

PNGRFL wetim ol memba senta long nem bilong pilaia na kosa

PNGRFL i wetim yet ol memba lig long givim nem bilong wanpela pilaia na kosa. Dispela em long makim namba wan pilaia 'Player of the Year' na 'Player of the Year' awot.

Jim Jacobi awot bilong top pilaia na Jim Jacobi wot bilong top koa bilong yia em wanpela aidia bilong Papua Niugini Ragbi Futbal Lig long luksave long helpim bilong ol pilaia na kosa, long kamapim bikipela ragbi lig insait long PNG.

Awot bilong top pilai i bin stat long 1985. Na bilong kosa i bin stat long 1990.

PNGRFL bai tokaut

BARBARA TOMI i raitim

long top pilaia na kosa long wanpela bikipela bung, embai kamap long Novemba 28.

Wan wan lig bai givim nem bilong wanpela pilaia husat ol i ting i pilai gut tru long dispela yia winim ol arapela pilaia. Natu nem bilong wanpela kosa em ol i ting i givim bikipela helpim long kosim ol pilaia long 1992 sisen.

Presiden bilong wan wan memba lig yet bai go pas long makim ol pilaia na kosa, na bihain givim tupela nem (kosa na pilaia) i go long PNGRFL.

Sampela jas bai skelim ol dispela nem. Na bihain bai PNGRFL i askim dispela pilaia na kosa long kamap long bung bilong Novemba 28 long kisim awot.

I gat bilip olsem nesanel selekta bilong Australia na olpela Kangaroo pilaia, John Raper bai kamap tu long bung bilong givim awot.

Na bikipela kibung (AGM) bilong PNGRFL bai kamap long de bipo long bung bilong givim awot.


Administreta bilong

PNGRFL, Jack Metta i askim nau olgeta memba lig long baim nominesen o memba fi bipo long AGM.

Askim i kam tu olsem ol dispela lig i mas stretim olgeta wok bilong ol bipo long AGM. Wan wan lig i mas holim AGM na stretim ripot bilong ol bipo long nesanel AGM.

Metta i tok em salim pinis fom long ol klap na lig long memba, tasol em i no kisim wanpela bekim yet.

Buka em wanpela lig tasol husat baim ful memba fi, na tu givim ful ripot bilong kamap memba long 1993 sisen.



Kinnogatrot - Hap bek bilong Mosbi Difens na wan pilaia i holim pasim gut tru kepten bilong Lae Spiders, Mathias Kin long gren fainal bilong 1992 Cambridge Kap las Sande long Lloyd Robson oval. Long kain stail olsem na ol soldia boi i win 24-18.



• Wanpela opisal bilong Mosbi Winfield Lig, Benny Gamoga (Iephan) na narapela opisal i sanap antap long ka i karim bikipela Cambridge Kap raun long Lloyd Robson oval las Sande. Dispela i bin kamap bipo long gren fainal.

Seagulls risev gret autim Vanimo taitel

Namba tu yia bilong holim pasim sil

RISEV gret bilong Seagulls i autim ken gren fainal bilong Vanimo ragbi lig egens Tigers long las wiken.

Seagulls i pilai strongpela gem na rausim tiket bilong Tigers 27-18. Seagulls i winim gren fainal bilong risev gret long tupela yia olgeta nau.

Las yia em i winim Hawks. Long stat bilong 1992 sisen, Seagulls i tingting strong long holim pasim dispela nem gen. Olsem na las Sande dispela driman i karim kaikai bihain long strongpela hatwok.

Ol pisin bilong solwara i gat bikipela bilip olsem ol bai autim gen sil na pilai strong tru. Ol i pilai gutpela gem long namba wan hap na skoarim 22 poin olgeta. Tigers i skoarim 8-pela poin tasol.

Tigers i no pilai gut long namba wan hap. Tasol long namba tu hap, ol pilaia bilong em i kam long bihain na bagarapim stret sindaun bilong Seagulls.

Oliskoarim 10-pela poin na Seagulls iskoarim 5-pela poin. Tigers i traim long skoa moa tasol taim i sot, na Seagulls i autim tiket bilong ol.

Planti skoa bilong Seagulls i bin kam long gutpela beklain pilai. Beklain bilong Seagulls i gutpela tru long resis bilong risev gret long Vanimo lig.

Ol lain husat i save kamapim das long beklain em George Tobudy, Suruman Zegedy, Daniel Igata, Ather Walkum na Gabriel. Igata na Tobudy i save poroman gut tru long senta.

Las Sande tupela i pretim stret banis bilong Tigers wantaim ol gutpela ran na sait step bilong tupela.

Tigers inap long win tasol ol i bin guria liklik long namba wan hap. Olsem na Seagulls i winim ol. Tigers i gat gutpela ol pilaia olsem Maraha Maii, Joe Windu, Patrick Neqz, Joel Gedi, Knox Taiyo, Bale Andaya, Jonathan Witika na kepten Simon Seuve.

Bilip long senisim Noten Son resis

I GAT bilip olsem long neks yia, ol opisal bai brukim Noten Son trails i go long 4-pela grup olgeta.

Dispela i min olsem Madang bai salensim Ramu, Wewak bai bungim Vanimo, Kainantu bai pilaim Wau/Bulolo, na Lae bai traim pawa bilong Morobe Kantri.

Long ol dispela 8-pela senta, ol bai makim 4-pela tim tasol long salens long inta son trails.

Seketeri bilong Madang Winfield Lig, Oba Ririobe i tokaut long dispela long dispela wik.

Em i tok 4-pela tim tasol bai bung long nokaut raun. Ol lusabai hangamapim su na wina bai bung long fainal. Na bihain bai ol selekta i glasim wanwan pilaia bilong dispela 4-pela tim long stap insait long Noten Son tim bilong son sempionsip.

Ragbi Lig Nius i no inap long kisim tingting bilong Noten Son Lig presiden, John Numapo long dispela.

I gat bilip olsem ol bikman bilong Noten Son bai paitim toktok long dispela tingting pastaim, na bihain bai wanpela tok orait i kamap.

Madang makim 20 pilaia skwat bilong Noten Son trails

MADANG Winfield Lig i makim pinis 20 pilaia tim bilong makim Madang long namba tu inta son trails dispela wiken.

Dispela namba tu son trails bai i kamap long Lae long Fraide 17 na Sarere 18, Septemba. Bihain long dispela resis bai ol selekta i makim wanpela tim. Dispela tim bai makim Noten Son na pilai raun long Not Kwinnslen, Australia.

Toktok i no stret yet long wanem taim bai dispela pilai raun i kamap. Sampela ripot i tok pilai raun ya bai i kamap long pinis bilong dispela yia o stat bilong narapela yia.

Sempion primia tim bilong 1992 sisen, Royals i pulapim 20 pilaia tim wantaim 7-pela pilaia olgeta. Na 13 pilaia i kam long ol arapela klap. Panthers i gat 4-pela, Brothers na Tigers i gat tripela, DWI i gat tupela, na Hawks i gat wanpela.

Seketeri bilong lig, Oba Ririobe i tok dispela tim i moa gutpela long tim bilong bipo long namba wan trails, husat i no pilai gut tumas.

"Nau mipela i gat wanpela strongpela tim, na mipela bilip bai mipela holim pasim ai bilong ol sapota long Lae na soim olsem Madang em top senta yet bilong ragbi lig insait long Noten rijon," Ririobe i tok.

"Ol Royals pilaia husat i no lusim yet stail bilong ol bai go pas long mipela long winim bek nem em mipela i bin lusim bipo."

Ol pilaia insait long tim em Martin Manana (Royals), Tweedy Malagian (Tigers), Lance Tirava (Panthers), Caspar Kollo (DWI), Ken Arava (Brothers), Nimex Tuna (Tigers), Ati Lomutopa (Brothers), Ambrose Gitai (Royals), Eric Mamane (Royals), Tobias Kulang (DWI), Joe Ekip (Tigers), Alois Alba (Panthers), Rex Apuka (Royals), Willie Bagore (Hawks),

Peter Avave (Royals), Danny Petrus (Royals), Job Wharhe (Royals), Brian Peters (Panthers), John Makal (Brothers) na Ruben Vinum (Panthers).

Tim bai lusim Madang aninit long lukaut bilong kosa na trena Issac Parandbo.

Ol opisal bilong tim em Mathew Nombon (tim menesa), na Bob Simon (tim dokta).

Seketeri Ririobe i tok ol pilaia husat i no pilai gut long las Madang tim i lusim posisen bilong ol, na ol selekta i kisim ol Royals pilaia. Bikos ol Royals pilaia no lusim stail bilong ol yet.

Ririobe i bilip olsem Madang bai go insait long fainal. Na dispela bai helpim long 4-pela pilaia samting i stap insait long Noten Son tim bilong go long Not Kwinnslen.

Kosa Parando i gat bikipela bilip long tim bilong em.

Australia bungim salens

KOSA bilong Australia, Bob Fulton i no gat strongpela bilip taim Wol Kap skwat bilong Australia i kisim balus i go long Inglan.

I gat sampela toktok ikamap olsem saveman bilong ragbi lig, Bob Fulton i wok long "tromoi lain" i go long olupela birua.

Tasol ol lain i save long Fulton i tok ol i gat sampela wari long sans bilong Australia long kisim bek Wol Kap egens Gret Briten Lions long Oktoba 24.

Dispela bikpela gren fainal bai i kamap long Wembli Stadium.

"Wantaim no gat planti tingting bikpela wok bilong mi olsem kosa, dispela fainal bai hat tru long winim olsem ol arapela Tes gem," Fulton i glasim bikpela gem ya olsem.

Fulton i tok Gret Briten i stap nau long namel bilong ragbi lig sisen bilong ol. Olsem

na ol i fit tru na redi long kamapim bagarap long Australia Kangaroo.

Dispela i no namba wan skwat bilong Australia. Bikos tupela biknem pilaia, Laurie Daley na Andrew Ettingshausen i no stap long skwat.

"Gret Briten i gat bikpela sans, mipela i no gat sans," Fulton i tok.

"Tasol sapos mipela i no win long Wembli, win bilong Eses bai i no gat wankain mining. Ol man i gat sotpela tingting long pilai futbol."

Taim ol pilaia husat i stap long Nu Saut Wels i kamap long dokta i sekim ol, ol pilaia bilong Broncos husat i winim gren fainal bilong Sidni Lig i no kamap. Bikos ol i wok long amamasim yet bikpela win bilong ol egens St George.

Daley o Ettingshausen i no bin

kamap tu long dokta i sekim tupela. Sampela pilaia husat i kamap i no lukim pes bilong Brad Godden tu.

Planti sapota bilong Paul McGregor, senta bilong Illawarra na tupela pilaia bilong St George, Scott Gourley na Mick Potter i no amamas long dispela Wol Kap skwat. Bikos ol dispelapilaia i no stap insait.

"Scott Gourley i no laki. Em i bin pilai gutpela gem tru long gren fainal. Tasol yu laikim husat tru bai mipela lusim? McGregor tu em i gutpela pilaia. Tasol sapos mipela kisim em, bai mipela mas lusim Jenoufo Johns. Mipela i gat 22 spes tasol, na sapos mipela kisim 24 0 26 pilaia, igat sampela pilaia bai i no inap stap insait long skwat."

Brad Fittler i gutpela long pilai long faiv eit na i no long senta, na

Kevin Walters i ken pilai long faiv eit sapos ol i laikim.

Tasol hevi bilong redi ol pilaia bipo long Wol


Kap i no wanpela samting we i stap long sait bilong Australia. Narapela samting em las taim Australia i win

long Wembli em long 1963 na 1964.

"Ol Canberra pilaia i save trening 5-pela de long wanpela wik. Ol i

amamas long strongpela gem long Wembli," Fulton i tok.

Rugby League Week



• Brad Fittler ... resis long kisim feveret faiv eit posisen bilong em.

WORLD CUP SQUAD

	Club	Age
Tim BRASHER	Balmain	21
Brad GODDEN	Newcastle	23
Willie CARNE	Brisbane	23
Michael HANCOCK	Brisbane	22
Graham MACKAY	Penrith	23
Chris JOHNS	Brisbane	28
Steve RENOUF	Brisbane	22
Mal MENINGA(c)	Canberra	32
Brad FITTLER	Penrith	20
Kevin WALTERS	Brisbane	24
Allan LANGER	Brisbane	26
Ricky STUART	Canberra	25
Mark SARGENT	Newcastle	28
Paul HARRAGON	Newcastle	23
David GILLESPIE	Wests	28
Glenn LAZARUS	Brisbane	26
Steve WALTERS	Canberra	27
Kerrod WALTERS	Brisbane	24
John CARTWRIGHT	Penrith	27
Bob LINDNER	Wests	29
Paul SIRONEN	Balmain	27
Bradley CLYDE	Canberra	22

Probable World Cup final team: Godden; Har

CAMBRIDGE CUP

P.N.G. Big League



CRACK MAIK



HEY?! TOILET
POT I NO STAP
YAH! TRAIPELA
HUL TASOL
I STAP!



TASOL EM WARI ... EM SINDAUN TASOL
NA MEKIM SAVE ...

BIARI EX!
NOGAT TOI-
LET PEPA,
TU, YAH!

SKIN BILONG
KOKONAS
TASOL I PU-
LO LAP, YA!



OL MANGI LONG PLES PAINIM PIS IKAM
NA LUK MAIK I POLUTIM SOLWARA ISTAP!

MAMA
MIA!!
KEMIKOL WEPOH
BILONG IRAKI
ATING?

INO LONG TAIM WANPELA DOK I PAINIM
ABUS NA WOKABALITIGO LONG TOILET...

NAU DOK I GO INSAIT NA LUKIM MAIK
I SINDAUN I STAP...

TAIM MAIK I LUKIM DOK, TINGTING
BILONG EM I LUS NA EM BIKMAUS IKAM
AUT NA TEK-OFF...



UMN! MI SMELIM
GUPPELA LONG HAP...
MI GO SEKIM PASTAIM!



HEY? YU GO
WET PASTAIM!

!?!



AEEE! OL DOK I
SAVE YUSIM TOI-
LET TU YAAA!!!

EMS EXPRESS MAIL SERVICE

Reliable, Affordable, Speed

..... and that's the success
of our business

Contact Willie or Rose on
27 4449/ 27 4321



Post & Telecom



REBO

TASOL REBO I NO GIVIM EM SANS... EM HOLIM EM GUT TRU NA TROMOI EM I GO AUTSAIT LONG LAIN...

NAU EM TAIM BILONG OL KILINGA LONG PILAI WANTAIM BAL... OL SAUTS I MAKIM REBO GUT TRU... TASOL EM I NO ISI MAN LONG PUN-DAUNIM EM.. WANTU EM SALIM BAL IGO...


JEFF KISIM BAL NA BRUK I GO INSAIT.. TASOL OL I HAI TAKOL LONG EM NA REF I PENELAISIM OL SAUTEN ZON...



REBO LAIKIM 2-POIN OLSEM NA EM TOKIM REF LONG PENOLTI KIK...

NAU EM STRETIM BAL PINIS, MAKIM GUT TRU WANTAIM TUPELA POS I STAP LONG WE TRU...

...NA PINISIM OLGETA MASOL BILONG LEK LONG KIKIM BAL IGO INSAIT LONG POS...



EM NAU!
WANTOK

NIUSPEPA BILONG YUMI STRET OL GRAS RUTS BILONG PAPUA NIUGINIYA!

Musik TELEVISION Komik

Palma redi long namba tu wanpis kaset

MICHAEL KOMA i raitim

"MUSIK i bin mekim na musik tasol i go inap mi lusim skul. Olsəm taim bilong mi long na mi bai bihainim graun i pinis," Dua

Palma i tok.
Dua, em i wanpela wanpis musikman bilong ples Anigl aut-sait long Kundiawa taun long Simbu provins. Na em i katim pinis namba wan kaset bilong em wantaim Pasifik Gol Studio long mun Novemba las yia.



* Palma...redi long narapela kaset gen.

Tupela singsing em yet i raitim i stap long dispela kaset em *Singel Ambai na Borowai*. Tupela singsing ya i bin kisim planti sapat long Papua Nuigini.

Na nau em i redi long katim namba tu kaset bilong em. "Mi raitim pinis planti singsing inap long katim namba tu wanpis kaset bilong mi," Dua i tok.

As tingting bilong em long mekim wok musik em long tanim ol singsing tumbuna i go long ol musik bilong tude wantaim pawa ben.

Long 1985 taim Dua i wokim gret10 long Rossary haikul, em i bin ranawe na i go pilai

ritem na bes gita bilong wanpela pawa ben, *George Brothers Band*. Na bihain long 1987, em i lusim ol na i go pilai wantaim ol *Mosquitoes* bilong Kerowagi. Em i bin pilai tu wantaim wanpela ben bilong ples bilong em, ol *Tine Gaks*.

Na nau em i save raun na pilai insait long olgeta hap bilong simbu provins wantaim ben bilong em yet ol *Stonets*.

THURSDAY - 15TH OCTOBER, 1992

6.00	STATION OPEN	
6.30	ITN NEWS	
7.00	TODAY SHOW	(G)
8.58	EMTV TOKSAVE	(G)
9.00	STATION CLOSE	
1.27	STATION RE-OPEN	
1.30	MIDDAY SHOW	
	WITH RAY MARTIN	(PGR)
3.00	KIDS KONA	(G)
	Sesame Street	
4.00	KIDS KONA	(G)
	Fat Cat	
4.30	QUICK DRAW McGRAW	
5.00	BEWITCHED	(G)
	"How Green Was My Grass"	
5.27	EMTV TOK SAVE	
5.29	EMTV NEWS BREAK	
5.30	HOME AND AWAY	(G)
6.00	NATIONAL EMTV NEWS	
6.30	A CURRENT AFFAIR	
7.00	SALE OF THE CENTURY	
7.25	CHIN H MEEN SUPER-	
	SOUND NEW RELEASE	
7.30	NEIGHBOURS	(G)
8.00	THE COSBY SHOW:	(G)
	"Theo's Holiday"	
8.30	ALL TOGETHER NOW:	
	"Baby Love"	
9.00	THE GOLDEN GIRLS:	
	"Before a 'd After"	(PGR)
9.30	MARRIED WITH	(PGR)
	CHILDREN:	
	"The Great Escape"	
10.00	HEY DAD	(G)
10.55	CHIN H MEEN SUPER-	
	SOUND NEW RELEASE	
11.00	NATIONAL EMTV NEWS	
	Replay	
11.27	MEDITATION WITH	
	PASTOR WALO ARNI	
11.30	STATION CLOSE	
	FRIDAY 16TH OCTOBER, 1992	
6.00	TEST PATTERN	
	AND MUSIC	
6.27	STATION OPEN	

EMTV

6.30	ITN NEWS	(G)	4.00	RELEASE	
7.00	TODAY SHOW	(G)	5.00	CRICKET CONT.	(G)
8.58	EMTV TOK SAVE		6.00	BEYOND 2000	(PGR)
9.00	STATION CLOSE			NATIONAL EMTV	(G)
1.20	STATION RE-OPEN		6.30	NEWS	
1.22	CHIN H MEEN SUPER-			HEY HEY IT'S	(G)
	SOUND NEW RELEASE		8.30	SATURDAY	
1.27	EMTV TOKSAVE			BOXING - LIGHT	(G)
1.30	MIDDAY SHOW	(PGR)		HEAVYWEIGHT	
3.00	SESAME STREET	(G)	10.00	TITLE	
4.00	KIDS KONA		00.00	MTV	(MAO)
	FAT CAT	(G)		NATIONAL EMTV NEWS	
4.30	QUICK DRAW McGRAW	(G)	00.27	Replay	
5.00	BEWITCHED	(G)		MEDIATION WITH	
	"To Twitch or Not to Twitch"		00.30	PASTOR WALO ARNI	
				STATION CLOSE	
5.27	EMTV TOK SAVE			SUNDAY 18TH OCTOBER, 1992	
5.29	EMTV NEWS BREAK		10.57	STATION OPEN	
5.30	HOME & AWAY	(G)	11.00	CRICKET	
6.00	NATIONAL EMTV NEWS	(G)		NSW vs S. Aust	
6.30	A CURRENT AFFAIR	(G)	1.45	LUMEN 2000	(G)
7.00	SALE OF THE CENTURY	(G)	2.15	CRICKET (cont)	(G)
7.25	CHIN H MEEN SUPER-		5.55	CHIN H MEEN SUPER-	
	SOUND NEW RELEASE			SOUND NEW RELEASE	
7.30	NEIGHBOURS	(G)	6.00	NATIONAL EMTV NEWS	
8.00	THE COSBY SHOW:	(G)	6.30	WONDERFUL WORLD	
	"Theo's Holiday"			OF DISNEY:	(G)
8.30	ALL TOGETHER NOW:		7.25	EM-TV TOKSAVE	
	"Baby Love"		7.30	60 MINUTES	(G)
9.00	THE GOLDEN GIRLS:		8.30	CHIT CHAT WITH	
	"Before a 'd After"	(PGR)		SIR PAULIAS MATANE	
9.30	MARRIED WITH	(PGR)	8.35	SUNDAY NIGHT	(PGR)
	CHILDREN:			MOVIE:	
	"The Great Escape"			"Switching Channels"	
10.00	HEY DAD	(G)	11.27	MEDITATION WITH	
10.55	CHIN H MEEN SUPER-			PASTOR WALO ARNI	
	SOUND NEW RELEASE		11.30	STATION CLOSE	
11.00	NATIONAL EMTV NEWS			SATURDAY 17TH OCTOBER,	
	Replay			1992	
11.27	MEDITATION WITH		10.27	STATION RE-OPEN	
	PASTOR WALO ARNI		10.30	SKY ROCK	(G)
11.30	STATION CLOSE		12.00	CRICKET - INTER-	
	FRIDAY 16TH OCTOBER, 1992			STATE 1-DAY MATCH(G)	
6.00	TEST PATTERN			S Aust vs Tasmania	
	AND MUSIC		3.30	GILLETTE	
6.27	STATION OPEN		3.55	CHINE H MEEN	
				SUPERSOUND NEW	

PNG TOP 20

AS AT 10/10/92

NO.	SONG	ARTIST
1 (1)	Yu Tasol	JR Kopex
2 (2)	Meri Nipsco	Leonard
3 (6)	Iau Serious Tam	Telex
4 (8)	Adisena	David Kurni
5 (4)	Meri Samarai	PS Duet
6 (5)	Iau Les	Leonard
7 (7)	Goi Vavine	Helgas
8 (10)	Kake IB Car	Simon Tazzi
9 (16)	Betty Betty	Rabby Gamenu
10 (13)	Kerema	PF Company
11 (11)	Iwarwatut	Vincep Pia
12 (9)	Aiye Aiyo	Basil Greg
13 (20)	Mi Save Wari Tru	Telex
14 (3)	Sori Pisup	Henry Kuskus
15 (15)	Sio Mama	Black Veru
16 (19)	Apinpidik	Joan Wiut
17 (12)	Lonely Makuri	Basil Greg
18 (0)	Golden Pillow	Alo Pops
19 (18)	Wan Kantri	Barike
20 (0)	Misima	David Kurni

• Ratings based on requests on Radio Kalang and not cassette sales.


Panel 1: Wantaime Chief

Panel 2: BAGA NOGUT ISI ISI TASOL I GO LONG SUZUKI CHIEF... HE! HE! HE! SANS, YAH!

Panel 3: TASOL CHIEF I LUKIMEM PINIS... HAH! YU LAIK MEKIM WANEM A?

Panel 4: AEEE! MI PINIS LONG RESIS LONG RELI YAAA! HAH! HAH! I CAR MOA?

Text on the right: EM NAU! BAGA YAH KISIM TAIM STRET!... NUPELA STORI NEKS WIK. NOKEN ABRUSIM!



BUSINESS AWARDS

The Times, Air Niugini and Travelodge wishing to promote Excellence in Business in Papua New Guinea have joined together to present three prestigious Business Awards.

BUSINESSMAN - Sponsored by Ela Motors

BUSINESSWOMAN - Sponsored by Steamships Trading Company

SMALL BUSINESS - Sponsored by Australia - Papua New Guinea Business Council

The **BUSINESSMAN OF THE YEAR** will receive two return AIR NIUGINI tickets to Brisbane with six nights accommodation at the BRISBANE CITY TRAVELODGE and a trophy donated by ELA MOTORS.

The **BUSINESSWOMAN OF THE YEAR** will receive two return AIR NIUGINI tickets to Brisbane with six nights accommodation at the BRISBANE PARK ROYAL and a trophy donated by STEAMSHIPS TRADING COMPANY.

The **SMALL BUSINESS OF THE YEAR** will receive two return AIR NIUGINI tickets to Cairns with five nights accommodation at the PALM COVE TRAVELODGE and a trophy donated by the AUSTRALIA - PAPUA NEW GUINEA BUSINESS COUNCIL.

Nominations for these awards should be made on the form below and sent to: The Times Business Awards, P.O. Box 1982 BOROKO, N.C.D.

All nominations will be treated by the panel of judges in the strictest confidence.

"Businessman, Businesswoman and Small Business of the year"

Name of the Business person: Name of Business he or she operates:

Address of the Business he or she operates: Telephone:

Time since business commenced years

Nature of business:

Your reason for nominating he or she to be BUSINESS PERSON OF THE YEAR (eg: Created new job, created new export market, found new uses for local produce and mentioned its special achievements)

.....
.....
.....

* Please tick the box below to identify the award you are nominating.

(1) Businessman

(2) Businesswoman

(3) Small Business

Nominated by Name: Address: Telephone:

EXPORT AWARD:
The prize winner will receive two return air ticket to Brisbane courtesy of Air Niugini with six nights accommodation at DOCKSIDE PARK ROYAL APARTMENTS OF TRAVELODGE HOTELS.

Note: Growth in turnover, profitability, employment and the type of business are essential considerations. So be specific when nominating.

Nominations close on October 23rd 1992.



PAPUA NEW GUINEA EXPORT AWARD 1992



This annual competition for the Papua New Guinea Export Award is now on again.

The competition is open to exporting companies with at least 75 percent national ownership.

WHAT TO DO:

Provide supporting details of your company's export achievements in 1991, eg. volume percentage increases, new markets, new products, etc.

Send your details to: The Marketing Manager
Times of Papua New Guinea,
P.O. Box 1982,
BOROKO, NCD.

CLOSING DATE: 23rd October, 1992.

PRIZE: The Award will be presented by His Excellency, The Governor General, at the Papua New Guinea - Australia Business Council Annual Dinner on 5th November, 1992.

For enquiries, ring telephone 25 2500 and ask for William Kotson.

PROUDLY SPONSORED BY
SHELL PAPUA NEW GUINEA PTY LIMITED

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.